

### **ASO FARAILY, 20 MATI 2015**

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

#### **ISI FAASILASILAGA A LE FOFOGA FETALAI**

**FOFOGA FETALAI:** Ia i lou agaga faaaloalo ou te ofo alofa atu ma ou faatalofa atu i le paia maualuga o le tatou Fonotaga i lenei taeao fou, i le alafai mai i faguga lelei ma le soifua manuia i le paia ma le mamalu maualuga o le tatou Maota ua tatou tini tauao ma o tatou faatasiasi i lenei taeao fou i le soifua manuia ma le soifua lagimaina lelei i lau Afioga i le Taitai o le Malo ma lau Kabeneta, aemaise foi le paia maualuga i lea tala na atoa i le Taitai o le Itu Agai ma sui usufono mamalu uma o le tatou Maota Fono.

E ofo alofa atu ma faatalofa atu i tulaga aloaia, malo le soifua manuia malo le folau. O lenei ua tatou toe faatasi i lenei taeao fou i le alofa ma le agalelei o le Atua, e le faaititia ai pea le agaga faafetai ma le faamanu ona ua tatou aulia lenei aso fou. E ofo alofa atu ma faatalofa atu i nisi o sui usufono faatoa tatou mafuta ona o fuafuaga ma lavasiga a lo tatou Malo, ia malo malaga. Sa matou tapuai atu ma le agaga tatalo e le aunoa ina ia tatou toe fesilafai i lenei taeao. Le paia maualuga i Faauluuluga o Matagaluega, o Faalapotopotoga a le Malo aemaise o le aufaigaluega uma a le Malo o lo o tatou mafuta i lenei aso, malo le soifua manuia.

E faatalofa atu foi i nisi o le tatou atunu o lo o tatou mafuta i lenei aso i ona tupu ma ona ee, o tamalii ma failauga, o faletua ma tausi, saoao ma tamaitai, malo le soifua manuia.ø

Samoa ma lau tapuaiga i lenei aso, ua matou lagona, ia tui mai pea le mulipapaga ma feula le mulila aua le feagai o lou Palemene ma tiute ma matafaioi aua lenei aso.

#### **TUUINA ATU O PEPA**

*Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.*

1. P.P. 2014/2015 Nu. 220, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa mo le Tausaga Faaiuina 30 Iuni 2014.
2. P.P. 2014/2015 Nu. 221, Saunoaga Faa-Minisita a le Palemia, aso 18/2/ - 19/2/2015.

**TUUINA ATU O LIPOTI A KOMITI FILIFILIA**

*Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma le T.T.51(5).*

1. P.P. 2014/2015 Nu. 222, Lipoti a le Komiti o Galuega, Tulafono Tumau, Maota Fono ma Mataupu tau Faiga Palota i le Tulafono Tau Faaofi o Teuteuga o le Tulafono o Faiga Palota 2014.
2. P.P. 2014/2015 Nu. 223, Lipoti a le Komiti o Galuega, Tulafono Tumau, Maota Fono ma Mataupu tau Faiga Palota i le Toe Iiloiloina o Mataupu tau Faiga Palota 2015.

**TULAFONO TAU FAAOFI O TEUTEUGA O LE TULAFONO O ASO MALOLO MO TAGATA UMA 2015 – faitauga faatolu**

**FOFOGA FETALAI:** Tulai mai lau Afioga i le Minisita mo Pisinisi, Alamanuia ma Leipa lau Afioga i le Sui Palemia.

**Tofa Hon FONOTOE NUAFESILI PIERRE LAUOFO (Minisita mo Pisinisi, Alamanuia ma Leipata, Sui Palemia):** Faafetai i lau Afioga i le Fofoga Fetalai, e manatu ona e fana le u i le vateatea i lenei taeao ua maea foi ona momoli laau o malo aua lo tatou Matai sili i le lagi, aua se manuia o le tatou Fonotaga i lenei aso, ia ae a foi le tapuaiga a le atunu.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Aso Malolo mo Tagata Uma 2015 i lona faitauga faatolu.*

*Faaluaina e le Minisita mo Faamasinoga ma Pulega tau Faamasinoga, ma le Minisita mo Galuega Tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O FAATULAGAGA FAALETULAFONO  
O FUA O LE MAMAFAMA FUA ESEESE O OLOA 2015  
– faitauga faatolu**

**FOFOGA FETALAI:** Tulai mai lau Afioga i le Minisita mo Pisinisi, Alamanuia ma Leipa.

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faatulagaga Faale tulafono o Fua o le Mamafa ma Fua Eseese o Oloa 2015 i lona faitauga faatolu.*

**Tulafono Tau Faaofi o le Faalapotopotoga Faavae e Uunaia le Soifua  
Maloloina Lautele 2015 – faitauga faatolu**

*Faaluaina e le Minisita mo Faamsinoga ma Pulega tau Faamsinoga, Minisita mo Galuega tau Alamanuia ma Atinaae a le Malo, ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O LE FAALAPOTOPOTOGA FAAVAE E  
UUNAIA LE SOIFUA MALOLOINA LAUTELE 2015  
– faitauga faatolu**

**FOFOGA FETALAI:** Tulai mai lau Afioga i le Minisita mo le Soifua Maloloina.

**Tofa Hon TUITAMA TALALELEI TUITAMA (Minisita mo le Soifua Maloloina):** Lau Afioga i le Fofoga Fetalai i le faaaloalo tele ou te tulai atu ai, e faatuina le lafo, *Ina ia faitauina nei le Tulafono Tau Faaofi o le Faalapotopotoga Faavae e Uunaia le Soifua Maloloina Lautele 2015 i lona faitauga faatolu.*

*Faaluaina e le Minisita mo Galuega tau Alamanuia ma Atinaae a le Malo, Minisita mo Faatoaga, Faleoloa o Faatoaga ma Faigafaiva, Minisita mo Aoga, Taaloga ma Aganuu, ma le Minisita Lagolago mo le Soifua Maloloina.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O FAIAOGA 2015  
– fefafolafoaiga faaaauau i luga o le faitauga faalua**

**FOFOGA FETALAI:** E tolopo le tatou Fonotaga i le aso ananafi o lo o faagaso lo saunoaga a le sui usufono mamalu mo Faleata Sisifo, ae le i toe tuu atu le avanoa ou te tuu atu le avanoa i le Afioga i le Minisita mo Aoga, Taaloga ma Aganuu, ona avatu lea o le avanoa e faai ai le saunoaga a le sui usufono mamalu.

Tulai mai lau Afioga i le Minisita mo Aoga, Taaloga ma Aganuu.

**Afioga Hon MAGELE MAUILIU (Minisita mo Aoga, Taaloga ma Aganuu):** Lau Afioga i le Fofoga Fetalai, e matauina e toavalu lea ua maea ona lauga i le Tulafono Tau Faaofi lenei, ae matauina foi ua amata ona tagatasi ia saunoaga a sui usufono.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

Ae po o le a se finagalo aua o lea e i ai le taimi e auiliili, e manatu o le taimi lelei lena e faasagatonu ai lava fesili a sui usufono i mea taitasi, leaga o lea ua amata ona pei e taamilomilo ae i Apolima ma Manono ia isi a o lea e tuu le Tulafono. Ia po o le a se finagalo o lau Afioga pe a uma ona saunoa le sui usufono lea, ia ona ou tu atu lea ou te tali, faafetai lava.

**Afioga Hon Palusalue Faapo II (Taitai o le Itu Agai):** Lau Afioga i le Fofoga Fetalai, o se mea e fia faamalamalama.

**FOFOGA FETALAI:** Ia se i tulai mai lau Afioga i le Taitai o le Itu Agai.

**Afioga Hon Palusalue Faapo II:** Ou te talitonu lau Afioga i le Minisita e ana le Tulafono, o se Tulafono Tau Faaofi aupito sili lenei ona taua, aemaise o lou tulai mai i lenei vaitau, o lona uiga, e tatau lava ona tuu le avanoa i sui usufono uma e sausaunoa i lau Tulafono Tau Faaofi, o se Tulafono e aupito sili ona taua, aemaise le atinaeina o aoga, o lo o ave i ai le faamuamua a lo tatou Malo.

O le mea lea lau Afioga i le Fofoga Fetalai, ia lavapapale pea lau Afioga ona o le taua o le Tulafono Tau Faaofi, ma lou faaaloalo lava.

**FOFOGA FETALAI:** Ia lau Afioga i le Minisita mo Aoga, Taaloga ma Aganuu.

**Afioga Hon Magele Mauiliu:** Lau Afioga i le Fofoga Fetalai, e le aveesea ai le taua o le Tulafono, ae o le mea lea o le alu solo ae leai ni mea fou o aumaia, a, aua o lea o le a ta solo i isi mea ae tuu le Tulafono.

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon Palusalue Faapo II:** Lau Afioga, pau lava lea o le mea eí .lau Afioga i le Fofoga Fetalai, pe ta solo pe a, o le aiatatau a le sui usufono o le lauga, o la e faafogafoga mai lona itumalo, ae pei e foliga mai o lea e faatonu mai e le Afioga i le Minisita mo Aoga ia lauga a sui usufono. O le mea lea lau Afioga i le Fofoga Fetalai, lavapapale pea, e tusa ai ma tatou Tulafono Tumau, o lauga faalauaitele a sui usufono.

**FOFOGA FETALAI:** O lea ua ou maua lou finagalo. O lea ua ou maua le finagalo o le Afioga i le Minisita. Ia se i tulai mai lau Afioga i le Minisita.

**Afioga Hon Magele Mauiliu:** Lau Afioga i le Fofoga Fetalai, o lena e i lau Afioga le Tulafono Tumau, e agai mai i le Tulafono, ae le o ni lauga faalauaitele.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

**FOFOGA FETALAI:** O lea ua ou maua le finagalo o lau Afioga i le Minisita, ia e tasi ia ae foi le saunoaga i lau faafogafoga e ala i le soalaupuleina o tatou lauga faalauaitele. Ua uma ona ou faamanatu i le tatou Maota, o tulaga lava o mea faapenei i le faitauga faalua o tatou Tulafono, e lauga faalauaitele i luga o le Tulafono, o lea foi ou te matau, aua ia le alo le foe ma faanape lau Afioga i le Minisita ona e manatu, o se tasi o Tulafono taua o lea ua tulai mai i le tatou Maota ua fai foi sina vaeseuga o lea ua matagofie le faatulai mai o lenei Tulafono taua e le tatou Malo. Masalo e le o toe toatele, masalo pe toe o le Taitai o le Itu Agai ma nai isi ona maea loa lea, ae o lea ou te matau, afai foi ae alu alu foi ae tatou apefroe i le apefroe lava ua tagatasi, ia tatou o foi lea e fai a tatou mea masani. Ae o le a tuu atu le avanoa le sui usufono mo Faleata Sisifo, tulai mai e faaiu mai le saunoaga.

**Tofa LEALAILEPULE RIMONI AIAFI (Faleata Sisifo):** Faafetai lava mo le avanoa i lau Afioga, e manatua foi na saunoa le isi Minisita ananafi i lana Tulafono, o le a faamau i lalo igoa o outou ia e tetee i lau Tulafono, ioe, ia a o lea ua saunoa le Afioga i le Minisita, ua sasa solo a outou lauga.

Lau Afioga i le Fofoga Fetalai, a le tutu atu foi e faamalo ma lagolago ma avatu fautuaga e faaatoa ai le Tulafono, ia faapea foi ua le amanaia le Tulafono, a o lau tala lau Afioga ma le faamaoni, e leai se Tulafono e aumai i le Palemene e aumai e selau pasene.

**Afioga Hon Tuitama Talalelei Tuitama:** Lau Afioga i le Fofoga Fetalaií ..

**FOFOGA FETALAI:** Ia se i tulai mai lau Afioga i le Minisita mo le Soifua Maloloina.

**Afioga Hon Tuitama Talalelei Tuitama:** E i ai lou talitonuga e le aiga mea ia e lua, ma o le Tulafono foi ia ananafi o lea ua maea, a lea e faitau faatolu nei i le taeao, afai la e alu i luma ma toe alu i tua le tatou mataupu, ua ou iloa foi e alu lenei aso e le pasia le Tulafono lea. O le mea lea e agai tonu i le Tulafono o lea e tatou te talanoaina ae taatia ia le Tulafono lena ananafi o lea ua maea, ua history.

**FOFOGA FETALAI:** Ia tulai maia le sui usufono mamalu mo Faleata Sisifo e faaiu maia le saunoaga.

**Tofa LEALAILEPULE RIMONI AIAFI:** Faafetai. Ia tatalo loa le loomatua Samoa, fai mai le loomatua, öLe Atua e, foai le poto i lau fanau, se i faaea lenei aiga vaivai, ö pau lava lea o le mea e tatalo ai lenei olomatua Samoa. Na fai mai le isi au uo papalagi ia te au, öe ese le manuia o lenei atunuu o Samoa, ou te leiloa po o le a le mea tou te fia o ai i fafo ae ese le manuia o lo outou atunuu. Na fai mai, öAisea i lou iloa e manuia ai lo outou atunuu? ö

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

Ou fai atu, õA tatalo le Samoa e le tatalo mo na o ia lava, ae tatalo ina ia manuia Samoa ma lona atunuu ma manuia le Faigamalo.õ Ioe o le mea lena.

O le a ou agai sao loa i le Tulafono Tau Faaofi, o le Vaega 3 ma le Vaega 4 o le Tulafono Tau Faaofi o lo o faapea mai, e aofia ai uma faiaoga i totolu o Samoa, pe e te faiaoga i le Malo, po o Aoga Tumaoti, Aoga a Ekalesia e aofia uma ai lava i inei. Ona faasolo mai lea i le Vaega 4 o lo o faapea mai, e le o aafia ai i lenei Tulafono Tau Faaofi tagata o lo o faafaigaluega tumaoti. O le mea lena e faafesili atu ai i lau Afioaga, po o fea le mea lea na ou taua ananafi i lau lauga i le malosiaga o le Matagaluega e taaofai uma ai faiaoga o lo o faiaoga i lalo o a latou special conditions po o a latou lava polokalame faapitoa. Afai e i ai e lelei, leaga o lea e manino mai. O le isi mea i lalo o le Vaega 4 o le Tulafono Tau Faaofi o lo o faapea mai, e le aiaina e lenei Tulafono Tau Faaofi le faafaigaluegaina o ni faiaoga i lalo o le Tulafono o Tagata Faigaluega a le Malo, PSC. O lou talitonuga e tele le avanoa e tuufaatasia ai Tulafono Tau Faaofi nei, e aiaina ai e le Tulafono Tau Faaofi lenei le faafaigalueina o Faiaoga i so o se mea i totolu o Samoa. Aua o totolu o le Council po o le Fono a Faiaoga nei, e malamalama atoa le poto ma le tomai i so o se faiaoga i totolu o le atunuu lenei. O lona uiga i le agai i luma i lou talitonuga e tatau ona faatino foi e le itutino lenei o le a faatuina le faasoasoaina, faafaigaluegaina ma le fetuunaiga o Faiaoga i totolu o Samoa aua o lea ua i ai le malosiaga i le Tulafono Tau Faaofi. Aua afai e ese le Tulafono Tau Faaofi lenei ese foi le Tulafono e faafaigaluegaina ai faiaoga i lalo ona i ai lea o se feteeaina i le lumanai. A o le naunautaiga o le Matagaluega o Aoga, Taaloga ma Aganuu, e momoli le faamalo ma le faafetai ina ia siitia maualuga le tulaga o Faiaoga aemaise o faailoga.

O le taimi a o ou aoga i le Kolisi o Samoa, e le gata o papalagi, Initia ma faiaoga uma, e leai se faiaoga e le i ai se faailoga taualoa na i ai. O le taimi lenei toeitiiti afa o faiaoga na o le Diploma level o lo o i ai, e tele le eseesega ua i ai. O le taimi lea i le Matagaluega o Aoga, Taaloga ma Aganuu, na Minisita ai le tagata tino faatauvaa, ae a ou vaai i ai i le Minisita i le taimi lenei e puupuu saasaa ae pei o se aoa tele e malu ai ana mea na fai, le Afioaga Le Mamea. A ou savali atu ai i autafa ou te vaai ai i le tagata oka, malo i le Minisita mo Faatoaga i lena foi vaitaimi na e tulai mai ai i le tau amataina o le tatou Iunivesite a o le taimi lea o ou aoga i le Kolisi o Samoa. Ua leva ona avea ma sui usufono lenei toeaina. O le uiga o lau tala, e le gata ina tele faiaoga lelei a o mea e faatino ai aoga, library, laps ma mea uma e atoatoa. O lona uiga a taumafai la le Matagaluega o Aoga, Taaloga ma Aganuu e toe faafoi i le tulaga maualuga, e momoli atu ai le faafetai ma le faamalo. Faafetai foi i le mea lea ua tupu o lea ua faamatuu i tua i Komiti o Itumalo, Sosaiete ma Faalapotopotoga, o le faiga paaga lea a le Matagaluega ma nuu, Itumalo ma Sosaiete ina ia mafai ai e i latou ona pulea le faatinoina o Aoga ae vaai e le Matagaluega o Aoga, Taaloga ma Aganuu ina ia mautinoa o lo o sologa lelei pea.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

Lau Afioga ona pau lea o nai vaega ua tele manatu ae ua ta musu i faapea foi ua sasa solo le lauga, o lo o faafofoga mai lava o nai manatu lava e fesoasoani ai i le Tulafono Tau Faaofi. O le isi mea taua lea e aumai i le Council Combination lea sa ou taua foi ananafi. O lea e manino lava ona aumai e i ai le avanoa o le Council e valaaulia ai ni advisors, o tagata faufautua e o atu e fautua e le mafai ona palota ma tulaga faapena. E le toe faia o se isi Komiti Faufautua o lea ua i ai le Komiti e fai e latou galuega.

Manuia tele le tatou Fonotaga i lenei aso, manuia le Tulafono Tau Faaofi aemaise o le Ofisa. Faafetai.

**FOFOGA FETALAI:** Malo faafetai, tulai mai le sui usufono mo Gagaemauga Nu. 2.

**Tofa LEVAOPOLO TALATONU (Gagaemauga Nu. 2):** Faafetai i lau Afioga i le Fofoga Fetalai mo le avanoa, leai e puupuu lava foi se manatu vaivai o lenei Itumalo e momoli atu ai le agaga faafetai i lenei Tulafono Tau Faaofi taua, o se Tulafono Tau Faaofi e fou i le tatou vaavaai faatasi atu i ai i ona vaega taua ma le tele o lo o aumaia ai. Ona pau lava le mea sa fia avatu ai se lagona sa ou faapea au e aumai le Tulafono Tau Faaofi o le a i ai se avanoa e tatala ai faiaoga i le tulaga o galuega. Masalo e le o toe po se lilo i le tulaga o le tatou Matagaluega o Aoga, Taaloga ma Aganuu ma le atinae o Aoga, i le eseese o le numera o faiaoga ma tamaiti aoga lea e i le ratio o le 4-1. O le faafitauli tonu lena o lo o tulai mai i aoaoga ona o le le lava o Faiaoga ae toatele tamaiti aoga. Ae ana faapea e tatala mai le tatou Tulafono Tau Faaofi, ia aua ne i toe i ai ni vaega litaea o faiaoga ae faaauau aua e i ai lava nai olomatutua foi ia e mafai lava ona o ane fai le mea foi lea o le lima i luga, lima i lalo, a o la e taumafai e faaitiitia mai le ratio lea o le 4-1 seia oo lava ina faasolosolo lelei ae faataatia ese le tulaga o le Tulafono Tau Faaofi i leí .

**FOFOGA FETALAI:** Malie le sui usufono, se i avatu le avanoa i le Afioga i le Minisita.

**Afioga Hon MAGELE MAUILIU:** Faafetai mo le avanoa. O le saunoaga a le sui usufono, o lea ua amata ona toe aoao mai nai faiaoga, e le o se mea fou. O lea lava ua toe aoao mai nai faiaoga tuai e agavaa e toe faaauau le galuega, a o le ratio lea aua nei faamamafaina i o outou mafaufau, aua a lelei ona aoaoina le faiaoga, tusa lava pe 50, 60 tamaiti i totonu o le potu aoga e matua lelei lava tamaiti ae a e tuua le faiaoga leaga i potu e lua a leaga lava le faiaoga e leaga lava. E lua mea e tilotilo i ai le faiaoga, o le mea lava e muamua achieve o le mea lena, e achieve le ratio lea e i ai po o le faalelei o faiaoga ó lea ou te tautala atu i mea o suesuega.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

O atunuu i fao e le o toe faamamafaina le ratio ae alu i luga e atinae a latou faiaoga, po o le a le toatele ae teach atu lava le faiaoga lelei ó lea sa saunoa le sui usufono mo Faleata Sisifo i individual differences i tamaiti aoga e sao lelei, ao le faiaoga lelei na te iloa lelei lava. Ina ne i mamafa tele ia te outou le ratio ae galo ai isi mea ia, o le tala ua tele lava a tatou aoga ua i ai le ratio lena ua oo i luga i le 1-30 i Aoga Tulagalua, faasolosolo atu ai i le 1-20 i tatou Kolisi. Faafetai tele.

**FOFOGA FETALAI:** Ia faaiu mai le saunoaga le sui usufono mo Gagaemauga Nu. 2.

**Tofa LEVAOPOLO TALATONU:** Faafetai, e ese le aoga o le avatu o le fautuaga lena ua piki mai i le taimi lenei le mea e tatau ona fai, malo lava faafetai, leai e le o se tulaga foi lele ae pei ona fai atu e aveese aoga ma le age retired lea e i ai ae faaauau pea po o fea lava le mea e gata mai ai le malosi ae temporary la, seia oo lava ina tatou oo i le ratio e matua lelei ai faiaoga lelei ai ma tamaiti ona taatia loa lea, a o le raito lea e i ai i le taimi lenei ua matua ova lava le faaletonu.

**FOFOGA FETALAI:** Malo saunoa, tulai mai lau Afioga i le Palemia.

**Susuga Hon Tuilaepa Fatialofa Luplesolai Aiono Neioti Sailele Malielegaoi (Palemia):** Lau Afioga i le Fofoga Fetalai, e leai lava ni mea o i ai i le Tulafono Tau Faaofi o taua mai ai ni mea faapena o ni ratio. O le mea lea e faataua o le tulaga e pei ona saunoa i ai, o le tulaga tau faiaoga ina ia i ai le agavaa tau faiaoga ae soia tatou te talanoa i mea e le o i ai i totonus o le Tulafono Tau Faaofi. O le ratio foi i lo matou vaitaimi e 90 le matou vasega ae na o le toatas lava le faiaoga ae le i faapea na leaga ai matou aoga. A lelei lava le faiaoga o le mea aupito sili lena ma taua.

**FOFOGA FETALAI:** Tulai mai lau Afioga i le Taitai o le Itu Agai, ua maua e leai se isi sui usufono e toe fia saunoa.

O le a avatu ia le avanoa lea e tulai mai le Minisita mo Tupe Maua.

**Tofa Hon Tuiloma Lameko (Minisita mo Tupe Maua):** Lau Afioga i le Fofoga Fetalai faapea foi sui usufono mamalu o le Palestine, ae tainane foi le mamalu o le atunuu o lo o mafai ona faatasi mai e maitauina Taualumaga o le Fono Aoao Faitulafono. E le tele se vaega ua mafua ai ona ou tu i luga, ae i ai le vaega taua ou te manatu e ao ona silasila i ai le Minisita. O le vaega o lo o fia faamamafaina ai se manatu, aua o le Tulafono Tau Faaofi lenei o le tulaga lautele i le vaai i ai i le quality po o le tulaga o faiaoga, ou te manatu o se mea aupito sili lea ma taua, o le vaai muamua i le tulaga ua i ai o tatou faiaoga. E avatu le faamalo i le Matagaluega o Aoga, Taaloga ma Aganuu.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

O le mataupu ou te fia laga, e silafia o le taimi lenei ou te le o iloa po o i totonu o le Tulafono Tau Faaofi pe leai. O au o le Taitafono o le matou Komiti o Aoga, o le mea o lo o fai sina faigata i lenei vaitaimi o le faasoasoaina mai o tupe mai le Matagaluega o Aoga, Taaloga ma Aganuu ma tuu atu i le Komiti o Aoga e faagaoioi ai le tele o galuega o mea tau aoga. O nisi taimi e le taitai auau le faasoasoa mai le Matagaluega e le faitio ai foi se isi pe afai e utiuti tupe a le Matagaluega o Aoga, Taaloga ma Aganuu. Ua ou ttau lea vaega ona a faapea e le vaai lelei Matagaluega mo le faasoasoaina o tupe nei e avatu i Komiti o Aoga, o le mea e oo i ai ua matua toe safatuaí ...

**FOFOGA FETALAI:** Malie lau Afioga i le Minisita o lo o i ai le faauilavea a le Minisita mo Aoga, Taaloga ma Aganuu, e fia tulai mai se i faapupula le mataupu.

**Afioga Hon Magele Mauiliu:** Lau Afioga i le Fofoga Fetalai, e leai se manatu e faalavelave i le saunoaga a le toe ulutaia o le Maota. Ua ou tulai atu e ave se faatagaga e saunoa ai le Minisita i mea o lo o i totonu o le Tulafono Tau Faaofi.

**Afioga Hon Palusalue Faapo II:** Lau Afioga i le Fofoga Fetalai o se mea e fia malamalama.

**FOFOGA FETALAI:** E te fia malamalama i i pe e te fia malamalama i o le Taitai o le Itu Agai?

**Afioga Hon Palusalue Faapo II:** E fia faamalamalama ia i latou uma, aua o le Tulafono Tau Faaofi a le Kapaneta. Sa ou manatu ua uma ona soalaupule e le Kapaneta le Tulafono Tau Faaofi ona aumai ai lea a o lea ua toe fetauai i i. O le mea lea lau Afioga i le Palemia, se i silasila ane po o sao mo le gasologa o le tatou Fono.

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga i le Fofoga Fetalai, o le mea foi lea sa fai e le Taitai o le Itu Agai a o Minisita, pau lava le mea o lea na ou faalogo atu o amata le saunoa a le Minisita mo Tupe Maua e lauga o ia o le sui usufono o le Itumalo o le Komiti o Aoga. Ae malie lau Afioga i le Minisita mo Tupe Maua, o lea ua ia te au lau mataupu ona ou avatua lea i tua.

**Tofa Hon Tuiloma Lameko:** O lea ua tu atu i luga Tuiloma e faasao le mea, o lea e misi atoa le mea lea aemaise foi o outou pe a i ai nisi o outouí ...ou te iloa o le toatele o nisi o outou e le o i ai i Komiti o Aoga e faagaoioi ai mea nei ou te fai atu ai.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

O le mea la lea onosai mai, o le vaega lena ou te fai atu ai aua e sau le tupe mai le vaega lea, o nisi taimi a omai la matou Komiti ua le lava ona ou totogiina lea o le taavale ma totogi ma le meaai. O le uiga o le manatu lau Afioga i le Minisita, e taua tele, leaga o le va lea e sili ona taua, o le va o tamaiti, faiaoga ma matua. E tatau la ona lelei le va lea e fesoasoani ai, leaga o tupe o lo o aumai o tupe o le fesoasoani mai a Niu Sila ma Ausetalia.

Lau Afioga i le Fofoga Fetalai faapea sui usufono o le Maota, o le manatu lena ona ou te manatu o le va lea e sili ona taua, o faiaoga, tamaiti aoga ma matua. Ia manuia le Fono.

**FOFOGA FETALAI:** Malo faafetai. E te fia saunoa le Taitai o le Itu Agai? Oi ia o le a tuu atu le avanoa i le sui usufono mo Faasaleleaga Nu.3 ona faaiu mai lea e le Taitai o le Itu Agai.

**Tofa TUILEUTU ALAVAA VOI (Faasaleleaga Nu. 3):** Faafetai i lau Afioga i le Fofoga Fetalai faapea foi le mamalu o le Maota. O le vaai i le aotelega o le Tulafono Tau Faaofi o le a le au ese ai foi se taofi, ona pau lava lea o le agaga ina ne i pon pei o le laau i le Afioga i le Minisita e ou le Tulafono Tau Faaofi, o le upu lea ñlaiseneõ po o talafeagai? O lea lava o lo o afifio foi le aufai tofa o le tatou atunu. O le Tulafono Tau Faaofi e selau pasene, ae pau lava lea o le lagona, o le faa-laisene o faiaoga. Ioe. Tatou te manatu foi lea i mea e pulea e tagata, o le taavale, o le meaola tulou le Maota, ae pe le o le tusi molimau, po o le a se mea faapena. E faamalulu atu i lou uso a Minisita, na o se upu e.... Ma le faaaloalo lava.

**FOFOGA FETALAI:** Malie lau Afioga i le sui usufono mamalu se i avatu le avanoa. E avatu pea le avanoa se i saunoa faapulapula le Minisita. Tulai mai le Minisita mo Aoga, Taaloga ma Aganuu.

**Afioga Hon Magele Mauiili:** Lau Afioga i le Fofoga Fetalai, o lea ou te tulai atu ma le faaaloalo, se i fautua mai po o le a sana upu, aua e uma foi lana lauga nofo i lalo ae le tau maia po o le a sana upu e sui ai le laisene.

**FOFOGA FETALAI:** Se i tulai mai le sui usufono mamalu.

**Tofa TUILEUTU ALAVAA VOI:** Ia, lau Afioga i le Minisita pei ona saunoa, o le resitala po o tusi faamaonia. Ae leai, e le auele le taofi i le Tulafono Tau Faaofi. Na pau lava lena, ae faafetai mo le avanoa. Ia manuia le Fono.

**FOFOGA FETALAI:** Malo saunoa. Tulai mai le sui usufono mo Aleipata Itupa i Lalo.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

**Afioga TAFUA MALUELUE TAFUA (Aleipata Itupa i Lalo):** Faafetai lava i lau Afioga i le Fofoga Fatalai. E le nofoai foi lenei sui usufono, e tatau lava ona fai se manatu ona e ttau le Tulafono Tau Faaofi. E ui lava la o se Tulafono Toe Teuteu, ae leaga e ono aoga a lou itumalo lea ou te vaai atu lea e i ai e i ai ma le Kolisi. Faafetai tele lava i lenei taeao o viiga ma le taeao o le faafetai i lau Afioga i le Fofoga Fatalai. O lea ua uma ona saunoa le MInisita e ona le Tulafono Tau Faaofi ananafi, o le manatu lava lea e tasi, o le faaviivii atu ma le agaga faafetai ma le faamalo, ae le faapea foi na o lau Afioga i le Minisita. E momoli atu foi le agaga faafetai i le Afioga i le Ofisa Sili o Pulega aemaise le Matagaluega aua o i latou ia o lo o lagolagosua i lau Afioga. Manaia lenei Tulafono Tau Faaofi pei ona e saunoa ananafi., o se taeao o le aloaia o le resitalaina o faiaoga uma i Samoa. O se Tulafono Tau Faaofi foi e faapolofesa ai le faiaoga. Sa faapea foi se saunoaga a lau Afioga, o le taeao lenei ua lauiula pou i toa ae fola i maalei. Atonu e mafai foi ona ou faapea atu, o le taeao lenei i Fugalei, Savalalo, o Saleufi, ma Sogi aua o i inei tonu lea e tuaoi uma ai nuu nei. E i ai le faalagiga o le taeao lea o fale putuputu o lea e i ai le Malo ma faleaiga, faapena foi ma le mamalu o le atunu o lo o alaala ai.

A o le ttau o lenei taeao lau Afioga i le Fofoga Fatalai, o le manino ia o le Tulafono Tau Faaofi, e na o le lua lava mea na ou tulai atu ai lau Afioga i le Minisita ma le faaaloalo, o lea e i totonu o le Tulafono Tau Faaofi, ou te toe talanoa foi i ai i le taimi e talanoa ai. O le mea muamua o le saogalemu o faiaoga. O lea ou te tilotilo atu i lalo o le Tulafono Tau Faaofi i lalo o le resitala, o lea e i ai le faaupuga faapea, so o se tagata e totogi ana tupe e mafai ona access i le resitala lea. O le popolega la lea e i ai, lona uiga afai o se tagata solitulafono ae sau e totogi lana tupe e fia silasila i le registrar, e lagona ai lava le popole ma le atugaluga ona o le saogalemu o le faiaoga.

Sa ou fesili i se tasi o lau vaega le Ofisa Sili Lagolago i le taeao nei, e ese foi lana faaliliuga o le vaega lea o le Tulafono Tau Faaofi, ae feeseseseai o ma manatu. E logo atu pea i lau Afioga se i silasila ane i le vaega lea o le Tulafono Tau Faaofi i lalo lava o le resitala, aua o lea e i ai le faaupuga manino lava, o le tagata e sau e totogi lana tupe ona access i vaega uma ia e i totonu o le resitala, le information, vagana ai lava le suafa ma le tuatusi o le faiaoga. A o le atugaluga la, o tatou o se atunu laitiiti e le o se atunu tele, e faigofie lava ona pue e le tagata lea e alu atu e sailili le resitala, po o fea le faiaoga lea, aua o la e i ai uma faamaumauga o mea sa faiaoga ai, le tausaga ma nuu uma sa faiaoga ai ma tulaga uma faapena. O le tuualalo lea ma le faaaloalo i lau Afioga, afai foi e salaese le leo, e faamalulu atu o le uiga lava lea o mea.

O le isi mea ou te fia tuliloaina ai lau saunoaga ananafi, sa e saunoa faapea e i ai se tamalii o lou atunu sa talanoa atu i lau Afioga faapea ua le maua se mafutaga a ia ma lona faletua talu ai le ovataimi i le faiga o meaaoga. Lau Afioga o lea sa ou faalogo atu foi sa faiaoga le Palemia i le tatou Iunivesite a o lea e tele alo o le Palemia.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

Ma le isi mea lau Afioga, e i ai lava lou atugaluga i le tulaga lea, e saunoa soo lava le Palemia ia tupu ma ia olaola le tatou atunu, ona o lea e pei e stuck le tatou growth, e le o sologa i luga le population o Samoa o lea lava e tumau. Atonu e i ai nai contributing factors e pei o le vaega lea o le malaga i fafo o lea e migrate le atunu, ae le gata i lena o lea lava e fai ma o isi tagata e faigaluega i fafo. Ae i lea lava nota, e i ai lava lou talitonuga, afai o le tulaga lea ua ovataimi ovataimi le faiaoga, le maua sona taimi e tatau ona silasila totoa i ai lau Afioga i le....

**FOFOGA FETALAI:** Malie le sui usufono mamalu, se i tulai atu le Afioga i le Palemia.

**Susuga Hon Tuilaepa Fatialofa Lupesolaii Aiono Neioti Sailele Malielegaoi:** Lau Afioga i le Fofoga Fetalai, na o le pau lava lea o le mea ou te fia faasaoina, e le o ni au upu ia na saunoa i ai le... O le tele lava o taimi ou te faamanatu le faamanuiaga foi lea a le Atua na ave ia Aperaamo. Na pau lava lena o au mea ia sa fai, o le faamanatu ma faamanuiaga a le Atua ia Aperaamo, ia saga tupu ma ia toatele lau fanau e pei o oneone o le sami ma fetu o le lagi. Ia na o lau faamanatu ae le o ni au upu.

**FOFOGA FETALAI:** Malie sui usufono mamalu, se i tuu atu le avanoa i le Afioga i le Minisita.

**Afioga Hon MAGELE MAUILIU:** Lau Afioga i le Fofoga Fealai, nei mea ua avesese le saunoaga a le tama lea o le matou nuu, a o le faaaliga o lona fiafia, aua foi o la e fai meaaoga le tina, a o la e tapuai lelei ia ma tatalo. O la e la e faamalo, fai mai a ia, o le mea lea e tatau ona i ai uma lava tama. Sa ou taua foi o le 80% o faiaoga o tina, lona uiga o le toatele ia o bread winners ia, ae lona uiga o la e tafafao isi tama. The least they can do, o le nofo ma tatalo ma aua le faalavelave. Faafetai i lau Afioga.

**FOFOGA FETALAI:** E faasaoina lou taimi le sui usufono mamalu, se i tulai mai le Afioga i le Minisita mo le Soifua Maloloina.

**Afioga Hon Tuitama Talalelei Tuitama:** Lau Afioga i le Fofoga Fetalai mo le faasaoina o le taimi o le sui usufono, ona e i ai le piitaga o le tulaga lea ma le soifua maloloina. E lagona lava lou agaga faafetai ona o lea o le a taofiofia ai le faatupulaia vave o le faitauaofai o le tatou atunu ma le toe manaomia ai ni family planning, aua o lea o le a le toe maua se avanoa e mafuta ai faiaoga ma o latou taitoalua. O lau fesoasoani atu lea i le Tulafono Tau Faaofi.

**FOFOGA FETALAI:** Tulai mai le sui usufono mo Faleata Sisifo.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

**Tofa Lealailepule Rimoni Aiafi:** Lau Afioga i le Fofoga Fetalai, manatua foi, a leai ni tamaiti aoga, o le a la le aoga e o ai e aooga faafaciaoga pe a leai ni tamaiti e o e aoao? Fai atu ai foi, ou te auai i le finagalo o le Palemia, ua laitiiti tele le tatou population, ia matua faatele. E manatua i lau fautuaga lau Afioga i le Minisita mo Aoga, fautua i au faiaoga, faamuamua le tama o le aiga, aua a lelei le tapuaiga, e lelei foi le faiga o le meaaoga. Faafetai.

**FOFOGA FETALAI:** Malie le sui usufono, agai sao i le tatou Tulafono Tau Faaofi. Tafua, o lea o le a oso ese le tatou mataupu ae o lea e tau faafoefoe, o lea o le a agai i mafutaga a faiaoga ma taitoalua ma fanau. Ae malie ia e faaiu mai le saunoaga.

**Afioga TAFUA MALUELUE TAFUA:** Faafetai lava i lau Afioga i le Fofoga Fetalai. E leai o lea lava ou te tuliloaina le sauonaga a le Minisita ananafi, ma lou faaaloalo. Aua o le agaga lea e taumafai atu lau Afioga ma le faaaloalo, o le aoga ma le le aoga o le TV. O sina au tala faataitai lau Afioga, o si ou tina sa faiaoga, o lea sa saunoa mai le Sui Taitai o le Itu Agai sa aoga i si ou tina. O lena vaitau, o lona uiga e leai ni leitio i tua, e leai ni TV i tua. E toasefululua matou ma le faaaloalo. O lona uiga e le gata la o le lelei o le faasoasoa, le time management, ae aoga foi le leai o ni TV. A o lea e i ai si ou popolega i le tulaga lea e saunoa i ai le Minisita mo le Soifua Maloloina, o lea e saunoa mai le Palemia, o le mavaega a le Atua ia Aperaamo, ia pei o le oneone e e tupuga mai ia te oe, ia ifo uma ia te oe manu vaefa ma manufelei ma nisi manu faapena. A o le mea lea e saunoa mai ai le Minisita mo le Soifua Maloloina ia, faapea mai, vaai le family planning, ia puipua aua nei toatele nisi e fananau mai. A o le mea lea e manao i ai le atunuu, ia tele ma uluola le tatou atunuu, ia maualuga le population, o le tele foi lena o faamanuia ga e sasaa mai fafo pei ona saunoa i ai le Afioga i le Palemia. E pei o le vaega lea e tatau ona silasila i ai le Malo, o lea e clash mea ia e lua. Saunoa mai le Minisita mo le Soifua Maloloina i le aiga fuafuaina, a o lea e saunoa mai le Afioga i le Palemia e faamanatu mai le mavaega a le Atua ia Aperaamo. O lea la e tatau ona lafo i le Palemene lenei faafitauli latou te talanoaina le mea sao e tatau ona fai.

**FOFOGA FETALAI:** Malie le sui usufono mamalu, se i tulai mai le Palemia.

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga i le Fofoga Fetalai, o se mea e fia faasao. E ala ona ou faasaoa leaga e i ai le sootaga o le tulaga lea i faiaoga ma falelalaga. O le mataupu la ua tau pepe ai isi falelalaga, o la e la ua toe lelei nei, o le faitioga a toeaiaina, ua o lava loomatutua e fai a latou falelalaga ma tau le o atu ai lava i le fale. E pei la o le mea lea ua o lava faiaoga fai a latou meaaoga, ua tau le o atu i le fale.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

Ae pau lava le mea la e mananao i ai toeaiina, o le taimi foi lea e tagi ai alisi faatoa pogisa, ona o atu lea e nofo lelei i lalo ma punonou ma fai se la tatalo, faafetai i le Atua ua uma le aso, ua iu ina ua po, manuia mea uma, ona toe foi lea o ia i le falelalaga, e faapena foi ma... ma se i fai meaai a tamaiti, fai se latou faigalotu, faataele atu ai ma le toeaina, ona faatoa toe foi lea e faaauau galuega. E leai lava se mea na agai i ai i le faatoatele o fanau, a o lea ua te i lava ua oo fua i ai le lauga a le sui usufono. A o le mea o le professionalism le mea taua lea e aumai e le Minisita, le professionalism i le tulaga e naunau e fai le galuega, pei o le alu i le faleaoga, faatino le togina o pepa a tamaiti, e leaga le nofo i le fale e faalavelave mai le TV, ta le 11 toe alu i le fale. E faapena foi i tina, e o fai le latou falelalaga, uma le falelalaga, tagi alisi o e punonou faatasi ma le toeaina ma fai le tatalo i le Atua ua iu le aso ina ua po ua manuia mea uma.

Lau Afioga i le Fofoga Fetalai, na pau lava lena o le mea sa ou faamanatu atu, o le professionalism o le faiaoga, professionalism o le tina, e lalaga ai le ietoga, ae le tuua lava mea e tatau ona fai, fai faigalotu, fai meaai a tamaiti, o malolo lelei ia alafai mai i le taeao maua le malosi faafouina.

**Afioga Hon Tuitama Talalelei Tuitama:** Lau Afioga i le Fofoga Fetalai, mo le faasaoina o le taimi o le sui usufono, leaga e i ai si mataupu lea e tatau ona faamanino, pei o lea o lo o fai sina nunumi laitiiti o le Maota i le faaupuga lea o le family planning. Silasila foi, o le family planning, e le faapea o le faamutaina o tamaiti, a o le plan faalelei o le va o tamaiti. O lona uiga o lea foi e fesoasoani le falemai i le auauanga ia i latou e leai ni tamaiti o lo o fia maua ni tamaiti, o lea e tau fesoasoani ai fomai ina ia maua ni a latou tamaiti. A o le mea la lena o le plan ina, ina ia fesoasoani ia i latou o lo o ua ova tamaiti ae le lava le tamaoaiga e tausi ai tamaiti, ona tele lea o tamaiti ona tufa atu lea i aiga latou te vaia.

O le agaga la lena e le o manaomia e tatou, ina ia silasila lava le aiga, le tama ma le tina i tamaiti e gafatia i le tamaoaiga la te maua ia aua ai ne i soifua matitiva pe moomoo pe manaonao alo ma fanau mo le agai i le lumanai. O le uiga lena o le family planning ae le faapea o le faamutaina o tamaiti. Ma le faaaloalo tele i lau Afioga.

**FOFOGA FETALAI:** Malo faafetai. Tulai maia le sui usufono mamalu e faaiu mai le saunoaga.

**Afioga TAFUA MALUELUE TAFUA:** Faafetai i lau Afioga i le Fofoga Fetalai. O le amataga o au upu na saunoa ai le Minisita e faapea, ua lau i ula pou i toa ae fola i maalei. Ia atonu o le agaga lena o lenei Tulafono Tau Faaofi ua maualuga le faaaloalo a le Minisita ma le Matagaluega e toe faaopoopo atu ai le faafetai.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

A o lea na saunoa le Afioga i le Palemia i le faapolofesa, o le faapolofesa sao lava o le faiaoga lea na saunoa i ai le sui usufono lea o le Itu Agai, o le quality o faiaoga, lea na saunoa i ai si au uo le sui usufono mo Faleata Sisifo. O le lelei ia o le tama lea e Ofisa Sili o Pulega i le Matagaluega o Aoga, ae le soo i ai le tama lea o Leala, tulou lava. O le quality la o faiaoga, aemaisae lava le isi mea lelei, o le punctuality, keep time, o le usu mai o le faiaoga i le taimi tatau. Ae le gata foi i lena o le discipline, aua ou te tau manino atu lava e au ia e ese le sauau o lou tina i ona taimi a o faiaoga. Ia ua oo mai foi le sauau lena ia matou, ia ona tau avatu lea e matou i a matou fanau, ia talu ai la o le Tulafono, ua le oo ai le faasalaga lea aua e fai mai lava isi, o le matua sauau o le matua lelei lena, ae i ai lava foi isi taimi e excessive ai le sauau o faiaoga, ae leai e le aoaia e Laupua Tamafaiga, o lea lava e talitonu ua uma ona i ai lava processes e uia e le Matagaluega. E momoli atu ai le faamalo ma le faafetai i lau Afioga i le Fofoga Fetalai, o nai upu ia ma nai tuualalo i le Afioga i le Minisita, ae malo mo le Tulafono, manua le tatou Fono.

**FOFOGA FETALAI:** Malo faafetai. Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, e tulai atu foi ma le agaga faaalaoalo e fai foi ma leo o lenei itumalo o Safata, e momoli atu ai foi sina motugaafa e tusa ai foi ma lenei Tulafono Tau Faaofi taua.

O au e le masani ona faafetai i se Minisita e tusa ai ma ni ana Tulafono, a o le taeao lenei, o le mea lea na ala ai ona ou fai atu lau Afioga i le Fofoga Fetalai, e tatau lava ona ave le faafetai i le mea e tatau ona ave i ai, faafetai i lau Tulafono.

E pau lava le mea lea e tutulai atu ai lenei itu aua e le i atoatoa le Tulafono, o lea e tutulai e avatu ni fautuaga e atili tapue ai le Tulafono, o le uiga tonu lea, e tuu atu i ou tafatafa a e faaaoga, lelei, a leai, lelei, a o la ua avatu le fautuaga i lau Afioga. Ae o lenei Tulafono o lea ua savali i le limasefulu ma ona tupu tausaga talu ona Tutoatasi Samoa, i, a o lea faatoa mafai ona fai le Tulafono e fuafua i le lelei ma le manua o faiaoga. O le mea lea e tatau ai ona ou faafetai atu i le Afioga i le Minisita, ua tele Paeaiga ua tuanai, tele Minisita ua tulai mai, tele Faatonu Sili ua tulai mai, ae a? A lea faatoa fai le mea lea, o le mea lea sa tatau ona muamua ona fai, o le silasila totoa ina ia faatulaga faiaoga i le maualuga e tatau ona i ai, ona lelei lea ona aoaoina a tatou fanau, o le lumanai o aiga, lumanai o nuu, ekalesia, ae a le Malo? O le ala lea o lou tulai atu lau Afioga i le Fofoga Fetalai, pau lava lea o nai mea, aua ana leai le Tulafono lea, sa i ai le mea na tupu i lou itumalo i le aega o aoga i le tausaga lenei, e atoa le vaiaso e le i i ai ni aoga a tamaiti. E mafua aisea? E le i i ai se Pule Aoga, e le i lava faiaoga na i ai, ioe, o tulaga ia, ae faafetai na toe faaleleia i le isi vaiaso na sosoo ai.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

O le mea lea lau Afioga i le Fofoga Fetalai, o le Tulafono lenei, o se Tulafono pei ona sausaunoa le tele o sui usufono, o se Tulafono Tau Faaofi taua, e le mafai ona laalaa i luma faamoemoe o le Malo ma le Matagaluega, pe a le faaleleia le mea lea, o le silasila i nai faiaoga. Pau lava lea lau Afioga i le Fofoga Fetalai, e siitia ai totogi o nai faiaoga, e siitia ai ma faaleleia faamanuiaga aua nai faiaoga, ave le faamuamua i le mea e tatau ona ave i ai le faamuamua, o le agaga lena.

**Afioga Hon Magele Mauiliu:** Lau Afioga i le Fofoga Fetalai í

**FOFOGA FETALAI:** Malie lau Afioga i le Taitai o le Itu Agai, se i tuu atu le avanoa i le Afioga i le Minisita mo Aoga, Taaloga ma Aganuu.

**Afioga Hon Magele Mauiliu:** O au lea ou te mafaufau po o le a se auala e ave ai i le Taitai o le Itu Agai, faafetai i lau faafetai mai ia au. Ae na alu atu ia le sui usufono mo Faleata Sisifo sosoo atu ana faafetai ia au ananafi, fai atu, faatali la Lealailepule, ou te le fia faalogo atu i sau faafetai, alu e faafetai i le Atua, o lea la na sau ai ananafi, fai le mea sao e faafetai i le Atua, ae le o mea na, na tuu e sau e faafetai mai ia au.

O lea ou te mafaufau, po o le a se auala e avatu ai ona e le o silafia e outou ua leva ona sii totogi o faiaoga, o lea na ou talanoa atu ananafi i fuainumera o tamaiti ia ua tosina i le faiaoga as a career, a, o le tosina tele lea, o la ua latou iloa le tulaga lea ua i ai totogi o faiaoga, ua tuu lava i luga e le o toe eseese lava ma le entry point o isi profession, e fia faaali atu la faapena, ua leva, ua leva lava ona fai le faaiuga e sii totogi ma faasalalau foi i nusipeda ma televise, e foliga mai e le o maua e lau Afioga i le Taitai o le Itu Agai, faafetai.

**FOFOGA FETALAI:** Ia tulai mai lau Afioga i le Taitai o le Itu Agai e faaauau le saunoaga.

**Afioga Hon PALUSALUE FAAPO II:** Lau Afioga i le Fofoga Fetalai, e ala ona fai atu lau tala lea, leaga e sulu mai faiaoga ia te au ma lenei vaega, i, e sao, afai ua sii, e le o lava, se i toe silasila ifo i ai lau Afioga i le Palemia ma le tatou Malo, e le o lava.

**Susuga Hon Tuilaepa Fatialofa Luplesolai Aiono Neioti Sailele Malielegaoi:** Lau Afioga i le Fofoga Fetalai í

**FOFOGA FETALAI:** Malie lau Afioga i le Taitai o le Itu Agai, se i tuu atu le avanoa i le Afioga i le Palemia.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Na ona ou faamanatu atu i le Taitai o le Itu Agai, o le Paeaiga lea sa ou tofia ai le Taitai o le Itu Agai e avea ma Minisita, o le Paeaiga tonu lava lea na matou suia atoa uma ai lava le faavae o le faataotoina o totogi, i le tulaga o mea sa sau ai, sa eseese lava, e alu lava le vaega latou, e ese lava, e alu lava le PSC, alu le Judiciary ma isi Faalapotopotoga a lo tatou Malo, e le i lelei la, ona amata mai lava i le taimi na alu ai le Solo Tetee a le Malo i le 1982, o le mea tonu lava lena, ona o le faaletonu o le Pulega i le faatulagaina o totogi, e alu lava le vaega latou. O le taimi la lea i le Paeaiga lea 2001 i le 2006, na faatu ai loa le Tribunal, o le latou lava lea galuega o le tilotilo lelei i le faatulagana o totogi uma o le aufaigaluega a le Malo, aua ne i toe sau pei o le mea lea na sau ai, a fai se suesuega a le PSC, ia na o le PSC lava e faia, e uma lea tausaga e na o le lua Matagaluega ua oo i ai le isi tausaga ua oo atu i le isi Matagaluega e faapena, e uma le lima tausaga, ae pe na o le ono pe fitu ae le i taitai gafatia ia Matagaluega uma a le Malo. O lea la e tasi lena mea na tupu ai le ita o le aufaigaluega tupu ai loa ma le teva i le 1981. O i la i le 2001 i le 2006 lea na faataoto mai ai, e faalaugatasia ma faatulaga ai loa mea ia o vaega eseese i entry point, ina ia faalaugatasia. O le vaega aupito sili ona faigata, o le vaega lea a fomai ma faiaoga, ona e lilifa i i tagata, o lona uiga, e le faigofie aua po o le pasene po o le mea faapena, e faitau miliona ma miliona ma miliona le tupe e alu ai. O lea foi la ua uma ona faataoto uma lava faiga ia e faalaugatasia atoa uma ai le service atoa, o lea la ua taoto ai i lautuatonu ia tulaga, o le faatulagana o totogi o le Malo ma ona vaega eseese. Pe a manatua e le Maota lenei ina ua uma ona faataoto le tulaga lea, ona faapea ai lea o le fautuaga na aumai e le Komiti lea o Totogi, ona o le maulalalo tele o totogi o le aufaigaluega, o le a tuu mai le 42%, e le lava tupe a le Malo na faatino ai lena fuafuaga, ona faatino ai lea i le tausaga muamua le 21%, a o isi tausaga e lua e tai 10 ma le  $\frac{1}{2}\%$ . O e manatua le Taitai o le Itu Agai? A o le taimi lena o lea e saofai ai le Taitai o le Itu Agai i totonu. O le auivi atoa lava lena o lea e faataoto ai nei ia totogi a le Malo, o le ala foi lena pe a manatua, na ona uma lava ona fai o le iuga lena ae oso le teva a fomai, na ou iloa ai i ina le vaivai tele o fomai na i ai o lea ua avatu faataoto atu ia tulaga e faalaugatasia ai le service atoa ae oso si a latou mataupu. Ia na iloa lelei lava le mea na oo i ai, e leai lava ma se gaoioi o le Malo, ona o lea ua taoto i lautuatonu ae toe faaoso mai le latou mataupu e toe faasipa ai mea ua uma ona faataoto. O lea la ua kava uma faiaoga kava fomai, ma o le tulaga la lena o lea ua i ai. O le faavae atoa o le teva lena a fomai, e sili atu latou i lo se isi lava matafaioi, ona o latou e faalagolago i ai le ola o le atunu. E leai ni mea faapena, e tatau ona faalaugatasia aufaigaluega a le Malo ó ma o tulaga na o lea ua taoto ai nei ia fuafuaga ia o mea tau totogi. Na matua faitio le vaega lea i tua o le aufaipisinisi. O le a le mea na faitio ai? Aua ua faapena mai i luga totogi o le Malo ae faapenei atu i lalo le aufaipisinisi, o lona uiga la ua otometi ai loa le sii o latou ma taugata ai latou oloa ma lo latou tautua ma faaletonu ai a latou pisinisi. O le tulaga la lena o lea ua toe pau i le tulaga sao ia le vasaga o totogi.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

Lau Afioga i le Fofoga Fetalai, o le mea lea ua ou faamanatu atu ai ona e faalogo pea i iuleo ia, tuu a tatou faiga polokiki, a, ae ia matau lelei le faagasologa aua o lea sa e saofai ai i totonu, sa e saofai ai i totonu o le Kapaneta ma faatulaga ai la ia totogi, o lea la e alu ai nei.

Lau Afioga i le Fofoga Fetalai, o le auivi atoa lena ina ia malamalama lelei i ai le Maota, soia ia le polokiki i le faiga o lauga, aua e le mafai ona toe faia se faiga faapena o le fai faapito o se vaega, e le mafai ona toe faia se faiga faapito, a oo loa i mea tau totogi, ia manatua lelei, e faapei lava ona manao le fomai e sii lona totogi, e faapena foi ona manao le loia, e faapena foi ona manao le faiaoga, e faapena foi ona manao ia le isi vaega lautele o le tatou aufaigaluega a le Malo. A oo loa ina faataoto faiga faavae a le Malo mo le lautele o lana aufaigaluega, e le tatau ona faia se mea e sii isi, e faasavali isi ae sii isi, e tatau ona faalaugatasia i se level playing field, ina ia tutusa ai tagata uma.

**FOFOGA FETALAI:** Malo faafetai. Tulai mai lau Afioga i le Taitai o le Itu Agai.

**Afioga Hon Palusalue Faapo II:** Lau Afioga i le Fofoga Fetalai o se mea e fia faasao. E sao, sa faataoto faiga faavae. Ae o le a le mea lea na matau? Faatoa mafai i le tausaga lea talu ai ona fuafua se siitaga o faiaoga. O le ala lea o lou tulai atu, ona e ese le faataotoga a o le faatinoga ina ia sao.

**FOFOGA FETALAI:** Malie le Taitai o le Itu Agai, se i tulai mai le Afioga i le Palemia.

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga i le Fofoga Fetalai, e tulai atu e faasao, ona o mea faapenei, e le alu atu le isi Matagaluega e fai ia le isi Matagaluega, e faapena foi pei o mea ia sa faaletonu ai fomai, o latou lava i le latou administration, e tatau ona faataoto ma faatino galuega tau pepa, e faapena foi i faiaoga, o le ala foi lena o lea na lauga mai ai le isi faiaoga ia te au i le latou aso faapitoa, ðTuilaepa se i alofa ane i le matou Tulafono o matou Asosi,ð le Tulafono lea. Ona ou tali lea, ðvaai, o le mea lena sa saunoa ai le Peresitene, na ona ou faamanatu atu, na o foi le au Suetusi latou fai le latou Tulafono o le Asosi o Suetusi, e gaoioi lava le Asosi o Suetusi, e le i omai e lauga faapea mai i le Malo, o foi le au Inisimia fai le latou Tulafono, o foi le au Loia fai le latou Tulafono. E leai lava se loia leai se inisinia na omai se latou solo tutu mai luma ma faapea mai, ðLe Malo e, fesoasoani mai i le matou Tulafono,ð leai, o outou lava e tou te o e faatino lelei la outou Tulafono e aumai, o lea la ua i le Maota, le Tulafono tonu lava lea, lea ua tatou talanoaina nei.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

O le mea lea ou te faamalo ai i le Afioga i le Minisita, aua e oo foi i isi Tulafono pei o Tulafono a Loia maí í ..e le faapea e te i lava ua oo mai i le Maota lenei le Tulafono, e auala mai i le Minisita ona aumai ai lea e le Minisita i totonu i i, gaoioi foi le Minisita ma le latou Matagaluega e toe teuteu ia vaega e tatau ona teuteu. O le mea lena ou te faamalo ai i le Afioga i le Minisita i lana fesoasoani i le tele ua mafai ai ona aumai le Tulafono lenei ua leva ona tatau ona i totonu o le Maota lenei.

**FOFOGA FETALAI:** Malo faafetai.

**Afioga Hon PALUSALUE FAAPO II:** Lau Afioga i le Fofoga Fatalai, e le o se faapolokiki leaga o le mea lea e tupu e tusa ai ma le saunoaga a le Palemia. O le Tulafono Tau Faaofi lau Afioga i le Fofoga Fatalaií

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga i le Fofoga Fatalai o le mea e fia faasao. O le mea e tau o le faapolokiki o le nofo ma toe aumai se mea ona lotea, vaai i le matagofie o le saunoaga a le Afioga i le Minisita, ua leva ona uma ona lotea, o lea ua alu a o lea e te saunoa mai pei e leai se mean a faia. O le mea lena e igoa o le faapolokiki, e le gata ina faapolokiki ae toe polokiki leaga, o le mea lena e igoa o le polokiki leaga, polokiki eleelea, o lou taumafai e saili ai, e leai ni ou ai e maua ai, e leai ni ou ai faaopoopo ae na o ai toese.

**Afioga Hon PALUSALUE FAAPO II:** Lau Afioga i le Fofoga Fatalai, o le faalavelave lea o le Afioga i le Palemia, se i e faafogofa mai i mea ia e avatu aua leaga o mea ia o lo o tutupu ae le o se polokiki leaga.

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga i le Fofoga Fatalai, se e te le i saunoa mai ua leva ona ou iloa atu the end o le mea lena e te agai i ai. E te silafia ea ua leva ona ta mafuata? O le mea la lea sa ou fai atu ai ia te oe, sa le tatau ona e talia lou tofi o le Taitai o le Itu Agai. E mai lava i lou ulu seja oo i ou mataiutiuvae e leai se mea e tasi ou te le iloa, e tele foi mea ia ou te iloa o lea ou te taofiofia. O le ala lena o lea ou te fai atu pea, fai atu pea, fai atu pea i lau Afioga, aua e te faapolokiki, aua a ta agai loa i ai e le maua se mafutaga mafana.

**Afioga Hon Aeau Peniamina Leavaiseeta (Falealupo):** Lau Afioga i le Fofoga Fatalaií

**FOFOGA FETALAI:** O lea laa uma ona avatu loa lea o le avanoa le sui usufono mo Falealupo. Ia se i tulai mai le Sui Taitai o le Itu Agai.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

**Afioga Hon Aeau Peniamina Leavaiseeta:** Lau Afioga i le Fofoga Fetalai, ioe, e faanoanoa lava i le faafofogaaga a le atunuu aemaise lava personal and it's the worst thing we would ever pass on i le Palemene ae tuu sao mai pea, o le manaia ia o le lua fetauaiga pe a aveese lea mea, tulou lava, faafetai.

**Susuga Hon Tuilaepa Fatialofa Luplesolai Aiono Neioti Sailele Malilegaoi:** Lau Afioga i le Fofoga Fetalai, o lea foi o le a ou toe tulai atu i le sui usufono mo Falealupo. Aeau sa e Fofoga Fetalai, o e manatua le isi Tulafono taua sa masani ona e taofia ai sui usufono. E le faasao e le isi le faasao a le isi, se i oo i le taimi e te saunoa ai oe.

**Afioga Hon PALUSALUE FAAPO II:** Lau Afioga i le Fofoga Fetalai, ua saunoa soo lava le Afioga i le Palemia i le mea lea i le Taitai ma lenei Vaega. Lau Afioga i le Palemia, e leai, leai ma sau pisinisi i le Taitai ma lenei Itu, se i silasila oe i lau Itu, silasila i ai po o lelei po o i ai se faaletonu, a o le talau soo mai o le mea lea i le Taitai o le mea lenai

**FOFOGA FETALAI:** O lea ua maua, se i tulai mai le Palemia.

**Susuga Hon Tuilaepa Fatialofa Luplesolai Aiono Neioti Sailele Malilegaoi:** Lau Afioga i le Fofoga Fetalai, e leai o le tuualalo po o le tuualuga foi. O le mea lena ou te fai atu ai leaga o lea ua e tai tua i totogi, ua galo ia oe o mea ia na ta faia? Ua galo? O mea ia sa tatou faia, o taimi uma lava sa avatu ai au fesili o lou fiafia ia i le tatou faataotoga o polokalame nei. O lea ua faataoto le polokalame a o lea ua e toe afio mai ma e saunoa ma pei e foliga mai e te le o malamalama i le polokalame a tatou na faataoto. Ua uma ona saunoa manino le Afioga i le Minisita, i le faasologa o le tulaga o totogi. E oo loa imea tau totogi e le mafai ona ou nofonofo, le mafai ona nofonofo foi le Minisita e leaga o le mataupu e maaleale. O le ala lena o so o se isi lava o outou e tulai mai i totogi, ou te le tuufauina e alu, leaga o mea na sa faaletonu ai isi Faigamalo. Ina ne i te i ua faapea o se mea faataetaeluga, e oo loa i mea tau totogi, malie le Taitai o le Itu Agai, leaga o mea na e afaina ai Malo, o le tulaga o le faaoloataua o se aufaigaluega a le Malo e ala i mea ia tau totogi.

**Afioga Hon PALUSALUE FAAPO II:** Lau Afiogai le Fofoga Fetalai, o lea la ua oo i se tulaga le manuia le saunoaga a le Afioga i le Palemai, ioe. E le o se faaoloataua, o le mea lea o lea e tupu, o lea ua i ai le tupe e toe faatulaga ai totogi o faiaoga, a o le siitaga lea ou te fai atu ai sa taoto lelei faiga faavae a o le le faataunuina lau Afioga i le Fofoga Fetalai. O le mea lea lau Afioga i le Fofoga Fetalai, o lea ua oo i le faaoloataua e leai, o la e faafofoga mai le atunuu e le o se faaoloataua. Lau Afioga i le Fofoga Fetalaií .

### Lafo mo le Faataatiae o Tulafono Tumau 31(1)

**FOFOGA FETALAI:** O lea ua maua atu le finagalo o le sui usufono. E vaelupeina le saunoaga a le sui usufono ona o lea ua oo i le taimi o le tatou malologa masani, ou te manatu foi o le aso o le aso puupuu ua tatau ona tali le sua e tuutuu ai i lalo le toto maualuga ma le suka.

O le a faataatiae ese Taualumaga a le Fono Aoao mo lana malologa masani o le taeao.

*Na faataatiae Taualumaga a le Fono Aoao mo lana malologa masani i le itula e 10:13 i le taeao ma toe amatalia i le itula e 10:56 i le taeao.*

**FOFOGA FETALAI:** Ia e faamalo atu le onosai i lenei taeao ma ou te manatu o lea ua tatou toe taliu mai mai le tatou malologa. E maitauina foi ua toe maua le laufofoga fiafia o le tatou Maota nei lea ua maea le tatou taliga sua ma e talitonu ua toe faafoisia lo outou malosi.

E faia le tatou malologa o saunoa le Taitai le Itu Agai, a o le i tuuina atu le avanoa ou te tapa le Afioga i le Palemia mo le lafo.

### LAFO MO LE FAATAATIAESE O TULAFONO TUMAU 31(1)

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o lea ua toe taliu mai le Maota nei ina ua maua le faasiliga malosi e tusa ai foi o le tatou malologa ma le faaaloalo a le Ofisa nei, e faafouina ai le malosi aua le faaauauina o le Fonotaga. Talu ai ona o le aso puupuu foi lenei a o lo o tele pe a tatou Galuega, aemaisse o le agaga foi sa ou avatua i le Fonotaga talu ai i le itu o le ono lapse o nisi mataupu e le mafai ona tagofia e le Fono lenei, a o mataupu taua ona o lea ua tatou agai atu ina faamaea lenei Paeaiga.

O lea ou te tulai atu ai ma le agaga faaaloalo lau Afioga e faatu le lafo, *Ina ia faataatiae a tatou Tulafono Tumau 31(1), ina ia avanoa ai le faaauau o Taualumaga seia maea le faitauga faalua o Tulafono Tau Faaofi e lima ua i le tatou Pepa o Galuega.*

*Faalauaina e le Sui Palemia.*

*Na faamaonia le lafo ma tulai ai Tulafono Tumau 31(1) ua faataatiae.*

**FOFOGA FETALAI:** Tulai mai le Taitai o le Itu Agai e faaauau le saunoaga.

**Afioga Hon PALUSALUE FAAPO II:** Faafetai mo le avanoa i lau Afioga i le Fofoga Fetalai, e le o te umi foi se manatu, ona pau lava lea lau Afioga i le Fofoga Fetalai, o le tulaga lea o le lava pea o a tatou Faiaoga.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

Afai o le Tulafono Tau Faaofi lenei ia silasila totoa i ai aua lea tulaga aemaise foi pe silasila i faiga faavae, ina ia toatele ai tamaiti e agavaa mo vasega nei e ulufale ai i le Aoga faa-Faiaoga. O le mea lea e taatia atu pea i ou tafatafa ina ia silasila totoa i ai i le Tulafono Tau Faaofi lenei ma foia ai lenei faafitauli. O lea e faapea mai o le tele o tamaiti e iu mai e leai ni galuega e moni, a o le tasi lea avanoa e maua ai galuega a tamaiti o le fai i ai e o ave le faa-faiaoga. O lo o matauina le manaoina i tausaga uma e le gata i Samoa nei, a ia maua a le avanoa e o e faiaoga ai i fafo. Ina ia silasila i faiga faavae ma tatala ai le avanoa i fafo e maua ai galuega a nei tamaiti.

Ona pau ia o nai manatu a ia manuia tele lau Afioga i le Minisita aemaise o le Matagaluega ma le faatinoina o le Tulafono Tau Faaofi ua faataatia mai. Ia manuia le Fono.

**FOFOGA FETALAI:** Lau Afioga i le Minisita mo Aoga, Taaloga ma Aganuu, e i ai se isi mea e te toe fia saunoa ai? Tulai mai e tali mai i lau tali faaiu.

**Afioga Hon MAGELE MAUILIU:** Faafetai i lau Afioga i le Fofoga Fetalai, ua ou tulai atu ma le faaaloalo ona e i ai nai mataupu taua sa laga e sui usufono. E faafetai atu i sui usufono uma mo lo outou sao i lenei Tulafono Tau Faaofi, ua faalototeleina foi le Matagaluega o Aoga, Taaloga ma Aganuu i le lagolago ma le amanaia o le taua o lenei Tulafono Tau Faaofi, o le siitia lava lea o a tatou faiaoga ona o le manumanu i alo ma fanau o le atunu ma le lumanai. E pei lava ona ou tautala i lau folasaga, o le atinae o tomai ma agavaa o faiaoga, ole avanoa foi lea e siitia ai le tulaga o le faiaoga. E pei lava ona saunoa nisi o sui usufono, o le galuega e tamaalii, o le galuega e mamalu e o faatasi lava mea nei e lua. E ala ona maualalo le galuega a faiaoga i le taimi lenei, ona o lo o maualalo foi le aoaoina, ae a maua le faamoemoe lea ua faapena foi ona siitia le tulaga o faiaoga ma toatele ni tamaiti e o atu i ai e fia faiaoga ona faapea ai lea ona foia ai lea tulaga o le le lava o faiaoga i Aoga Tulaga Lua aemaise o Aoga a Kolisi.

O lenei lava Tulafono Tau Faaofi, o se Tulafono Tau Faaofi lava na fausia mo Samoa. A i ai la se faiaoga mai Niu Sila mo se faataitaiga, e fia sau e faiaoga i Samoa, e tuu lava lana laisene ma lana lesitala i Niu Sila e le taulia i Samoa. A oo mai i Samoa ona faatino lea o le tatou Tulafono Tau Faaofi, lesitala pei lava o isi faiaoga ona maua lea o le faatagaga e faiaoga ai. A i ai foi ni faiaoga Samoa e fia o i fafo e pei o Niu Sila, e tuu foi lona lesitala ma lona laisene Samoa ae alu e apply lona lesitala ma lona laisene i Niu Sila. E i ai lava le va fealoaloai, o le mea lea e lelei ai ua i ai le tatou Council aua a oo ina manaomia mai e Niu Sila se faamaoniga pe manaomia foi e tatou se faamaoniga i lea faiaoga, o galuega ia e nafa ma le fono. E faafaigofie ai la le itu lea sa saunoa ai se tasi o sui usufono ona e taua tele.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

O lenei foi Tulafono Tau Faaofi o le a i ai ona Tulafono Faatonutonu, o i o le a faatonu lelei ai le fua o lesitala i letotogi, e fuafua foi i faiga faavae a le Revenue po o i latou o lo o vaiaia Tupe Maua a le Malo, aemaise o totogi o lo o totogi ai auaunaga a isi Asosi ma isi foi Fono faapea. E aiaia ai foi i Tulafono Faatonutonu le lesitalaina ina ia aua nei umi, e sao ai le saunoaga a le sui usufono, o le tasi lea mea sa talanoaina i pisinisi ia aua ne i umi se taimi e fai ai. O le pisinisi foi le alu o le tagata e totogi le tuge, o tulaga uma nei o le a faatonutonu i le Tulafono Faatonutonu ina ia vave le process lea ina ia aua ne i umi ona faatali le faiaoga.

Ua aiaia ai foi faassalaga, o le Fono a ia a Faiaoga, o mea tau professional standards e pei o lava o le latou matafaioi laualuga, a i ai ni solitulafono e aafia ai le preach o le contract ma le Komisi e Pulea Tagata Faigaluega a le Malo, o le tulaga lea o contract e faigaluega ai po o le preach o le solia o nisi aiaiga ma faiga faavae e faafaigaluega ai tagata e le Malo ona faasee atu lea i le Fono i le PSC. O le PSC latou te faia le tonu lea, a manao le PSC e toe faafoi i le Council e refer i le Tribunal o mea uma lava ia e mafai ona fai. Afai o se faitioga e aafia ai se solitulafono e silasila i ai le fono ona faasee atu lea i leoleo, ae afai e faasee atu ae le lava molimau e fai ai se moliaga, ona toe faasee lea i le Council, ma e tatau lava ona clear lea tagata, se i vagana ai o la e clear i le Council ia e le o solia se professional standards. E peiseai o auala ia e faafoia ai lea vaega.

O le tatou Tulafono Tau Faaofi lenei pei foi ona ou tautala ma saunoa le Afioga i le Palemia, e lavevea uma ai aoga tumaoti ma aoga a Eklesia, ma o se tulaga lelei lea. Aua e leai se mea tatou te... e le aoga le tatou taumafai atu e siisii le tulaga na o aoga a le Malo, ae tatau foi ona avatu le tauau i aoga a Eklesia, ma o lo o faamalosia lea mea i lalo o le Tulafono Tumau o Aoga 2009. O i ina foi o lo o resitala faamalosia ai faaletulafono aoga uma lava. O lo o aiaia ai foi i le Fuaiupu 6 faiaoga le tumau po o part timers. Ua lelei lava le tulaga o tatou aoga e pei ona atugalu nisi i le tulaga lea o alagaoa o lea ua faasafua atu le 80% o tuge o le grant a le Malo ia faaalu i alagaoa ia e fesoasoani i faiaoga. E tele lea vaegatupe ma ua ou vaai i ai i au asiasiga i nisi o aoga ua faatau a latou masini faaonaponei, pei o mea ia e i le tatou Maota nei, o le projector ma le screen faapela, ua manaia ai lava aoga i tua aemaise o le faiga o latou lesona ma masini faaonaponei o lo o faapena lava ona faasoasoa a tatou resources ia i tatou aoga.

O le tulaga taua lava lea sa taua e se tasi o sui usufono mo Salega o le mea lea o le credit point system. O lo o faaaoga uma i Iunivesite o le lalolagi le vaega lea, e le i leva ona auai le tatou iunivesite i le credit point, talu ai la o le pressure mai fafo pe a oo i le taimi foi lea e faatusatusa ai pe fia contact hours o lea mataupu, ae po o le a foi le loloto na oo i ai lona teaching, ona assign lea i ai o se fuainumera, o i ina la e faatusatusa ai loa e le isi iunivesite le isi iunivesite. Ua uma foi o la e faaaoga e le tatou SQA, ua uma foi ona assign e le SQA a tatou certificates mai lava i le level 1 e tau i le level 10. O le level 1 la lea e i ai tatou certificates foi ia, basic certificates ma mea faapena, sei tau lava i le level 10 lea e i ai tatou doctorate certificates.

**Tulafono Tau Faaofi o Faiaoga 2015**  
**- felafolafoaiga faaauau i luga o le faitauga faalua**

O le taimi nei, e le o i ai se mafuaaga compelling reason e mafai ai ona tatou vave oso i mea ia o aoga sinia, ona e le o i ai se pressure on us e move i le direction lea, ae o se natural progression lea i le future, aemaise lava le Year 11, 12 and 13, o le taimi lea ua specialize le tamaitiiti, e fetaui lelei lava ma le vaega lea i le taimi o i luma. A o le taimi nei, o lea e ave lava le faamuamua o lelei lava le faaleleia, faaleleia tatou faleaoga, faaleleia resources, faalelei faiaoga, ona tatou toe laalaa lea i isi vaega ia, aua o lea foi ua faasolo agai i ai Niu Sila i le vaega lea na saunoa i ai le sui usufono mamalu.

O tatou asiasi aoga, o lo o fai pea feutanaiga ma le Komisi e Pulea Galuega a le Malo mo a tatou asiasi aoga, ou te iloa a oo ina toe fafagu mai le vaega lea po o fea le mea o i ai, o le a matua sui ese lana job description, aua o lea na taua e sui usufono mamalu, o latou ia e faateia, aua e tatau foi la ona i ai se isi e alu atu e faatei le vaega lea. Faatei e latou faiaoga, ae tatau foi ona i ai se isi e alu atu e faatei le vaega lea. O mea ia o lea e tilotilo i ai. O le faatei la lea e tapena e le Matagaluega o Aoga, o le matua sui atoa lava o le job description a tagata ia, ina ia faigaluega mai lava i le 9 i le taeao e tau i le 5 i le afiafi. E le faapea na o le o e faatei faiaoga, ona o lea e fai a latou pisinisi. Lau Afioga i le Fofoga Fetalai, o nai mea feoloolo lea le tutua sa saunoa i ai sui usufono. Ma lou faaaloalo tele.

**FOFOGA FETALAI:** Malo saunoa i lau Afioga i le Minisita.

*Na faamaonia le lafo ma faitauina le Tulafono Tau Faaofi o Faiaoga 2015 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi o Faiaoga 2015 i le Komiti o Mataupu tau Aoga, Saienisi, Fesootaiga ma Faamatalaga Tekonolosi mo le iloiloina ma toe lipoti mai i le Fono Aoao i se Fonotaga o lumanaai.

**TULAFONO TAU FAAOFI O FEAGAIGA I SINEVA 2015**  
**- faitauga faalua**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Feagaiga i Sineva 2015 i lona faitauga faalua ma ou te fia tautala faamalamalama i ai.*

*Faaluaina e le Sui Palemia, Minisita mo Galuega tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioaga ma Agafesoottai.*

## **FOFOGA FETALAI: Tulai mai lau Afioga i le Palemia.**

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fatalai, i le taimi lenei ma le tele o le mau taua o lo o tutupu i vaega eseese o le lalolagi, e tutupu ai pea uiga faa-taua, e taua ai le toe faataua uma e sui o Malo Aufaatusi uiga taualoa mo le puipuia o i latou e aafia. E pei lava ona silafia, o uiga lava ia faalenatura, uiga faa-manu pe a oo i le taimi e tau ai ni itutaua se lua. E tutupu loa taua i ni itu taua se lua, o le tele lava o latou e faatinoa nei mea o taua, o taulelea. Ia, e vave lava ona oso le ita pe a vaai atu ua lavevea uso a soatau, ona nonofo loa lea o ituau ma fai uiga paaa. O a ia uiga paaa? O le tau atu lava i le fitafita a le isi ituau ua manua ua le toe mafaia se mea, ae tutui lava i le muli o le laau malosi ae sa le tatau ona faia se mea faapena. E oo lava i le oo atu o le itutaua i ni falepuipui o i ai, e ono faia foi i ai ni faiga matuia, aemaise lava itutaua ua manumalo, e ono faamanuaina foi ma latou ua avea ma pagota. E i ai foi la i mea faapenei tulaga e soona aafia atu ai ma tina ma tamaitai, aemaise la pe a sulufai atu tagata e fia laveai pei o le koluse mumu, o isi lava taimi ua faasoloatoa ai, ua tafana e itutau o la e lava e tutupu i le taimi lenei. E le i mamao atu foi na tatou matamata i le faaumatia o soifua o nisi o i latou aemaise o le au tusitala ma nisi foi o pagota i taua o lo o faia nei i le atu Arapi. O le ala lea ua matua faataua ai e Malo Aufaatusi Tulafono nei faava o Malo, lea la e taua o le Tulafono i Sineva ona o tulaga la nei pei ona ou taua, le feagaiga i Sineva. O se taumafaiga ina ia tau faaofi ai feagaiga i Sineva 2015, avea o nisi o feagaiga na osia i le masina o Aokuso i le 1949. O le tele lava o nei Tulafono na osia i lena taimi e le i fananau mai le toatele o i tatou i le Maota lenei, ma isi feagaiga faaopoopo o feagaiga o le 1977, o tulafono autu a le tatou atunu, na faapea foi ona faamalamalamaina.

O le aso 23 Aokuso 1984, na talia ma sainia ai e Samoa nei feagaiga, avea ai Samoa ma feagaiga auai, ma isi feagaiga faaopoopo e lua lena o le a silasila i le itulau 17 Schedule po o faamatalaga lena o lo o lisi atu ai feagaiga e ono lea e talanoa atu ai le upu tomua o le Tulafono Tau Faaofi. O feagaiga la ia e 4 ma isi feagaiga faaopoopo e 2, na amata faamamaluina mai tausaga ua tuanai, ma ua aloaia ma faamamaluina mai le aso 1 Ianuari 1962 lea na tatou tutoatasai ai, ae o vaega faaopoopo o feagaiga autu lena na amata faamamaluina mai le aso 23 Aokuso 1884.

O le faamoemoe o Feagaiga ma ana vaega faaopoopo Feagaiga autu, o le puipuia lea o i latou e le o aafia i le tuga o taua, tagata lautele, le aufaigaluega mo le soifua maloloina ma tagata galulue fesoasoani, ae faapea foi i latou ua le toe auai i tulaga o sauaga pe a fua i mea nei o taua pei o fitafita manunua i taua, fitafita ua mamai, i latou ua lavevea i vaatuia ma avea ai ma pagota o taua, vaa foi nei ua tatui pulu oo e nisi foi vaamaulu ma manunua ai. O lo o aiaia ai foi i le Tulafono lenei le puipuiga o nisi o tagavai ma mea taitasi ua puipuia e pei o faailoga ma tagavai a le koluse momu lea ua toe teuteu ai ina ia atili faamamalu ma faaaloaia ai le tulafono ma galuega foi o lo o nafa ma le koluse momu i Samoa, le Tulafono o le 1963. O le feagaiga ua taua o le feagaiga i Sineva. O le fesili, why Geneva? Aisea ua taua ai ma oo le feagaiga i Sineva ma sainia i Sineva? Lau Afioga i le Fofoga Fatalai, o Sineva, o le laumua lea o Suiselani, lea e faatu ai foi nisi ofisa o le Malo Aufaatusi, e i ai ofisa o lo o nafa ma fefaatauaiga a le lalolagi, tulafono e faatonutonu ai fefaatauaiga i va o Malo. O Sineva foi e usu ai lava i tausaga

uma fonotaga a Minisita o lo o gafa ma soifua maloloina o atunuuma o le lalolagi. O Suiselani o le latou laumua lea o Sineva o se atunuututoatasi mai lava ia e le fia auai i se mea e neutral, ia o le ala foi lena e matua fiafia tele ai Hitila i ituaiga atunuufaapea, e le ave aea le neutrality po o le tutoatasi na taofia ai le lola a Hitila, ma o le uiga tutoatasi lava lea o lenei atunuue mai lava i le amataga o lea e mafua ai ona taua le nofoia e nisi o ofisa tetele o le Malo Aufaatasi. E pei lava ona silafia i le itu i Sisifo o Austria sauté o Siamani, ia ma e faapena foi i le itu i sauté o Farani ma isi malo, Italia i le itu i sauté. O le atunuula nei sa fai ma tatui e malo nei, o le nofo nofo lava o lea osofai, ae e faapena le latou tutoatasi e le fia toilalo. E i ai la leí ..pei o le mafuaaga lava na e oo mai lava i nei onapo, o le ala foi lena e faataua ai e Malo Aufaatasi ia le malo lenei. Ona tulai mai ai lea o le isi latou taitai e igoa ia Viliamu, o ia lena sa fai le faiga foi lele o le fai o gorilla warfare e tutuli ese ai tagata ua latou omai e nofoia lo latou malo, na oo lava ina pue ai e malo foi na pulea i lona taimi e fia afe tausaga talu ai, ona aumai loa lea loka ae faafalepuipui faatasi ma lona atalii, e faapea lava e i ai lava uiga faapena i le vafealoai i le va o taitai, ia ona folafola loa lea e le malo lea ua faapagotaina, o le a faasaoloto oe ma lou atalii pe a e faatinua le aiaiga lenei, o le a ave lou atalii e saisai i le laau e 200 iata ona tuu ai lea i luga ma le apu, ona e tago lea e fana i le u, a tu le a i le apu, ua saoloto oe ma lou atalii, a misi le a e le tu i le apu, e oti oe ma lou atalii. O lona uiga, a sese loa pe sese foi i lalo, ia ua tu tonu i le ulu o lona atalii, aua e tietie le apu i luga o le ulu o lona atalii. Ia ona tatala loa lea o le toeaina sau, faata, faata ia le a , malolo, manavanava, toe faata, faata, malolo, manavanava, ia toe faata loa, ia lele atu lava le a , ma lo ta vaai atu, ua taape le apu, ia ona maua loa lea o lona saolotoga. O le talaaga la lena o matou nei e o e fana le a , a e tago loa i le a ma e uu ae au usfanafana, e te manatua lava le tala lea, a, i le tulaga o le matautia foi o le talaaga o lenei malo.

O le uiga o le tala lau Afioga, po o le a le mea ua taua ai le Tulafono lenei o le Feagaiga i Sineva, ona o le taua o le naunau o le tagata lenei i le saolotoga, saoloto tagata aua ne i afaina i mea nei tau taua, tagata ua mafatia aemaise o le Koluse Mumu o se Faalapotopotoga o lo o taulamua i le laveaiina o i latou o mafatia. O lena foi la o lo o avatu ai ma aiaiga o le Koluse Mumu ma le soona faaaogaina o le latou tagavai, o lo o i ai aiaiga faapitoa, e te le nofonofo lava e alu faaaoga le tagavai o le Koluse Mumu o lo o avatu ai i i ia aiaiga faapitoa mo le faaaogaina foi ma le faatauaina o le galuega foi o lo o fai e lenei foi Faalapotopotoga taua o lo o taua ai foi lo tatou atunuuna ona o lo o tu malosi i tulaga o le fesoasoani i taimi e tutupu mai ai taua, a o le agaga atoa lena lau Afioga o le Tulafono, o le tatou lagolago atu i gaoioiga faava o malo, ina ia taofia i latou o vatau ma le soona fai faa-meaola, se i tulou le Maota nei, o i latou o lo o o atu e fesoasoani e fai le galuega laveai, e le gata i lena a o i latou foi ua le o toe taua foi o ni tagata o toe aafia i le tulaga o taua o ni manuaga, ia fai le faiga faatamalii mo i latou ae aua le faia i ai uiga ia e masani ai mo itu taua e lua o le soona fai le mafaufau, leai ma se alofa ona o tulaga lava na o mea tau taua, o le faatinoga o le feitagai i va o atunuue lua.

Lau Afioga i le Fofoga Fetalai, o le agaga atoa lava lena o le Tulafono Tau Faaofi.

**FOFOGA FETALAI:** Malo faafetai i lau Afioga i le Palemia. Ia o le taimi foi lenei o tatou felafolafoaiga, o tulaga masani, e agai sao i tatou Tulafono e

avea ai manatu ma lagona e toe timata ai pe lagolago ma fautua le tatou Tulafono e pei ona saunoa faamalamalama i ai le Taitai o le Malo.

Tulai mai le sui usufono mo Faleata Sasae.

**Tofa AVEAU TUALA LEPALE NIKO PALAMO (Faleata Sasae):** Faafetai i lau Afioga i le Fofoga Fetalai, faafetai foi i le Afioga i le Palemia po o le Afioga foi i le Minisita mo le Tulafono, e le umi foi se manatu i le Tulafono Tau Faaofi. E pau lava le vaega o le Tulafono Tau Faaofi ou te fia malamalamala ai lau Afioga i le Minisita, o le vaega lea e fa o le Feagaiga, o le Feagaiga lea o lea e puipuia ai tagata lautele. O lau fesili faamolemole pei ona faafaigofie lau fesili, e le o lenei Tulafono o le a taga mai ai tagata foi ia sulufai mai i inei i Samoa, a o i ai se faamoemoe o le Malo aua pei ona silafia o lea e fai i Ausetalia le vaega lea e ave i Nauru ma Papua Niu Kini, po o le Tulafono lea e ono tupu ai se mea faapea, o le oo mai o tagata sulufai i inei i le tatou atunu? Ma le faaaloalo lava.

**FOFOGA FETALAI:** Ia lau Afioga i le Palemia.

**Susuga Hon Tuilaepa Fatialoa Luplesoliai Aiono Neioti Sailele Malielegaoi:** Lau Afioga i le Fofoga Fetalai, o le fesili foi lena sa tuu mai e isi pe tatau ona tatou faatagaina ia mea i Samoa nei? O tagata o la e fia o i Ausetalia e fia nonofo ai, e le o fia omai i le Pasefika. A o le tulaga foi o le va lelei o Ausetalia ma Papua Niu Kini ma Nauru, o lea ua fai ai ni faiga faapena. Ia o le a lava le mea o le a omai mamao ai i Samoa? O le matua mamao tele. O le mea e tatau ona fai i ituaiga mea faapea, o la e fia afe ma afe atumotu ia motu foi o Ausetalia latou sa tatau ona ave i ai, ia ai lava ni a latou va lelei motu ia tulata, e le o fia omai ni tagata i Samoa nei o la e fia o i Ausetalia. Ia o le a omai i inei e le maua ai se tulaga e ola lelei ai o la e tele le tamaoaiga i ina? E le i aumaia la se fesili faapena pe fia omai i inei, aua e le talia foi e lo tatou Malo. O le tali puupuu atu lena lau Afioga i le Fofoga Fetalai.

**FOFOGA FETALAI:** Ia o lea e matauina e le o toe i ai se isi sui usufono e fia saunoa, e manatu foi ua malamalamala lelei leí í

**Afioga AFOAFOUVALE JOHN MOORS (Palauli):** Lau Afioga i leí í

**FOFOGA FETALAI:** Ia o le a avatu pea le avanoa mulimuli lea, tulai mai le sui usufono mo Palauli.

**Afioga AFOAFOUVALE JOHN MOORS:** Faafetai mo le avanoa, leai e le umi foi se faamatalaga, e leai foi se manatu o le a tulai e talanoaina le Tulafono, ae pau le mea e fia tuuina atu o le agaga faafetai i le Malo i le Afioga i le Palemia ma le Kabeneta, aemaise foi le ofisa sa faapea ona gafa ma le tuufatasia o lenei Tulafono Tau Faaofi. E lagona lava le agaga faafetai ona ua leva lava ona i ai le Tulafono Tau Faaofi lenei, a o lea ua faapena ona taumafai lo tatou atunu e auai faatasi ma malo ia o lo o gafa ma lenei Tulafono pe sa faatinoina le Tulafono, e avea foi lo tatou atunu ma se isi tauau e lagolago i le Tulafono lenei aua o se Tulafono e taua aua le saogalemu o tagatanuu o atunu taitasi. O se tulaga lea ua ala ai ona tulai atu

e momoli ai le agaga faafetai. O lenei Tulafono Tau Faaofi e le o se Tulafono fou, o le Tulafono foi lenei na amata ona ou malamalama i ai i le 1983 na ou malamalama ai i le Tulafono lenei ona sa faapena ona faatinoina foi i ni mea sa aafia ai foi lou tagata. Ia o le talanoa atu lea ma lou agaga faaaloalo lava, manua le Fono.

**FOFOGA FETALAI:** Malo faafetai.

**Afioga TOEOLESULUSULU CEDRIC POSE SALESA SCHUSTER**  
**(Aana Alofi Nu. 3):** Lau Afioga i le Fofoga Fetalai í

**FOFOGA FETALAI:** Oi, ia se i toe tulai mai la le isi fitafita lea. Ia sa tele autau lea sa i ai le sui usufono mo Aana Alofi Nu. 3. Tulai mai le sui usufono mamalu.

**Afioga TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai, e puupuu lava se manatu, ona e talitonu o le taua o lenei Tulafono mo i inei i Samoa, ae ona e tele foi avanoa o lo o faapea ona auai atu nisi o alo ma fanau a Samoa i Peace Keeping Program tai pei o REMSI i Solomona ia ma nisi o atunu o le Pasefika, ua vaaia foi nisi o fitafita o le malo o Fiti lea na aafia foi i tulaga faapea. E pau la le faafesili o le taua foi lea mo Samoa, ae po o i ai se puipuiga faapea i a tatou fitafita o lo o faapea aemaise foi o i latou o le tatou atunu o lo o tuu vaa atu ma faatasi i nei polokalame i nisi o atunu, faafetai.

**Tofa Lealailepule Rimoni Aiafi:** O le fautuaga i lau Afioga i le Palemia pe a fuafua se tatou Army, ia vaai Toeolesulusulu e avatu e taitaia, e pau lea o le tagata sa fai lana Army, ma le faaaloalo lava.

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga i le Fofoga Fetalai, e le o le Toeolesulusulu lea, a o le isi Toeolesulusulu na faasalalau i le pepa na ou fai tau ai, faatali lava oe Tuilaepa a foi mai loa au tama la e ave i o i Arapi e train ai ua ta pomu uma le atunu. Ia ae le o Toeolesulusulu la lea na faia leí .

Lau Afioga i le Fofoga Fetalai, o le tulaga lea e saunoa mai ai i le tulaga aafia, e aafia ai foi ma a tatou tamafanau e tatau ona latou aloaia lelei le Tulafono lenei, aua pe fai i fafo, pe fai foi e se isi ona sau ai lea faa-Turisi te i ua sue mai ua nofomau i inei, ae la sa taitaiau i o i taua foi ia e fai mai i o i Turkey, a, o le Tulafono lea o lena o lo o aiaia ai pe fai i o, ae solitulafono lava i totonu o eelele o Samoa, o lona uiga e maua loa toe saisai lelei lava ae ave i o e fai ai le latou faamasinoga e fai ai le sala ia pe faatino lava foi i Samoa nei, ona i ai tulaga foi ia faava o Malo e ono moomia ai le faia o faamasinoga faapena International Court, e faapena foi la aua e i ai lava feutagaiga i le va o malo, o lea foi na tupu ai le faalavelave i le isi foi a tatou tama i o i Solomona, ia ona ou alu lea ma feutagai ma le Palemia, malie, a fai le faamasinoga i o, o le a le iuga pe falepuipui, ona malie lea e aumai le tatou leoleo e falepuipui i inei ma tuli ai lana sala, ona o le tulaga lenei o le puipuiga lena, ae magamaga ae avatu i totonu e loka ai i le anoano o le falepuipui la e loka ai Solomona ma tilotilo ifo, o le alii lea na aafia i le lokaga atu o latou, ia e toe sue atu ua papakiu e le vaega lena i totonu o le

falepuipui. O le ala lena o lea na ala ai ona fai le faiga faapena mo le puipuiga, ia na lele lelei ai lava i o le tatou komesina o leoleo ia fai le faamasinoga ma maua lona iuga e falepuipui, ma felelei faatasi mai lava i inei ma aumai loa ave i Tafaigata e tuli ai lona lua tausaga.

Lau Afioga i le Fofoga Fetalai, o le tali atu lena e tusa ma le fesili.

*Na faamaonia le lafo ma faitauina le Tulafono Tau Faaofi o Feagaiga i Sineva 2015 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o Mataupu tau le Va i Fafo mo le iloiloina ma toe lipoti mai i le Fono Aoao i se Fonotaga o lumanai.

### **TULAFONO TAU FAAOFI O VAI PULEA TUMAOTI 2015** – faitauga faalua

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Vai Pulea Tumaoti 2015 i lona faitauga faalua ma ou te fia tautala faamalamalama i ai.*

*Faaluaina e le Sui Palemia ma le Minisita mo Tina ma Tamaitai, Atinae Nuu ma Afioaga ma Agafesootai.*

**FOFOGA FETALAI:** E faamalulu atu ona o le tapenaina o le lafo ona sa tatou le auai ma le Afioga i le Minisita o Tina ma Tamaitai, Atinae o Nuu ma Afioaga ma Agafesootai, ae ua maua atu o lea ua afio mai, e faamalulu atu ai i lau Afioga i le Palemia o le a lou finagalo?

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** E lelei ona ou faaauau.

**FOFOGA FETALAI:** Ia o le a faapena ona fai. Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, e lua lava auala o lo o maua ai e le tatou atunu le vai taumafa. O le tulaga foi lea o lo o avatu ai le vai e pulea e le tatou Faalapotopotoga lea o le Vai, le Water Authority le pulega, ma vai tumaoti i afioaga i tua, mai lava i le amataga sa pulea lava e latou. E i ai la le mea ua tupu, o le tele o nei vai sa tai lava i paipa foi nei o calvenice e i ai lo matou nuu o Aufaga sa i ai le latou vai faapena, pei e mumusu e aumai i le Malo ona e i ai le tulaga foi lele e tupu ae pea le manatu o le vai na pau mai le lagi o lea le mea o le a ave ai fua i le Malo ma matou tigaina ai e totogi, o le vai lenei o le vai a le matou nuu. O ituaiga mafaufauga na na sau ai a i le Malo i le vaitaimi o le Tutoatasi, o le mea ua tupu, ua sau sau nei, ua le o toe o i lalo paipa ma ua faasolo ina pala

paipa uamea nei, oo loa ina toe suia e omai ua le pei o tau sa i ai i aso la a ua oo i luga i le kuata miliona ua taugata, ma faapena ai lava ona faasolosolo ma agai mai Faalapotopotoga po o afioaga nei i le Malo e maua atu ai se fesoasoani. O le background lea na ala ai ona faatu alaoaia loa le vaega lea o le Vai Tumaoti ma tuuina atu i le Matagaluega o Tina ma Tamaitai, Atinae o Nuu ma Afioaga ma Agafesootai aemaise o Faalapotopotoga i nei onapo ua fai foi fesootaiga ma le tatou Malo e tapa ai fesoasoani e aumai. Mo le silafia o fesoasoani tetele ia e faitau selau ma selau miliona e aumai i le Malo o Europa tuufaatasi, o le tele lava o nei fesoasoani e aumai ma goto uma lava i le Vai mo le faatinoina o vai taumafa lea e i ai tane tetele i inei i ai ma tane tetele i Savaii ma ua faapena foi ona faasolosolo atu i Faalapotopotoga Tumaoti i tua. I aso muamua sa le mafai ona tatala mai ni fesoasoani e aumai i Faalapotopotoga mai fafo e ave i Faalapotopotoga Tumaoti, ona sa i ai lava le tulaga foi lele e le talitonuina e Malo o le vaega lenei Tumaoti, aua o mea e tutupu i Samoa, tutupu foi i Aferika ma tutupu i Asia, ona o le toatele o Faalapotopotoga Tumaoti e tetele mai i le Malo i le tele o mea. E pei o le tulaga lena sa i ai le ituaiga va fesoottai lea o Malo ma Faalapotopotoga i fafo ma Faalapotopotoga Tumaoti i totonu o atunu, peitai ane ua suia atoa le agaga lena, suia atoa i luga o le tulaga e tatau ona galue faatasi le Malo ma Faalapotopotoga Tumaoti, o le isi lea vaega tele o le atunu e fesoasoani mai ma aumai lo latou tauau e lagolago i le atinae aua o le atinae o Samoa e manuia ai tagata uma o le atunu, e aofia ai ma i latou o lo o i totonu o Faalapotopotoga Tumaoti. O le tulaga lena o lo o faavae ai fesoasoani e aumai fafo ma faapena foi ona toe teuteu fuafuaga a le tatou Malo.

O le Tulafono Tau Faaofi lenei, o lo o taumafai ina ia amanaia ma aloaia lelei faaletulafono Vai Tumaoti e avea ai o se auauanga e tuuina atu ai le suavai i totonu o afioaga. Ua aofia ai i totonu o Vai Tumaoti vai e pulea e nuu ma afioaga lea o lo o tua i ai nuu ma afioaga mo le suavai, ma faapea foi ona faamauina e le Faalapotopotoga o polokalame o le suavai tumaoti o lo o faafoe e le Mataglauega o Tina ma Tamaitai, Atinae o Nuu ma Afioaga ma Agafesootai. O Vai Tumaoti la e pei ona ou taumafai e otooto atu i le Tulafono Tau Faaofi, e lua i ai auauanga i totonu o Samoa o lo o tuuina atu le suavai. O le isi o le Pulega o le Suavai po o le Samoa Water Authority. O Vai Tumaoti o se tasi lea o vaega auai e i ai aia o lo o aafia i le vaega o le suavai ma ona tulaga tumama lea ua faailoa gofie mai, o se vaega ua tuuina i ai le faamuamua a le Malo i lalo o fuafuaga faataatitia mo le atinae lautele o Samoa. O le sini aoao o lenei vaega e pei ona faatulaga atu i le tatou polokalame o le Vai mo le Ola, o fuafuaga o le Vaega o le Suavai ma ona tulaga tumama i le 2012 seia oo i le 2016, o le faamautuina lea o le faatuatuaina e mama vai e gafatia ona maua, ma le tulaga mama e taua i le ata faataatia o le faafoega o le tuufaatasiga o le Punaoa Tau Suavai mo tagata uma o Samoa. E faatumau ai le tulaga lelei o le soifua maloloina ma faaititia ai le tulaga mativa. O le a faamautinoia ai foi i lenei Tulafono Tau Faaofi, le i ai o se sao o Vai Tumaoti i le siitia ma le faamautinoia o le avanoa e faaleleia ai le suavai mo tagata i nuu i tua, latou te maua ai le suavai e lelei atoatoa, mama ma maua gofie, e puipuia lelei mai i siama e maua i le suavai e ala i le tuuina atu i auala aupito sili ona taua i le tulaga tumama.

Lau Afioaga i le Fofoga Fetalai, o le aotelega lena o lenei Tulafono Tau Faaofi ina ia aloaia faaletulafono vai taumafa o lo o pulea e nuu ma auala atu ai foi fesoasoani mai le tatou Malo ina ia faaaauau pea. O le faatuina ma le

aafoeina o atinae tau vai taumafa o lo o ua tuu atoa i le fono a nuu latou te pulea faaletulafono le tofia aloaia lea o se Komiti e fai ma a latou galuega le vaaiga o le vai, tuuina atu ai ma le paaoa latou te faatulagaina ai le totogi e tatau ona totogi e aiga taitasi, aiaia ai ma tulaga o faasalaga e mafai ona faasala ai le aiga latou te le tuu-au-lafo i le tulafono ua faataoto mo le puipuiga o le suavai. O lona uiga o lea ua tele le galuega ua faamatuu atu ai i le pulega a alii ma faipule lea ua i ai le Tulafono e tua i ai. O lona uiga a faasala atu loa e le Komiti i lalo o le pulega mamalu a alii ma faipule ae tetee se aiga ae sau aumai i le Tulafono, matou te le totogia lena pili. O lea ua i ai le Tulafono e i ai nuu i tagata faafiauli e soona faaaoga faamaumau le suavai aemaise lava le mea lea e masani ai i tatou i nuu i tua. E tiga lava ona leaga le gutu o le paipa ae faapi ai lava ae alu atu le asiasiga ae le faia lava, o le mea lena o le a sua atoa e le Tulafono. O lea ua i ai le malosiaga ua mafai ona tuu atu i le Komiti o vai o nuu e faatino ai o latou tiute i faasalaga o i latou e le faalogo ma le usitaia poloaiga mo le puipuiga o le suavai. E aofia ai ma gaoioiga uma po o le aofia ai i le totolina o laau o lo o ola e latalata i le mea e sau ai le puna. O le isi lena mea o lo o tupu, o isi nuu sa faalagolago i le puna lea sa sau ai le latou suavai ae sau le savali ua pe le puna, ae sue atu ua alu ai maumaga i luga, ua t fana ma le vao i fanavao. Ua tatau ona faasa uma na mea ia aua ne i toe faia i tafatafa o le vai o lo o taumamafa ai tagata o le nuu, lea la ua avanoa uma ai i laloí e oo foi i le tulaga o aiaiga masani i le uunaia o fono, o lea ua faataoto uma lava i lalo i i, ma le tofiga, e 11 sui o le komiti e tofia e nuu ma sosolo loa a latou fonotaga i tulaga masani. E tapena lelei faaiuga tusitusia i le taimi e tapa mai ai e le nuu le Komiti, aumai a outou iuga ma ia maioio lelei faamatalaga e oo lava i teugatupe a maua loa tupe ma ave e teu i faletupe, aua e le natia, o le tele ia o faalavelave e tutupu mai i le lotea o tupe e komiti i tua i le mea lava lenei o le le faamaoni. O lea la ua faataoto uma atu lava i totonu i i aiaiga e aiaia ai tulaga o Faalapotopotoga uma, lea ua alu atu i totonu o le Tulafono Tau Faaofi, ua atili faamalosia ai komiti ma faapea foi ona tofia e le fono mamalu a alii ma faipule, faapea foi ma le paaoa o lo o i ai i le fono a alii ma faipule e faasala ai i latou, latou te faia ai ni uiga e faatamaia ai le tulaga e tatau ona i ai le vai taumafa mo le afioaga.

Lau Afioga i le Fofoga Fetalai, o le Tulafono Tau Faaofi atoa lena ua tuuina atu mo le finagalo o le tatou Palestina.

## SUI FOFOGA FETALAI I LE NOFOA

**SUI FOFOGA FETALAI:** Faafetai i le saunoaga faamalamalama a lau Afioga i le Palestina. Ou te talitonu foi o le tasi lenei saunoaga ua malamalamama uma ai lenei Maota, e i ai foi le manatu e le toe tele ni felafolafoaiga i luga o lenei Tulafono Tau Faaofi, ua oo lava i le pulega a alii ma faipule ma o latou tiute tauave ua uma ona faamalamalama e le Afioga i le Palestina.

O le a tatala atu pea le avanoa. Tulai mai le sui usufono mo Siumu.

**Tofa Hon TUUU ANASII LEOTA (Siumu):** Faafetai i lau Afioga i le Fofoga Fetalai mo le avanoa, masalo o lea ua manino ma malamalamama le saunoaga a le Palestina, ou te talitonu o le a le toatele foi nisi e toe faaali ni manatu. O lou tulai atu e fia faaali lau faafetai tele i le Afioga i le Minisita e

ou le Tulafono Tau Faaofi, malo faafetai, malo le galue, malo le faautautaga loloto ma le tofa poto. Malo i le Matagaluega, faafetai mo galuega lelei uma, faafetai o lea ua aumai lenei Tulafono Tau Faaofi ma ua faataoto mai ai alafua aua galuega o vai tumaoti a Itumalo.

O lou tulai atu na ona faamanatu atu i le Afioga i le Minisita le vai o Saaga Siumu lea na saunoa i ai i le Fonotaga ua maea atu, o le vai lea o le a sosoo pea uma galuega a le Matagaluega sa fai. O lea o le a uma atu lava lenei tausaga e leai se mea o faia, ae a fai i le aso o le Faiga Palota faafetai. Ia manua le Fono.

**SUI FOFOGA FETALAI:** Tatou te le o talanoaina se vai o Saaga Siumu, o lea tatou te talanoaina le Tulafono Tau Faaofi o Vai Pulea Tumaoti. O le mataupu lea e te talanoa ai oe i le Afioga i le Minisita i tua ae le faia i luma i i, ae faafetai o lea ua faaali lou finagalo o lea foi ua faafogaga atu le Minisita. Faafetai, tulai mai se tasi o sui usufono mo Falealili.

**Tofa TUSA MISI TUPUOLA (Falealili):** Lau Afioga i le Fofoga Fetalai, ma le faaaloalo ou te tulai atu foi e avatu le faafetai tele a lenei Itumalo i lenei Tulafono Tau Faaofi taua ua taoto i totonu o le Maota. O nai mataupu e fia malamalamama ai lenei sui usufono, e fai o le taua o lenei Tulafono Tau Faaofi i le va feagai ai o le Matagaluega ma afioaga taitasi i le vai taumafa lea ua taua o le Vai Tumaoti, a o le va feagai ai foi o le Pulega o le Suavai ma afioaga. O le mea ua tulai mai lau Afioga ma le mamalu o le Palemene, pei o le a tau feteenai mea ia e lua, ua le gata ona o le la ua faaaoga e nisi vai tumaoti o afioaga, a o la foi ua faaaoga e nisi o le afioaga le mita a le Faalapotopotoga o le Suavai. Ona maua ai lea o le isi mea lea ua tulai mai nei ua ala ai lava le manatu o afioaga taitasi e ola fua i le vai tumaoti mai le amataga seia oo mai i le aso. O le ala foi lena o le tele o pili tuua ma ua oo ai lava ina tipi a latou vai taumafa, tulou le Maota, ona o mea nei ua tulai mai i tei ua maua ai se feteenaiga i le va o le SWA ma le Matagaluega, ae taua tele i le finagalo o le Matagaluega ma lenei Tulafono Tau Faaofi, ina ia maua pea le faamamaavega i afioaga taitasi i so o se Itumalo aemaise lava o le suavai. O le suavai ua mautinoa lelei ia mama ma ia saogalemu mo le fofoga taumafa o le atunu. O lea foi ua avatu a latou faasilasilaga i tua o le vai o le SWA e mama, ua uma ona faamamaina i vailaau e tatau ai. O le tele o nisi afioaga ma nisi o faamatalaga e maua pea, o le vai tumaoti e i ai le taimi e palapala ai. O lona uiga o mea ia e ao ona silasila totoa i ai le Matagaluega ma le Malo po o a ni auala e faaitiitia ai nei aafiaga ina ia aua ne i maua ai ni gasegaseí

**SUI FOFOGA FETALAI:** Malie le sui usufono o lo o saunoa ona o lea e tulai mai le faauilavea a le Afioga i le Minisita o le a tuu atu i ai le avanoa ona toe foi atu lea i lau Afioga.

Tulai mai le Minisita mo Tina ma Tamaitai, Atinae o Nuu ma Afioaga ma Agafesootai.

**Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioaga ma Agafesootai):** Faafetai i lau Afioga i le Fofoga Fetalai mo le avanoa ua tuuina mai. E manino ma malamalamama le folasaga a le Afioga i le Palemia, ou te faafetai foi i le Palemia aua o ia lava o le Sui Minisita i le toesea o au nei, ma te le i fesootai

ao lea ua ó o le lauga foi lea na tuu ou te faia, ioe, e tutusa lelei lava le faamalamalamaina o le Tulafono Tau Faaofi e le Afioga i le Palemia, o le mea foi lena na tau manatu i ai, e ui o lea ua saunoa le Palemia ma ua malamalamala. O le saunoaga a le sui usufono e le saga tonu, ona o lenei le itu e leai ma se faaaliga ua oo atu ia te au mai le Matagaluega po o le Faalapotopotoga o Suavai a le tatou Malo i ni feteenaiga faapea. O luga foi o lipoti a le Matagaluega i afioaga o lo o taumamafa i le vai tumaoti, ona o vai o lo o tapena i lalo o le pulega a alii ma faipule e pei ona saunoa le Afioga i le Palemia, e matua mautu ma lelei. Ua uma foi ona fai le fesootaiga a le Vai Tumaoti e ala i le Komiti o lo o faagaoioina le tulaga o le lesitala ma le faamauna ma le Matagaluega ma au nei, i le tulaga foi lea o le aafia o le Samoa Water Authority ma le Matagaluega o le Soifua Maloloina i le test ina o le suavai, ona o le naunautaiga lea o le tatou Malo ina ia oo mai i le tausaga lenei 2015 ua taumamafa uma Samoa i le suavai mama. O le vai e matua talitonu ua uma ona faamamaina ma maua ai le atoatoa o le soifua maloloina o le atunu. E leai lava se mea o tulai mai ia se eseesege, o le mea la lea ina ne it e i ua toe saunoa i ai se sui usufono pe a faapea o tulai mai. E leai ni lipoti ua oo atu i le Matagaluega ma au nei e faapea o i ai se tulaga faapea, o lo o atoatoa le galulue faatasi o le Samoa Water Authority i lana vaega foi lea e silasila i le vai mama taumafa mo le atunu, e faapena foi le matou Matagaluega i le galulue faatasi ma le komiti o Vai Tumaoti o afioaga ma alaalaafaga o lo o i ai vai tumaoti, e afua i o latou komiti ina ia mautinoa o masina uma e test ai le latou vai. Ona tapa loa lea o se fesoasoani mai le Mataglauega mo le Soifua Maloloina, ma le Faalapotopotoga o le Suavai lea a le Malo. Ona pau lava le eseesege e tele le toomaga o vai tumaoti o lo o tapena e le Malo e ala ai ona fai le Tulafono Tau Faaofi lenei, i le tulaga o le suavai o lo o faasoa atu e le Malo i lalo o le Samoa Water Authority. E matua eseese lava le tulaga o tupe e totogi e afioaga ma nuu i lalo o vai tumaoti aua o isi foi afioaga e le na o le tasi. O Fagaloa e fa nuu la e i ai i totonu o le suavai o lo o tapena ai nei, o le tasi lena galuega o lo o alu ai nei ma le afioaga o Nuusuatia. O le mea la lea e tatau ona fesili muamua ina ia malamalamala ma o atu i le Matagaluega e iloa ai le sagatonu o le auaunaga o lo o fai. E ese le taua o le poloketi lenei a le Malo. O le 2010 na faatu ai le faiga faavae a le Malo a o lea ua fai le Tulafono Tau Faaofi i le 2015, o i ina e atagia ai o faamaumauga ma le tele o faamatalaga o lo o maua mai i afioaga o lo o fiafia ma faamalieina i le auaunaga o le suavai fou lenei e tau o le suavai tumaoti e ala i le pulega a alii ma faipule e pei ona saunoa le Afioga i le Palemia. Ae tele le eseesege i le tulaga o le totogi a o lo o tutusa le faamanuiaga i le suavai mama ma le suavai e talafeagai ma le soifua maloloina. Ua ala ona faaumiumi ona ua atugalu i le faaupuga lea e faapea o le vai palapala, ua le o toe taumamafa le tatou atunu i lena ituaga vai.

Ma le faaaloalo lava.

**FOFOGA FETALAI:** Malie, se i tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le vaega lea o mita lea e atagia mai i le fesili. E taua le itu lea o mita ina ia toe malamalamala lelei, o le isi galuega tele i le mitaina o le vai ona o le faatonutonu o le faaaogaina tatau

o le vai aemaise lava vai tumaoti ma vai o lo o avatu e le SWA. A le pulea lelei le faaaogaina o le suavai, e uma ane ua leai se vai i le mea lea o le soona faaaoga le pulea lelei e i latou e tulata i le vai, ae oo atu i le faatau siusiuga ua tau leai se vai po o le iu lava ina matua motusia atoa le vai i le tulaga lea o le soona faaaoga faale-tatau. O le ala lea e taua ai le mita o vai ina ia taofiofia ai le faaalu le aoga o le suavai, aua a tuusaoloto le vai e alu o le mea lena e tupu, e soona fai lava e i latou e lalata i le puna o le vai ae oti ai latou i le faatausiusiuga. O lea e atagia nei o le tele o isi vai aemaise o Savaii, ua le maua ni vai e isi afioaga e mamao atu ona o lea e soona fai e le amataga a o lea e tatee i le totogiina o le mita. O le aoga lena o le totogiina o le mita e tau taofiofi ai, aua a leai se mea e taofiofi ai, o le iuga lena e uma ane ua leai se suavai ma maumau ai lenei galuega tele sa fai ona o le agaga lava lea e faapea o le vai e sau mai lug , a o le vai foi e sau mai lug e alu alu lava uma. Aua e le gata o le vai e sau i i, a o lo o i ai foi le vai e goto i lalo i le palapala ma alu ai i le puna o le sami.

Lau Afioga i le Fofoga Fetalai, o le tulaga lena, ina nei te i ua faitau sese e tagata le taua o le faaaoga o pili i le mita po o pili foi o vai o nuu, e tasi lava le tulaga aoga o le toe faaleleia o le vai i seleni nei. Aua a tuu fau loa le faaaogaina o le mea lena e oo i ai, e uma ane ua le taunu le faamoemoe na faia ai le vai ina ia taumamafa uma ai nuu uma o lo o agai tonu atu ai le suavai.

**FOFOGA FETALAI:** Malo faafetai, o le a tuu atu pea le avanoa i le Minisita mo Galuega, Felauaiga ma Atinae Eseese.

**Afioga Hon MANUALESAGALALA MATI TUIGAMALA ENOKATI POSALA (Minisita mo Galuega, Felauaiga ma Atinae Eseese):** Faafetai mo le avanoa, ona pau le tulaga e pei ona laga e le sui usufono o le feteenaiga. E leai se tulaga faapea o tulai mai i le Vai Tumaoti, o lo o manino lava alaalafaga o lo o lesitala i lalo o le Vai Tumaoti, e faapea foi e o lo o fesootai i le Pulega o le Suavai ma la latou auaunaga. O le taua o lenei polokalame o lou fesoasoani ai aua e le gafatia e le Pulega o le Suavai le galuega o lo o faatino. O le sao tele lea ua mafai ona faatino i lalo o le Vai Tumaoti e galulue faatasi ai ma le pulega a alii ma faipule ua mafai ai ona vave faasopolia le vai i totonu o le atunu. O le eseesege foi o tau leaga o lalo lava o le Pulega o le Suavai e faatino uma e i latou le tulaga i le vaaiga o faatanoa ma mea uma ia lelei, a o le Vai Tumaoti e o atu le Matagaluega e vaa ae faalagolago lava i le pulega a alii ma faipule. O i latou e vaaia lelei ma ia mafai ona malupuipuia vaega uma nei, o le eseesege lena o le Tulafono.

O le isi mea ua saunoa le Afioga i le Palemia i le agaga o le mita o le taumafai foi lele ó leaga o le mea o lo o tupu i Savaii, o le faamoemoega o lo o i ai Savaii e tasi lava le vaitafe lae faaaogaina i le alu atu i Palauli e oo i Puapua na e ola uma ai le au Faasaleleaga. Ua amata ona le toe au i Puapua a ua gata mai i Tuasivi, ae faalagolago i le pamu vai lea e pamu mai lalo, o le taugata ia, e taugata le pamuina mai o le vai mai lalo o le manava o le eleele. O le isi foi popolega o le utiuti e iu ina alu alu uma le vai lea. E pei o le fuafuaga lea ina ia mafai ona galulue faatasi ma afioaga e maua mai ai le fesoasoani o vai nei ina ia mafai ona faasopolia lo tatou motu i Salafai ae leai se feteenaiga o i ai lau Afioga i le Fofoga Fetalai.

**FOFOGA FETALAI:** E te fia saunoa i le Tulafono Tau Faaofi po o se mea e fiaí ?

**Afioga Hon Leaupepe Toleafoa Apulu Faafisi (Aana Alofi Nu. 1):** O le mea e fia faamalamalama lau Afioga i le Fofoga Fatalai.

**FOFOGA FETALAI:** Ia se i tulai mai le sui usufono mamalu.

**Afioga Hon Leaupepe Toleafoa Apulu Faafisi:** Faafetai mo le avanoa lau Afioga i le Fofoga Fatalai, ua ou tulai atu ma le faaaloalo e tau faamanino i le faafogfa tapuai mai o si ou Itumalo o Fasitoo-uta ma Faleasiu, ina ne i faitau eseese leaga o lo o manino i totonu o le Palestene a o le faitau mai a tua. Ina ne i faapea o le vai o lo o vili i Faleasiu e lavea i lalo o le pulega o vai tumaoti, ae leai o le tatou vai masalo e le o toe mamao ae maea le vai o lo o vili i Faleasiu-uta, o le vai lena a le Samoa Water Authority ina ne i te i ua fenumiai ona tuuaiina foi lea ó leaga o le Matua, o le Afioga i le Minisita o Tina ma Tamaitai, Atinae o Nuu ma Afioaga ma Agafesootai o le Matua o le Itumalo. Ina ne i faapea, oh, o le la ua aao solo i o le Matua a o lea e fia inu Aiga o lea e tausi solo e Leulumoega. O le poppolega lena ina ia aua ne i tuuaiina le Afioga i le Matua aua le tausiga o le Nofo-a-too ma Aiga o lea e tausi e le Matua, ona ave seseina lea a o le vai lava o Fasitoo-uta ma Faleasiu ua toeitiiti maea ona toso atu lea e feinu mai ai Faleasiu uta ma Lepale, ona manuia ai lea o le tatou Itumalo. A o fuafuaga sa faataatitia e le Faimagalo i le Susuga Aiono o le Laau-na-Fausia o Aana, o Tama e tofi taua o le Itumalo. Ina ne i te i ua tuuaiina Taitai o le Atunu ma Taitai o le Itumalo, ma faapea, o fea lava o i ai a o lea e fia feinu. E momoli atu ai le agaga faafetai, faapea foi le Minisita mo Galuega, Felauaiga ma Atinae Eseese, leaga o le Tama na aumai e Tutuila ma Ape, ona aumai lea ave i Leulumoega o le toala fanau tama ma maua ai le alii o Aiga o Leaupepe. O le tausiga lea o Itumalo e mapu ai, e momoli atu ai le faafetai i lau Afioga i le Minisita o Galuega, Felauaiga ma Atinae Eseese o lau pule lea. Faafetai i lau Susuga Aiono o lau pule lea. Faafetai Leulumoega manu lou lato i le tai ma le opea i le ea. Faafetai.

**FOFOGA FETALAI:** O se mea e fia faamalamalama le sui usufono mo Palauli le Falefa leaga o lea e i ai le saunoaga o lo o opea i le Maota?

**Afioga Hon Faumuina Tiatia Faaolatane Liuga (Palauli le Falefa):** O lea lava faamolemole lau Afioga.

**FOFOGA FETALAI:** Tulai mai le sui usufono e saunoa.

**Afioga Hon Faumuina Faaolatane Tiatia Liuga:** Faafetai i lau Afioga o le tasi lea vaega o lo o mafaufau ai le mamalu o le atunu e taugofie le vai tumaoti i lo le vai lea e avatu e le Pulega o le Suavai. E le sao lea faamatalaga, o lou Itumalo e lua vai o lo o i ai, o le vai tumaoti ma le vai e i lalo o le SWA. E tele vaega e tatau ona faamalamalama aua e fai saogatupe a matai i masina taitasi e totogi ai le au plumber ma mea uma faapena i le tulaga o vai tumaoti. O lo o faatali foi se faaiuga a le Malo i le faaleleia o le vai tumaoti i lou Itumalo, o le vai o lou Itumalo e le faamamaina lea e aumai

e le SWA e \$20 i le masina, o saogatupe nei e fai e matou i le vai tumaoti e \$20 i le \$50, o lona uiga o le tau lena o lo o totogi e le o aliali i totonu o le pili, a o saogatupe na e faaaauai ai le tausia faaaauai pea o le vai tumaoti. Ou te iloa e tatau ona faamalamalama atili le vaega lea lau Afioga leaga e ono faaseseina ai le faafofoga mai o le atunu ma lou faaaloalo lava.

**FOFOGA FETALAI:** Malo, o le a toe tuu atu pea le avanoa i le Afioga i le Minisita.

**Tofa Hon Tolofuaivalelei Falemoe Leiataua:** O le ala tonu lea e ala ai ona popoe lo tatou Malo ma vave ona faailoa atu le tulaga o i ai. Afai o se mea lea e tupu i le Itumalo o le sui usufono, o lona uiga o lo o fai e aunoa ma le tuuina mai o faamatalaga amitonu e tusa ai o fuafuaga e ala atu i le komiti faafoe o vai tumaoti a le tatou atunuu. O fuainumera nei e aumai na o le \$10 i le masina le tupe e sao e le aiga e ave i le komiti e faagaoioi ai le maintenance o le vai. E \$10 i le masina le mea lea e faamaumauina e le Matagaluega ma le talitonuga o tuutuuga uma na e tatau ona tausisia e nuu. Ae afai o lea e fai e le Itumalo o le sui usufono mo Palauli le Falefa lea ituaiga faiga, o lona uiga e tau mai e solitulafono. Ae talu ai o lea ua fai nei le Tulafono Tau Faaofi, o lona uiga a na faapea na pasia le Tulafono Tau Faaofi ae le maua le faamatalaga lea, e alu nei lava le suesuega e tatoso uma mai tagata o Sili, Gautavai ma Gataivai e aumai e ta loka uma ioe, vaeatu lava le faafofoga a Samoa leaga e le o o i le tulaga o le faavae na fai ai. O le faavae, e uma loa ona faataoto le vai taumafa o le afioaga po o le itumalo, pei ona ou fai atu e fai ma faataitaiga ia Fagaloa, ona fai loa lea o le tuutuuga lea, e \$10 e totogi i le masina mo le tuuina atu i le Komiti e teu i faletupe, o tupe foi na o lea e teu i faletupe e i ai saofaga ia, e faamalamalama uma lava e tatau ona manino le faamaninoga, e afua mai i le Komiti o le afioaga lea e faia, ae na o le \$10 e totogi e ese ai lava le tupe o le lesitala i afioaga ia e le i faataunuina a latou vaitaumafa, e i ai le afioaga o Siumu lea e pei ona ou fai atu e fai le vai o Siumu, e fai. O le Tala o le Tupe i le 2015i le 2016, e fai ai lou vai. Ia pe ta lava le taimi o le palota ae o lena e te pisi i campaign a o la e fai le vai, ia o le a le uiga o le mea lena? O ai mo oe. Ia ae faamalamalama atu pea le vala lea ina ia manino le Maota, ae aua le aumaia se mea o fai lava e le itumalo ia, ae le o le mea lena o lea e i ai le talitonuga o le Matagaluega e faapea foi le Komiti, ma le faaaloalo.

**FOFOGA FETALAI:** Ia malilie sui usufono, se i avatu pea le avanoa e faamaea mai ai le faamalamalamaga a le Afioga i le sui usufono mo Palauli le Falefa, tulai mai le sui usufono.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai faafetai o lea ua faamalamalama mai. E le tasi se tau e te silasila i ai i le faatupeina o vai tumaoti, o lafoga i masina taitasi ma tupe e fai ai meaai o fono. O lea na ou fono i le masina talu ai isi ou nuu o Sili, ia na fai ai foi le matou saogatupe mo le matou suavai tumaoti e le tasi se tau e te tilotilo i ai. O meaai e fai i fono a Komiti ma isi mea, o le tau atoa lena o Vai Tumaoti. E lua lava auala e mafai ai ona aumai fesoasoani a le Iuni a Europa, o le faasaoina o le suavai ma le mama o le suavai taumafa. O vai ia na ou asiiasi i ai, e surface water vai tumaoti, e le mama, na pau lava le vai mama o vai

tumaoti o le vai e vili, le vai lea e i ai le vai o Neiafu, Falealupo aua e alu i lalo aua e faamama mai e le eleele. A o vai ia na ou asiasi i ai o la e sau i le surface water, e le mama. E le mafai ona tosina mai le Iuni a Europa e aumai tupe, pe a omai e le mama, e tasi lea vaega o la e naunau i ai le Iuni a Europa, o le mitaina o le vai. Aisea? Ia conserve le vai la e i le manava o le eleele, aua pau lava lea o le tatou faalagolagomaga, a o se upu foi e taugofie, e le taugofie lau Afioga i le Fofoga Fatalai.

**FOFOGA FATALAI:** Malo. Ia o lea ua malamalama lea mataupu. E manatu uaí ..Tulai mai lau Afioga i le Palemia.

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga i le Fofoga Fatalai, ne i te i ua tupu se fefinauaiga, o lena e maua i lalo o le Tulafono le vaega 6, e i le fono a nuu le puleaga faalenuu o le faamaoniga o le totogifuapauina, o lona uiga o la e i ai le avanoa o le fono e faatulaga ai e latou a latou totogi, ae ia aumai i i i le Matagaluega ia latou propose fees, a o le mea e taua o lo o taua i i, o totogi e affordable e gafatia. O lona uiga la a aumai lava e nuu le latou fee, o le fee lea e affordable e latou, o le fee lava lena e faaaoga. O lona uiga o lea lava e manino le Tulafono.

**FOFOGA FATALAI:** Malo faafetai. Ia e avatu pea le avanoa.

**Tofa Hon Tolofuaivalelei Falemoe Leiataua:** Lau Afioga i le Fofoga Fatalai na o sina vala lava lea. E faaeteete lava i le mea lea o le saunoa o le sui usufono aemaise lava o le sui usufono sa i le Kapaneta, pei e foliga e taufaaleaga i mea o poloketi a lo tatou Malo o lenei e naunau atu iaí ..e pei lava ona ou fai atu, o le target a le Malo, ia oo mai i le tausaga lenei 2015 ua taumamafa Samoa i le suavai mama i auala nei e lua ona o le policy na amata mai i le 2010, o le vai o le SWA o le Samoa Authority ma le vai la lea. A o le maemae o le Malo ma le agaga ia avatu le vai taugofie i le nuu e ala i le polokalame lenei e i ai le Tulafono lea, ae ia mautinoa, ua taumamafa i vai ua faamamaina, ua mautinoa foi i suesuega a le soifua maloloina ma le SROS faapea foi le fesoasoani a le Samoa Water Authority, ua uma ona test vai uma. O le matafaioi tulituliloa foi lena a le Matagaluega e faamanatu i komiti o afioaga nei e i ai vai tumaoti, ia mautinoa e test lava le latou vai i masina uma, a o le totogi lava ia o lea e faamauina ua uma ona faasoa i ai le Matagaluega ma vai tumaoti uma e ala i pulega a afioaga e \$10 lava i le masina, e ese mai i le lesitala lea na ou taua, aua e moni o le EU e aumaia le tele o le tupe ae i ai foi le sao o le Malo e totogi mo le faaleleia lava o le tulaga o le auauanga, ia maua e afioaga uma ma tagata soifua uma o Samoa le e aupito sili ona mama. E le uunaia e le Malo e taumafa le vai palapala, afai lava la o taumafa e Sili le vai palapala, o le latou lava finagalo lena, ma le faaaloalo.

**FOFOGA FATALAI:** Malo. E manatu e le toe faia se faafinauga ona o le mataupu ua tulai mai foi le sui usufono mamalu e faaalia mai lona finagalo, e taua foi le faamaninoga a le sui usufono, o lo o manino lava ma malamalama le folasaga e ala i mea o lo o faaaoga e itumalo, ua sagatonu foi lau o le fo i mea o vai e surface ia ma vai e vili mai i le manava o le eleele, o lo o taua foi

ma fetunai. A o lea ua saunoa malamalama le Tulafono e faamanino, o lea o lo o i ai le avanoa, o lo o i ai le avanoa e tuu ai pea i le pule mamalu a alii ma faipule, o fea e agai i ai le faatofalaiga e ala i saogatupe e fai ai, ia lipoti mai lau Afioga i le Minisita ma le Matagaluega, e manatu ua manino.

Tulai mai lau Afioga i le Sui Fofoga Fatalai.

**Tofa AGAFILI PATISELA ETEUATI TOLOVAA (Palauli Sisifo):**

Faafetai mo le avanoa i lau Afioga i le Fofoga Fatalai, talu ai ona o lou nuu e le i leva nei ona faamaea le latou vai tumaoti, e muliaina ona oo mai le Tulafono ua i luma o le Laulau a Fono a le Palemene, a o faiga faavae lea a le Matagaluega i le pulea o vai pei ona saunoa le Afioga i le Palestina e i lalo o le vaavaaiga a alii ma faipule. Sa taumafai le poloketi faapea e fai le plot scheme i lo matou nuu e faamita ai vai, ae na silasila loa le lautele o le nuu ua amata ona faapipi pusa foi lele e tofu lava le aiga ma le pusa, e tasi lava le latou mate o le a mita le vai, e le i taliaina e lo matou nuu, na ou faamalamalamaina i ai, e le pule mai le Malo po o le Matagaluega, o le mafuaaga e faamita ai, ina ia puipuia ma tau faasaoina le faamaumau vai, e le faia foi mai fafo le tau o le vai a lo tatou nuu, a finagalo le nuu e .01sene i le lita, e .01sene i le lita, e le i faaofigofie ma e le i talia lava e lo matou nuu ia lea tulaga. A o le tau la o lo o fai ai le matou vai e moni le saunoaga a le Afioga i le Minisita, o le tau lava lea e \$10, ae i ai ma le tau faaopoopo a le nuu ina ia tau tuuitiitia le faamaimau vai e \$5 i le gutu paipa, ina ia tuuitiitia ai le mea lea o le faamaimau vai, aua e ki ai lava le paipa ona talanoa ai lava laia ae leai ma se mea e faia o la ua avatu le tagamea tuu i lalo o le paipa ona talanoa lea ae le faaaogaina le vai. O le tulaga lea i lo matou nuu e le vaimamaina le vai o lo matou nuu, e le vaimamaina, e le o se bore hole e le o se surface water o la e sau le vai o lo matou nuu i le mea e tau o Lava tubes o la e sau ai le vai o lo matou nuu, o le vai lea o lo matou nuu ua uma ona test e le Matagaluega ua test faafia, e E.coli e all E.coli e leai seí ..o le vai e aupito sili ona mama, ae le o faamamaina, o le mama lava ia o la e sau mai lalo o le manava o le eleele o lea e i ai le vai o le matou nuu. O le fesoasoani atu lena i le tatou mataupu, ma le faaaloalo.

**FOFOGA FETALAI:** Malo. Tulai mai se tasi o sui usufono mamalu mo Falealili, Tofa Tusa Misi Tupuola e faaauau le saunoaga ona faasolo ai lea o saunoaga a nisi sui usufono o lo o fia saunoa.

**Tofa TUSA MISI TUPUOLA:** Lau Afioga i le Fofoga Fatalai, e momoli atu lau faafetai tele ua fai sina umi ua tau galo foi le lauga sa taumafai atu, ae ou te momoli le faafetai tele i le Afioga i le Minisita o le Matagaluega. E moni lelei lava pei ona ou fai atu, e lagolago lava Falealili i so o se fuafuaga uma a lo tatou Malo, e oo foi la i le fuafuaga o le poloketi o le vai tumaoti, e lagolagoina e Falealili, ae ou te le i taua faapea ua feteenai le SWA ma le Matagaluega, a o feteenaiga o lo o tupu pea i tua e aiga ma nai tagata o lo o faaletonu ona ua lua paipa ua lua vai e taunu i le taimi e tasi, e ui lava foi sa maea foi ona saunoa mai lau Afioga i le Minisita i le tulaga o le suavai tumaoti o lenei itumalo lea sa e saunoa mai ai, faafetai tele ou te iloa o le a aafia uma maua ma le Afioga i le sui usufono mo Siumu i lau pule faasoa foi i le Tala o le Tupe o lo o sosoo nei, a o le tulaga lena ma nai atugaluga na, a o

le Tulafono lau Afioga ma le mamalu o le Maota, e lagolagoina e lenei sui usufono ma lenei itumalo.

**FOFOGA FETALAI:** Malo faafetai saunoa i lau Afioga i se tasi o sui usufono mamalu mo Falealili. Ia tulai mai le sui usufono mo Aleipata Itupa i Lalo.

**Afioga TAFUA MALUELUE TAFUA:** Faafetai i lau Afioga i le Fofoga Fetalai, e na o le tolu lava nai mataupu ia eí ..o nai fesili lau Afioga, masalo ou te musu e toe faaluaina o lea ua uma ona faaalia ai finagalo o nisi, na ona tuu atu pea o se manatu faatauvaa, vaeatu lau Afioga. E i ai le alagaupu foi lea faa-Peretania, õwhatøs good for the goose is also good for the garderø a faa-Samoaina, õ le mea lelei mo le pato fafine, ia e lelei foi mo le pato alii po o le pato tamaloa.ö

Lau Afioga i le Fofoga Fetalai, o le agaga lava sa i ai ae le i amata lenei Tulafono i le taimi na faatoa oo mai ai i le Komiti a le Palestene, sa ou faitio lava i le tulaga lea i le vai tumaoti ma le vai a le Malo foi lea po o le SWA, ona talu ai faapea ua ese le faigamalo a le auvaega vai tumaoti, ese foi le vaega a le SWA, ona talu ai ua alu ai alu ai, o lea ua manino ma ua malamalamala i le agaga na fai ai. E momoli atu foi le agaga faafetai i le Afioga i le Minisita i le Tumua ia Leulumoega, malo faafetai, ua saunoa foi se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi, ia e le o se mea e fai ai ni a oulua faa-aiga po o ni faa-Aana i le mataupu lea o le mea a le atunuu, e tau ona ou logo atu ma ou faamanatu atu, o le uluai Tumua lea o lo o tulai atu. Ae faamolemole lau Afioga i le Minisita, e na o le tolu lava nai mea ia ou te laga, o le mea muamua o le equity of service, o le tutusa o le auaunaga, aua e moni lava o lea e manino mai le Tulafono e i lalo lava o le pulega a nuu ma alaalafaga, ia e saolele lava. O le manaia o le mea, faafetai o lea ua i ai le tofa i lau Afioga, o lea ou te faalogo atu nei e test lava a tatou vai tumaoti e faapena foi ma vai a le Malo le SWA.

Lona lua, o le saogalemu, e pei foi ona saunoa nisi sui usufono, o le saogalemu lea atonu o le criteria lea o lea e aumai e le Iuni a Europa mo le tatou vai e le gata o le mama e faapea foi le saogalemu. E momoli atu ai foi le faafetai i lau Afioga, o lea lava e maua le faamatalaga e matua lelei lava le auaunaga e le gata i Luatuanuu sa matou matamata i le faiga o le vai tumaoti a lea foi alaalafaga, e faapena foi ma nisi o alaalafaga o lea e pei o Siumu. E talosaga atu foi i lau Afioga, faamulimuli pea Siumu ia se i uma mai le palota fai, aua e toe tulai mai lava Tuuu i Siumu.

O le mea lona tolu lau Afioga, o le mamaí ..

**FOFOGA FETALAI:** Ia malie Tuiatua, se i tulai atu lou uso a itumalo, tulai mai le sui usufono mo Siumu.

**Tofa Tuuu Anasii Leota:** Lau Afioga i le Fofoga Fetalai, ou te le fia faalavelave i le saunoaga a le sui usufono mamalu. E fautua atu, taatia pea ia mea a lou itumalo, aua le lotea mai fua ma le tupu ai o le vevesi. Ma lou faaaloalo.

**FOFOGA FETALAI:** Tulai mai le sui usufono e faaauau le saunoaga.

**Tofa TAFUA MALUELUE TAFUA:** Ia faafetai i lau faauilavea. Mo le silafia e le Palestina, talu ona uma le Tsunami sa maua lava le matou suavai, a o lea ua i ai nei le mea foi lele o le faataatiaga o le tatou paipa lea e taamilo i Upoluí ...

*(Na motusia Fefafolafoaiga ona o se faaletonu o masini faaleotele leo).*

**FOFOGA FETALAI:** Ia malie lava le finagalo o le Maota, se i onosai mai lava ae se i taumafai atu alii inisinia mo le tau faafoega o a tatou mea faaleotele leo.

*(Na faataatiae Tuvalumaga a le Fono Aoao mo le 5 minute ona o le toe faaleleia o masini faaleotele leo).*

**FOFOGA FETALAI:** Faamalo atu le onosai i le tatou Maota i lenei vaega o le aso. E faamalulu atu ona o tulaga le maalofia ua motusia ai a tatou mea faaleotele leo ae ui o lea ua toe faafoisia le faafitauli na tulai mai.

Tulai mai le sui usufono mo Aleipata Itupa i Lalo e faaai mai le saunoaga.

**Afioga TAFUA MALUELUE TAFUA:** Faafetai i lau Afioga i le Fofoga Fetalai, atonu e atonu foi lea malologa e tupu ai nisi manatu e faamanatu atu ai i lau Afioga le tulaga o lo o i ai la matou suavai sa ou ó lea e sosolo lava i luga o le Tulafono Tau Faaofi o Vai Tumaoti 2015. Ae talu mai ona uma le Tsunami lau Afioga e faafetai atu ai i le Matagaluega o le Suavai ona ua ola lelei le vai o i latou e nonofo tu auala i le aai i tai, o nuu ia i tai o Satitoa ma Tiavea e fai lava sina mafatia talu ai o le leai o se suavai. Na folafola mai foi le Ofisa Sili o Pulega o le Suavai talu ai o le a vili lo matou vai pea uma Aleisa ina ua foi mai lena mai Falealupo ma Neiafu ma faasolo mai ai i Apia nei. E oo mai lava i le aso o le a uma foi lenei 5 tausaga e le viliina lava se suavai aua nei nuu a uta nei o lo matou Itumalo o Tiavea seia oo i Satitoa. Ua maua lenei avanoa e talosaga atu ai ma le faaaloalo i lau Afioga i le Minisita aemaise o le Malo o lea e faafogaga mai le Minisita o Tina ma Tamaitai, Atinae o Nuu ma Afioaga ma Agafesootai aemaise le Minisita o le Suavai po o le SWA.

E faaai atu ai se tala puupuu ae momoli atu ai le agaga faafetai i le Tulafono Tau Faaofi ua manino ma malamalamama a o nai mea lava nei e tolu e pei ona ou fai atu, o le mea e lelei i le pato a fafine e lelei foi i le pato a tamaloloa. O le uiga o lea upu ia tutusa le service, ia aua ne i faailogaina po o le tama po o le teine a ia amanaia so o se mea. A mama le suavai aemaise mo le saogalemu o le mamalu o le atunuu.

Ia manua le Fono.

**FOFOGA FETALAI:** Malo faafetai, ou te manatu e leai se isi e toe fia saunoa i lenei mataupu. O le fesilií ..

**Tofa LEFAU HARRY SCHUTER (Vaimauga Sisifo):** Lau Afioga i le Fofoga Fetalai, o lea sa faatalitali le matou back line se i uma finauga ia na uma atu nei ona matou faasolo atu lea. Lau Afioga i le Fofoga Fetalai faafetai mo le avanoa, ua manino ma matagofie le Tulafono Tulafono Tau Faaofi, e manino foi le faamalamalamaaina e le Afioga i le Palemia o le Tulafono Tau Faaofi ma lona autu. E ese foi le aoga o le Tulafono Tau Faaofi e pei ona faamalamalamaaina ma finauga na faia i ai e faatupu manatu ai mo au o se tasi o sui usufono mo Vaimauga Sisifo. Ou te tau faalogologo atu i le Tulafono Tau Faaofi, amuia alaalafa lea ua faapea e i ai le filifiliga lea e i ai isi alaalafaga ia e i ai le vai a le SWA e i ai foi le vai tumaoti, o lea foi ou te faalogo atu e taugofie le vai tumaoti masalo se i faatea muamua le Tulafono Tau Faaofi lenei ma pasia, ae se i matou talatalanoa foi i le Vaimauga i le Samoa Water Authority pei i ai foi la se avanoa mo se vai tumaoti mo le Vaimauga aua o lea ou te vaai i ai o lea e i ai le filifiliga mo isi Itumalo e avae i ai lenei faamanuiaga.

Lau Afioga i le Fofoga Fetalai o le manaia ia lenei Tulafono Tau Faaofi, pau o le mea lea ou te vaai atu e ese le amanaia o le pulega faale-agantu o fanua ma vai o lo o i totolu o fanua o alaalafaga taitasi. E taua foi le Tulafono Tau Faaofi o le tuuina atu lea o le vaavaaiga o lenei resource taua o le vai i nuu ma alaalafaga latou te vaavaaia. Ou te iloa o se laasaga taua lea pei a o le mea lea o le faamaumau o le suavai ma le le mafaufau i ai tagata o latou faaaogaina, pei e faamoemoe lava seiloga e tele atu le pili ua avatu i le Samoa Water Authority pei o le tulaga lea na taua e le Sui Fofoga Fetalai, faamaumau le iputi o le paipa. A faapea e tuuina atu le leoleoina o tulaga faapea i komiti o le a latou vaaia le suavai, o le a manatu foi tagata i le faasaoina o le vai. Ona pau lava le tulaga o se manatu vaivai ae manaia lava le Tulafono Tau Faaofi, o lea e amanaia faaletulafono i le suavai. O lea e fai mai le Tulafono Tau Faaofi e ave le pulega ma le vaaiga o le suavai lea i le pulega a alii ma faipule, e le talia e lou mafaufau le mea lena i le tulaga masani a Samoa, ae i ai le isi tulaga ou te tilotilo ai foi au o la e i ai le tatou faavae e puipuia ai tagata taitoatasi ona e le o suavai uma o Samoa e au i ai le pule a alii ma faipule. E i ai lava nuu taitasi e i ai o latou punavai i totolu o le fanua o se aiga, ae a faaaoga lea suavai e lena nuu ma le alaalafaga e ao lava ona amanaia e alii ma faipule le aia a le aiga lea e i ai le vai i totolu o le latou fanua i le feutanaiga mo le faaaogaina o le suavai. Ona pau lena o le tulaga ou te vaai atu e le o manino mai i le Tulafono Tau Faaofi ae taua mo le Matagaluega ina ia aiaia feutanaiga ae le o le fai o lea tulaga ona o lea e faapea ona o lea ua fai mai le Tulafono Tau Faaofi e amanaia le pulega a alii ma faipule i le vaaiga o le suavai, ua ia matou foi la le pule e o atu lava sei sao mai le suavai mai totolu o le fanua e aunoa ma le feutanaiga. Ona pau lea o se vaivaiga ua tuuina atu i luma o le Laulau lau Afioga i le Fofoga Fetalai, faafetai mo le avanoa.

**FOFOGA FETALAI:** Malo, se i tulai mai le sui usufono mo Gagaemauga Nu. 2.

**Tofa LEVAOPOLO TALATONU:** Faafetai i lau Afioga i le Fofoga Fetalai, e le umi foi nai lagona o lenei Itumalo e tusa ai o le Tulafono Tau Faaofi. Ona pau lava le mea muamua lava e avea ai lenei avanoa e momoli atu ai foi le agaga faafetai i Faalapotopotoga po o Donates foi nei e aumai ai

fesoasoani e faatino ai lea polokalameaua ou te talitonu e o ni tamai tupe nei tupe, masalo e latalata i le \$10milliona funds e aumai i tausaga uma. E momoli atu foi le faafetai i lau Afioga i le Minisita ma le Matagaluega i le faafoeina o lea foi atinae, e faapena foi i konekarate ma nai tupu ma ee o lo o latou faatinoina lea fuafuaga. E avatu lava le faamalo ma ou te faaamuia atu lava au ia te outou o lo o maua sua ia lololo ma sua moa Samoa o lo o maua ia outou galuega faasolo i tua.

Lau Afioga, e tau i ai lava sina nenefu laitiiti i lau tilotilo i Tulafono Tau Faaofi nei. A silasila foi lau Afioga i le Matagaluega o le Samoa Water Authority o le core function a le Matagaluega lea o le faaoo atu o le suavai i so o se tagata o le atunuu e ala i le faatau atu o le ipuvai. Ona oo mai lea i lalo o le Water Management i lalo o le Punaoa Faalenatura, o lena ua maoti ai e le pulea e le Malo o so o se punavai i totonu o eleele o le Atunuu. O lea la ua oo mai le Water Scheme po o Vai Tumaoti, o lea ua uunaia ma tulei malosi e le Tulafono Tau Faaofi le puleaina o vai tumaoti e alii ma faipule o alaalaafaga taitasi. O le lua la lea e i luga o le Samoa Water Authority ma le Water Management o lea ua taoto lua le gatala ma le tuulau i i e aiga lelei, ae tetee atu loa, lea e i ai le tatou Tulafono Tau Faaofi lea. Ou te faaamuia i alaalaafaga o lo o i ai o latou vai tumaoti, o le mea moni lava e saoloto lo outou taumamafa i le suavai a o matou lea e le Water Authority lena ua ou fai atu e faatau lava le ipuvai i taimi uma. E saoloto foi lo outou faamalu po o le taele i le suavai lea a o matou e taele fulfulu ae faamama le isi afa taeao ona o le taumafai lava e sefe le tupe lea e totogi ai le matou suavai.

E le gata i lena lau Afioga i le Fofoga Fetalai, a o lea foi e maua e alaaalaafaga o lo o i ai vai tumaoti le faamanuiaga o funds nei e sasaa tonu lava i alaalaafaga lea e i ai vai tumaoti, a o matou ona pau le mea lea e o atu ai le Samoa Water Authority e vili o matou eleele ona aumai lea o vai nei ma ave faatau ae maua ai a latou tupe. I lau tilotilo lau Afioga i le Fofoga Fetalai, e le o paleni, e le o laugatasiaí

**SUI FOFOGA FETALAI:** Malie le sui usufono, se i tuu atu le avanoa i le Minisita o Galuega, Felauaiga ma Atinae Eseese e patino tonu i ai le mataupu tau vai.

Tulai mai lau Afioga i le Minisita.

**Afioga Hon Manualesagalala Mati Tuigamala Enokati Posala:** Lau Afioga i le Fofoga Fetalai, o le popolega lava ona o saunoaga faapea lea e fai mai e o atu e faatau. E le o toe maua se mea e maua fua e aunoa ma le totogi o le sene, o le vai lea e pamu mai lalo e alu i le eletise. O le tasi lea vaega aupito sili ona taugata ona o le vai e pamu mai lalo i le eleele e eseese ai la ma Upolu ma Savaii i le tulaga lea. O i inei o lea e tele ina tuuina mai vai ia e maua mai luga e mafai ai ona taumafa a o le autu o fuafuaga a le Pulega o le Suaai o le taumafai ina ia tufaina atu le suavai mama ma ia gafatia le suavai ae tatau ona totogi, o galuega e fai. E oo foi i le vai tumaoti lea e faamatuu atu i tua e totogi foi alii ma faipule o Itumalo i le faatinoina o le latou galuega. O vaega uma ia aua e o atu le vai tumaoti ua faataatia ma faaleleia faatanoa, tai mai laina ma tuu atu i ai, ona lafo atu lea i le pulega a alii ma faipule o i latou e faatinoina le maintenance ma vaavaai i le tulaga e tatau ona faalelei, e lafo lava ia i latou aua o la foi e totogi tupe i le vaaiga e nuu.

E faapena foi i lalo o le Pulega o le Suavai, o lo o i ai i Sogi le auaunaga ina ia mafai ona faatinoina le monitoring ina ia vaavaai ia lelei ma mafai ona faatinoina le mama o le suavai o lo o avatu i tua ma ia gafatia. O mea taua na o lo o i lalo o le vision ina ia mafai ona faatinoina lea vaega ae sese tele nei upu e aumai ma le faaseseina ai.

**SUI FOFOGA FETALAI:** Faafetai i lau Afioga i le Minisita, o lea ua e saunoa malamalama i lea tulaga ina ne i tei ua taitai seseina ai le faafofoga mai o le atunu e tusa ai o saunoaga faapea o lo o inu fua nuu o lo o i ai vai tumaoti o lea ua e saunoa malamalama i ai leai e le inu fua. A faapea foi o le a viliina se vai fou i nuu nei o lo o i ai vai tumaoti e ese le totogi, afai o le isi itu o le auala e taatia ai le paipa a o le isi itu o le auala e i ai le aiga, o le taugata ia aua e totogi foi vai tumaoti aua e totogi le tataeina o le auala se i tulou, e ese le Matagaluega latou te faatinoina. O le faamalamalama lena e faamalamalama atu ai ina nei tei ua taitaiseseina ai le faafofoga a le atunu leai e le inu fua nuu ma aiga o lo o i ai vai tumaoti, ae pei ua tau feteenai le saunoaga a le sui usufono lea ma le sui usufono lea na faapea mai o le aia tatau o le aiga o lo o i ai le punavai i totonu o le latou fanua. O lea ua saunoa manino mai le Minisita leai o meatotino a le Malo, o lona uiga e fuafua pea i ai le finagalo o sui usufono.

Tulai mai le sui usufono e faaauau le saunoaga.

**Tofa LEVAOPOLO TALATONU:** Faafetai, masalo a matau mai e le Afioga i le Minisita le uiga o se lagona, e le o teena e lou sui usufono le faatau o le auaunaga a le Water Authority, ona pau lava le mea lea ou te tau tulituli atu o le le laugatasia ona e ese le rate lea e i ai le vai tumaoti ese le rate lea e i ai matou nei e faaaogaina le auaunaga a le Samoa Water Authority, e le o laugatasia le mea lena. E tusa la na o matou leae faaaogaina le auaunaga a le Samoa Water Authority o lea e togi maa i le tamaoaiga o le atunu. O le aoga ia o le faatau lea i le VAGST i luga o le Water Authority a o le mea lea e tulai mai e le o maua e matou le fund lea e sau i i, o le mea lea e tau mai le Tulafono Tau Faaofi ia maua le fund lea ma maua faamanuiaga nei mo vai tumaoti toe laitiiti le rate. O le mea lena ou te fai atu ai e le o tutusa le treat ina o tagata uma i le tufatufaina o le suavai i totonu o le atunu. O lau fautuaga lau Afioga i le Fofoga Fetalai, afai e le mafai ona laugatasia uma ia totogi pili a tagata uma e tusa ai ma le Tulafono Tau Faaofi lea e pulea e le Malo ia punavai ma mea uma. A leai, vavae maia se isi afa i i se isi 50 pasene e ave i le Samoa Water Authority e subsidise ai ni VAGST a tagata ia e lalo o le Samoa Water Authority ona fare lea o si a tatou amio. A o le mea lea e tulai mai, e le o talafeagai.

**SUI FOFOGA FETALAI:** Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai mo le avanoa. Faafetai i le Minisita ma le Matagaluega e tusa o lenei Tulafono Tau Faaofi. O le taimi lava lenei o le tausaga e aulelei ai le Minisita mo Tina ma Tamaitai o lea faatoa foi mai o i Niu Ioka o le taimi foi lenei e alu ai e lauga i le united nations, ave le tatou feau i le puipuiga o tina ma tamaitai. O la e lava e saogalemu tina ma tamaitai, ae faafetai i lau galuega tauologologo.

I lau faalogologo i le Tulafono Tau Faaofi, ou te le popole po o fea le mea e aumai ai le suavai, o lau faafetai, ia maua e tagata uma o le atunu le suavai, pe aumai tumaoti, pe aumai i fea, aua o le vai lava ia e aumai le lagi. O le taua i lau faalogologo, ia maua e tagata uma lenei mea taua o le vai aua o le vai o le ola. E le tele foi la sou malamalamaaga tele i mea tau vai tumaoti, aua o matou o tagata o le taulaga e ola mai i le vai a le SWA. Ae manatua foi la, e i ai lou malamalamaaga ia manatua la, o le itumalo lenei e tele ina feinu i le vai a Samoa. Ae faafetai i le itumalo ua faasoa le suavai, ave e faafeinu, o ai lava e fia inu, taumafa, ina sau ia i le vai e maua i Faleata e te taumafa ai ma le filemu.

Ia, ou te fia tautala lava i le Tulafono Tau Faaofi lau Afioga. O mea ia e aumai le Tulafono, muamua, ia fausia se faavae faale-tulafono, se legal framework foi lele e taumafai ai ina ia laugatasia le vaaiga o vai ia tumaoti. Faafetai aua ua leva ona tulai mai.

Lona lua, ia fai ni Komiti i totonus o nuu i lalo o le puleaga a le fono, village fono po o le fono a nuu e vaaia vai, fai aiaiga e vaaia le vai, faatupe ma totogi pili ma mea uma faapena. Ona toe faatu foi lea ma le sosaiete po o se faalapotopotoga, independent water scheme association, e pei la o latou ia o lea e vaavaaia Komiti o nuu taitasi pe afai e sao lau faitau i le Tulafono Tau Faaofi. O le vaega tonu lena o lea e ave i ai lau faamatalaga lau Afioga i le Minisita o le Faalapotopotoga lea po o le Association lea e faatuina. Ou te fia malamalama muamua lau Afioga, aua o le galuega lea o lea ou te talitonu o lea e faatino e lau Matagaluega, o lo o lelei foi ona faatino ma faafoe. A faatuina la le Faalapotopotoga lea, e faapefea la ona... aua o lea e faapea mai, e i ai ni tagata mai tua i nuu ia e i tua i le faatupeina o le Faalapotopotoga lea. Pe le mafai ona faaauau pea e le Matagaluega le function lea aua o lea e auala mai ai i i tupe foi nei mai le EU, tupe mai fafo ma tupe uma e avatu e le Malo tupe mai nuu i le latou share e faatuina ai le faiga o vai nei.

A e tagai i le Fuaiupu 30 o le Tulafono Tau Faaofi lau Afioga, faatoa ou vaai lea i se Tulafono Tau Faaofi e toeitiiti lava e sili atu i le sefulu ituaiga fee lena e sau ai i ina lau Afioga. O le popolega la lena. E i ai le mea e tau o le talosaga, application fee, o le totogi o le faamauin, registration fee, totogi o le avea ma sui, membership fee, totogi o le faafouga, renewal fee, le totogi o le asiasiga pe a o e asiasi, inspection fee, totogi o tuusaunoaga, exemption fee, totogi o le toe faaleleia, restallation fee .

**SUI FOFOGA FETALAI:** E faamanatu atu i le sui usufono o lo o saunoa, o le taimi lenei o felafolafoaiga faalauaitele, e le mafai ona e saunoa i mea taitasi e le i oo i ai le Tulafono Tau Faaofi i le tulaga lena, pei ona e saunoa i le Fuaiupu 30, o le vaega lena faatoa oo i ai pe a auiliili mea taitasi.

**Tofa LEALAILEPULE RIMONI AIAFI:** Faafetai lava i lau Afioga, e matua malamalama lava le sui usufono, faafetai le faamanatu mai. Ae manatua foi, a toe foi mai le Tulafono Tau Faaofi i inei, ona auiliili lea i fuaiupu taitasi e le mafai la ona toe suia.

**SUI FOFOGA FETALAI:** E faamanatu atu i le sui usufono, e toso le tatou Fono pe a le mulimilitai i le tatou Standing Order, ina ia tausisia ma mulimilitaia le mamalu o le tatou Fono, ia tatou mulimilitai i le tatou Tulafono Tulafono Tumau. Ma le faaaloalo lava, tulai mai le sui usufono.

**Tofa LEALAILEPULE RIMONI AIAFI:** Faafetai. Lau Afioga, e taua tele le vaega lea na ou taua i lau lauga. Aua o le mataupu lautele lea, pe sau i le Tulafono Tau Faaofi pe sau ai, ae leaga o le mea lava o lea ou te talitonu o lea e sau i le Tulafono Tau Faaofi, e tatau ona laga pea se i tagai i ai lau Afioga ina nei avea ma mea e ponaia ai foi le faatuina o tatou vai tumaoti nei, aemaise la e i ai isi afioaga lea ua i ai i le taimi nei, o lo o ola se isi vaega i le vai a le Malo, ola se isi vaega i vai tumaoti. Atonu o lea na saunoa nisi sui usufono na i ai se feteenaiga. Ia, ae ou te faafetai o le mea lea ua agai i ai le Malo i faiga paaga ma afioaga i le tele o sectors a le Malo, o se mea lelei tele lea, ina ia vaai lelei lava e nuu ia o latou lava lumana i ma le lelei o latou i aso faipea, e i o latou lava aao. Na pau le mea a le Malo e fai, o le faamalumalu i mea e fai. Ae faafetai i le mea lea. Aua o le mea lea lau Afioga i le faatupega o le Komiti lea, o lea la e fautuaina atu ai lau Afioga, ia e pei e matagofie lava le tulaga o i ai nei ma le faafoeina o lea vaega i lalo o lau Matagaluega. Afai o la e faaauau ma lelei i le taimi nei, e manaia lava le faaauau pea i le taimi nei ma ave foi i ai se fesoasoani a le Matagaluega, aemaise lava le puipuiga lautele o nai tagata e faaaogaina le suavai. Aua o le taimi lenei, a tipi lau vai i paipa ia e ola ai matou, e te onosai lava se i maua sau tupe e toe faaola ai. E le gata ina maua lau tupe e totogi ai lau pili, ae maua ai ma se tupe e reconnect ai. Ia, a o vai nei tumaoti, e tatau ona i ai ni puipuiga o nai tagata nei i ai ni mea i totonu o nuu latou ona tipi ai lea ma le oo le suavai i nai aiga foi nei ua faasala e le nuu, a o i ai le puipuiga i lalo o le Tulafono Tau Faaofi. O le mea taua, o lea ua i ai le Tulafono Tau Faaofi. Ae o le fautuaga i lau Afioga ma le Matagaluega, ia fai fuafua foi le Tulafono Tau Faaofi i le va nonofo ai ma le galulue faatasi ma afioaga ma nuu, ae le o le alu atu foi lele i se pulega malosi po o le faamalosi, ona le ausia ai lea o le agaga na fausia ai le Tulafono Tau Faaofi. Ma le faaaloalo lava, faafetai.

**SUI FOFOGA FETALAI:** Faafetai atu i le sui usufono mo Faleata Sisifo e tusa ai ma fautuaga, e talitonu o lea ua faamauina e le Afioga i le Minisita pe a oo i le taimi e tali mai ai. Tulai mai le sui usufono mo Aana Alofi Nu.3.

**Afioga TOEOLLESULUSULU CEDRIC POSE SALESA SCHUSTER:** Faafetai lava i lau Afioga mo le avanoa. E fia faamauina foi le faafetai a lenei itumalo i le Afioga i le Minisita ma le tapenaina o lenei Tulafono Tau Faaofi, ona e i ai foi nisi o afioaga o lenei itumalo o lo o tauatiae ma taumafai e faaaoga le vai tumaoti, ona o le taimi nei, o le tele o nisi vaega o afioaga o lenei itumalo e le o mafai ona oo i ai le vai a le tatou Malo, o le ala taumafai lea i se auala ia mafai ona faatino ma oo ai le suavai i nei vaega o afioaga ma alaalaafaga o le itumalo.

Na pau nai vaega lau Afioga i le Fofoga Fetalai e avatu ai nai fautuaga e tusa ai o le Tulafono Tau Faaofi, atonu e mafai ona toe silasila ai, e le gata o le Minisita ma le Pulega, a o le Komiti foi o le a feagai ma le iloiloina o lenei Tulafono Tau Faaofi.

O le vaega muamua lau Afioga i le Fofoga Fetalai, o le faafetai o lea ua maoti mai le va lea i totonu o fono a alii ma faipule o afioaga ma alaalaafaga. Na pau le fautuaga, ona o nisi o vaega o lo o faataoto mai i le Tulafono Tau Faaofi, e faatulafonoina ai le aofai o komiti o vai. O galuega faatino a komiti o vai. O le fautuaga ina ia mafai ona toe silasila i ai, atonu na o se aotelega o

ituaga ona o nisi o lo o faaali mai e silia ma le toasefulu komiti o vai. O nisi o afioaga ailoga o i ai uma le pulega a alii ma faipule i totolu o komiti faapea. Silasila i ai pe talafaegai le toatele, pe na ona faailo mai ni sui e tatau ona i ai i totolu o ia Komiti ina ia mafai ona faatino ai galuega.

O lona lua lau Afioga i le Fofoga Fetalai, o le tulaga lea ou te talitonu ua maioio foi le faatinoga o galuega a le Ofisa o le Vai, aemaise o le water resource management lea o lo o sau ai le Tulafono Tau Faaofi o lo o i lalo o le siosiomaga. Ia, o le talitonuga, pei ona faatinoina le tele o awareness lea tou te silasila ma vaavaai ai i le TV, o lo o i ai lava i latou e i ai poto faapitoa ma tomai faapitoa e faia ia awareness mo le atunu lautele, aemaise lava i latou e i le vai a le SWA. Ae a tuu atu le vaega lea i totolu o afioaga ma alaalafaga aemaise lava o Komiti, atonu e fafaigata ona i ai se tomai ia i latou e oo lava i le association. E talitonu o lea ua i ai le vaega tonu o le Tulafono Tau Faaofi i le water resource management, e lelei pea le faatino e i latou ia o lo o i ai le tomai le faiga o awareness i polokalame faalauiola ma le faatinoina, e fesoasoani foi i komiti ma afioaga taitasi i le faatinoina, ae aua tatou te tuuina lea vaega i totolu o afioaga ma alaalafaga, aemaise o Komiti.

Lau Afioga i le Fofoga Fetalai, o le tasi vaega i lau vaai foi i Faalapotopotoga o lo o i ai nei a le asosi lea mo vai tumaoti, pei ona i ai i nisi, o le aafiaga na aafia ai le tatou atunu i le afa o Eveni, o le vave lava o le gaoioi i le vai a le Malo, a o vai tumaoti, na faatuatuuanai, ona e le o i ai se tomai faapitoa ma ni tupe ma ni tagata faigaluega faapitoa e faia repair ma le rehabilitation o vai ia. E talitonu la lau Afioga, e ao foi ona silasila i ai ina ia i ai se vaega faapea. Pe tuu i totolu o le polokalame a le water authority ina ia mafai ona oo i ai le fesoasoani, aua afai e le i lalo o le polokalame o le vai a le Water Authority, e faigata foi ona latou faatinoina le toe faaleleia o vai tumaoti, a ia i ai se polokalame ina ia mafai ona oo i ai se fesoasoani vave i nei afioaga o lo o i ai i totolu o nei vaega.

Lau Afioga i le Fofoga Fetalai, o le fesoasoani foi mo le Faalapotopotoga ona ua matauina foi i nisi o designs sa faatinoina i nisi o vai, atonu e le o atoatoa le lelei o i latou inisinia ma i latou sa auina mai e tusia nisi o vai. E talitonu e i ai nisi o vai ua faalua pe faatolu ona fai, compare i nisi o vai o lo o design e le Water Authority, e lelei ma ua vave ona faaleleia, peitai o nisi foi o vai ua matauina i lea vaega, atonu o le le o lava o le tomai faapitoa o i latou o lo o faafaigaluegaina i totolu o lenei Faalapotopotoga, ona e utiuti foi le seleni o lo o faapea ona faatinoina ai. E i ai la le fautuaga ina ia toe silasila i auala e mafai ona maua ai le tomai faapitoa ma maua ai le fesoasoani i afioaga ma alaalafaga i taimi taitasi.

Ona faaiu atu ai lea lau Afioga o se manatu o lenei Itu, e lagolagoina ai lenei Tulafono Tau Faaofi ma nai suiga ina ia mafai ona maua le fesoasoani e afioaga ma alaalafaga o lo o manaomia le suavai, ae maua foi le auauanga ina ia lava ma fesootai uma ai Matagaluega a le Malo ma lenei polokalame o vai tutoatas. Faafetai.

**SUI FOFOGA FETALAI:** Faafetai i lau Afioga i le sui usufono e tusa ai foi ma fautuaga ua tuuina mai mo le silasila a le Afioga i le Minisita o feagai ma le suavai tumaoti. Ae ua tatou taunuu mai i le itula e 1:00 o le itula o le malologa masani pei ona tatou i ai i lenei itula, ou te faapea atu ai, o le a faataatia ese Tauaulumaga a le Fono Aoao, seja maea le malologa masani o le aoauli. Faafetai.

*Na toe faaaauau felafolafoaiga a le Fono Aoao Faitulafono i le itula e 1:45 i le aoauli.*

**FOFOGA FETALAI:** E faamalo atu le onosai i lenei vaega o le aso. E talitonu o lea ua tatou taunu mai i le toe faaaauauina o le tatou galuega e ala i le lafo faatu, ina ia tapenapena a tatou galuega ma tatou taumafai e faaiu i le aso ona o le tele foi o nisi a tatou galuega tuua pei ona taumafai atu le tatou lafo i le taimi ua sola.

Ae le i tuu atua le avanoa, ou te talosaga i lau Afioga i le Palemia mo le faatuina o le lafo.

### **LAFO MO LE FAATAATIAESE O TULAFONO TUMAU 53**

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o lea ua toe maua foi le malosi faafouina, aemaise e matau atu ua tele lava ina tuumamaina le tatou galuega ia masalo pe toe itula ona tatou manava foi lea e malolo mo lenei weekend ia ma agai atu ai i le Aso Sapati. O lea ou te tulai atu ai, *Ina ia faataatiaeise Tulafono Tumau 53 e avanoa ai le talanoa o Lipoti ia e lua e faaopoopo atu i nai mea laiti ia e totoe o le Komiti o Galuega i le Tulafono Tau Faaofi o Teuteuga o le Tulafono o Faiga Palota 2014, ia ma le Toe Iloiloina o le Tulafono o Faiga Palota 2015, ia o mea ua leva ona outou lauga ai faalauaitele e le o toe i ai ni mea o mamafa tele o lo o totoe.*

Ia lau Afioga o le lafo faatu lena.

*Faaluaina e le Sui Palemia ma le Minisita mo Galuega tau Alamanuia ma Atinae a le Malo.*

*Na faamaonia le lafo ma tulai ai le Tulafono Tumau 53 ua faataatiaeise.*

**FOFOGA FETALAI:** E faia le tatou malologa o lea ua maea ona saunoa se tasi o sui usufono o le fale Aana. Ia pe i ai se isi mea e fia saunoa i ai le Afioga i le Minisita po o le Malo ae o le a avatu le tatou fesili.

**Tofa Hon Tolofuaivalelei Falemoe Leiataua:** Lau Afioga i le Fofoga Fetalai ou te tulai ma le faaaloalo, o lea ua manino le faamalamalamaga a le Afioga i le Palemia, ia ua avatu foi so matou manatu faivavale e lagolago ai ia le tulaga o lenei Tulafono fou pei lava ona saunoa foi ia le Taitai o le Itu Agai i le aso o le Tulafono lenei o Aoga o se Tulafono taua tele. A o lou lava manatu, o Tulafono uma e aumai e se Faigamalo, o Tulafono taua uma lava e i ai foi la le Tulafono lenei, ona o le taunuuga lava o le soifua manuia ma le soifua lelei o tagata soifua o se atunu, aua o so o se atunu e faamoemoe i le Malo, e le faamoemoe i se Itu Agai e faamoemoe i le Malo, aua o le Malo e aumai ai polokalame uma lava pei foi ona i ai lenei Tulafono taua ua tatouí ..Ou te faafetai i nai ou uso o lo o seei mai i o i le la itu o le Maota i lo latou finagalo faaalia, o lea o le a faamau o outou finagalo i mea e tatau onaí ..ua manatua o le Tulafono lenei, e ave i le Komiti o le Komiti la o le

latou silasila mulimuli lava i molimau e avatu e tuuina mai ai le latou Lipoti i luma o le Maota lenei, pe i ai ni mea teuteu i luga o a outou fautuaga pe leai, ae ua uma ona faamanino uma tulaga o le taua o le Tulafono ma le silasila a le Malo, e pau lava le taua o le silasila a le Malo, o le atunu, ia taumafa le atunu i vai mama e vai e faaumumi ai le soifua maloloina, ma sui ai le mutaaga ua taoto ai nei ia le soifua o tama tane ma tamaitai, ia sii mai tamaitai i le 70 ae sii tamaloloa i luga o le 75. O le tulaga lena o lea e manao ai, i tausaga ia toe foi i tua i le tulaga o le soifua maloloina lelei ona o se suavai lelei, aua e leai lava se isif ..o taumafa ia e fai fai lava o, a o le vai lava ia, ia a o le ola lena o so o se atunu.

O le mea la lea i sui usufono o le Itu Agai na aumai o latou finagalo o lea ua faamau - ma e faamoemoe le Komiti Filfilia o le Palemene e silasila i le Lipoti lenei ma le Tulafono i ona Teuteuga e faamoemoe i ai i luga o finagalo faaalia o le atunu o le a molimau po o Matagaluega foi, po o Faalapotopotoga foi o lo o i totonusi o lenei lio, o le talitonuga a lo tatou Malo o le a manuia ai le soifua maloloina o Samoa, e ala i le suavai mama e faasoatua ona o le auauanga a le Faalapotopotoga faatasi ma le lagolago a le Matagaluega o vai tumaoti e pei ona lausilafia ai.

Ia alofagia e le Atua lenei Tulafono o le a limataitaiina ai nisi o polokalame taua mo le soifua lelei o Samoa, nei ma taeao ma le lumana. Ia manuia lau Afioga i le Fofoga Fetalai, manuia foi le Fonotaga, ia manuia foi le tapuaiga a Samoa o lo o faafogafoga mai.

*Na faamaonia le lafo.*

*Na faitauina le Tulafono Tau Faaofi o Vai Pulea Tumaoti 2015 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o le Soifua Maloloina, Galuega tau le Va Fealoai, Mataupu tau Lotoifale, Atinae o Afioaga ma Agafesootai mo le iloiloina ma toe lipoti mai i le Fono Aoao i se Fonotaga o lumana.

### **TULAFONO TAU FAAOFI O TEUTEUGA O LE TULAFONO O TAAVALE FEOAI I ALA TETELE 2015 – faitauga faalua**

**FOFOGA FETALAI:** Tulai mai lau Afioga i le Minisita mo Galuega, Felauaiga ma Atinae Eseese.

**Afioga Hon MANUALESAGALALA MATI TUIGAMALA ENOKATI  
POSALA:** Lau Afioga i le Fofoga Fetalai ou te faatu le lafo, *Ina ia  
faitauina nei le Tulafono Tau Faaofi o Teuteuga o le Tulafono o Taavale  
Feoai i Ala Tetele 2015 i lona faitauga faalua ma ou te fia tautala  
faamalamalama i ai.*

*Faaluaina e le Minisita mo Aoga, Taaloga ma Aganuu ma le sui usufono mo  
Palauli.*

**FOFOGA FETALAI:** Tulai mai lau Afioga i le Minisita e saunoa faamalamalama.

**Afioga Hon MANUALESAGALALA MATI TUIGAMALA ENOKATI**

**POSALA:** Lau Afioga i le Fofoga Fetalai, sa tau tuai ona ou tulai atu, o lea sa ou manatu e te saunoa mai i isi ou igoa matai ia ua faaopoopo leaga o faaeaea a ou aiga, lou nuu ma lou itumalo, ae le i faaleoa lava i totonus o le Maota nei, o lea ua ou manatu, ia se i faafogaga mai e le o mama ia i latou le faaeaea i totonus o lou itumalo.

A o lef ..

**FOFOGA FETALAI:** E faamalulu atu i lau Afioga i le Minisita, ou te manatu e le o ni ai avea le saunoaga a lau Afioga. Ia ona o le tulaga masani, ina ia iloa pea e le Fofoga Fetalai le faatinoga o le galuega, ia o le faailoa mai, aua ou te manatu a i ai tulagaí ..o tatou mea masani o suafa ia e ia te au i le taimi lenei o Manualesagalala, oi, o lea la ua sau ai ma le Mati Tuigamala Enokati. I le tulaga aloaia mo le silafia e lau Afioga, ia e tusi mai lau Afioga i le Failautusi ona faailoa mai lea, ae a faapea o lea ua ou maua atu, ia tulai mai lau Afioga Manualesagalala Mati Tuigamala Enokati Posala.

**Afioga Hon MANUSALESAGALALA MATI TUIGAMALA ENOKATI POSALA:** Faafetai lau Afioga i le Fofoga Fetalai, o lau pule lea.

Leai o le tulaga lava lena ua ala ai ona sau i a tatou pepa, o lena ua faamaonia ma ua tuuina mai foi i le afioga i le Failautusi ia ma sa kopi ai lau Afioga, ia afai e le o mauaí ..Ae o le Tulafono lenei, e le o se Tulafono faavae, o le Tulafono e Teuteu ai le Tulafono o Taavale Feoai i Ala Tetele 1960, o vaitaimi ia o i lalo o le Transport Control Board ia le faatinoga o lenei galuega, ua silasila foi i ai ua loa tausaga ua ova ma le 50 tausaga o i ai lava nei tulaga, a o se Teuteuga lenei e pei ona aumai ai le Tulafono i nai nisi o vaega e talafeagai ma lenei foi vaitau, e tele le suiga ua i ai aemaise foi o le feoai o taavale i luga o ala tetele ma le tele o taavale ua mafai ona faaofi mai i le atunu ma faaaogaina, o tatou aiga aemaise foi o atinae ma fuafuaga a le Malo ma so o se kamupani, e tele kamupani ua mafai ona galulue mo le atinae o le tatou atunu. Ia o nai tulaga masani lava o le suiga o le igoa ma le faaupuina, o le Tulafono Tau Faaofi o Teuteuga o le Tulafono o Taavale Feoai i Ala Tetele 2015 i vaega sa i ai le Failautusi Lagolago ma tagata ofisa, ae ua suia nei i le Tulafono o Pulega o Felauaiga i le Laueleele 2007. O nisi o vaega e pei ona i ai, ia o le tofiaina lea o i latou e authorise traffic officer, o lea e fesoasoani i galuega i luga o ala tetele ina ia faatumauina le saogalemu ma malupuipuia tausia tulafono i le feoai i ala tetele, tasi ia vaega, o tagata la ia o ni ofisa o lo o faatagaina e ofuina o latou togiga e tauaveina foi galuega tauave, tiute ma malosiaga o se tagata ofisa e mafai ai ona faatino ia galuega.

O le Fuaiupu lona 3 ma le 4, ia o upu lava o le suiga ia ina ia ogatasi ma le Tulafono o Pulega o Felauaiga i le Laueleele 2007. O le tasi lenei o laasaga sa..... o reforms ia sa tulai mai totonus o le tatou atunu le vaitaimi lea i le 2007 ina ua i ai le LTA, e manatua ou te iloa pe na o se selau pe oo i se luaselau tagata na....le redundancy foi lele sa faatino, ia ae tupu mai i nei tagata le tele o galuega, o lona uiga, o le tele o galuega faa-konekarate eseese e fausia ala tetele., o kamupani o lo o faamamaina alavai, o lo o moa le tafaala i moavao, o polokalame o lo o faatino nei i mea tau faatumauina o le

lelei o auala road routine maintenance. O kamupani la nei e tele, ia ua tele ai foi o tatou tagata faigaluega, o tagata faigaluega ua mafai ona galulue mai le selau ma ona tupu ia sa faamatuu ese galuega e tuu atu i tua ia le privatisation lea, ia ua tupu mai ai le afe o tagata o lo o galulue nei i totonu o le tatou atunuu, o se faiga lelei o lo o faaauau pea polokalame ia a le Malo i a latou reforms ina ia tupu galuega ma faaleleia le quality o le standard o a tatou galuega faatino.

O le isi vaega o le Fuaiupu lea e 5, ia sua loa le 60 aneniueta i le 3 tone, ia a tatou tilotilo foi i ia vaitaimi o le masani e alu e faipopo, ia a oo lava ina faitau le faitau popo, ia tau lua, tau fa, tau ono, tau valu, tau sefulu, a o lenei vaitaimi ia ua tatou tilotilo i kilomita ma mita, o kilograms ma grams, ua sua mai i imperial systems sa i ai agai i le metric systems. Ia o uiga e i ai, e le mafai ona tatou toe apaapa i tua, ua tatau ona i ai suiga fou ia, ia ogatasi, e le gata i Samoa nei a o aoaoga ua faagasolo i ai ina ia mauauluga aemaise foi o atunuu i fafo.

O le isi vaega lea e i ai ia i lalo ifo o le 25 tausaga o e feoai i taavale mamafa ia. O suesuega sa i ai le Pulega o Felauaiga i luga o Ala Tetele, o le tasi lea age group sa tele ai faafitauli, e tele ina tele ai faalavelave e tulai mai o le 18 agai i le 25 o le age group lea sa tele ina tutupu mai ai faalavelave i luga o ala tetele, ia ma o lea ua i ai le suiga lea ua taumafai i ai, ina ia aua ne i i lalo ifo o le 25 le matua o le soifua o i latou e agavaa, o ave taavale e tatau ona faaaogaina ma feoai i luga o auala tetele.

Lau Afioga i le Fofoga Fetalai, o le isi vaega o Tulafono faamalosi, o lona uiga o le faatinoina o galuega authorise a traffic officers ia e i ai i le taimi e mafai ona faatino ai a latou galuega. E le gata i lea ia fealuai le avetaavale ma feaveai lona laisene aua o le Tulafono tuai sa i ai e mafai ona tapa mo le lima aso, ona faatali lea o le 5 aso e sau ai e aumai ma faaali mai lona laisene, o le tele ia o faafitauli e feagai ai, e le gata ina fiu e tulituli ae tele foi tupe e alu ai, i le process po o le taumafai e tulituli i le Ofisa o Leoleo ma tele ai ó a o le taumafai e confirm ma le Tulafono Tau Faaofi lea ma le suiga ua i ai atunuu i fafo, ia fealuai le ave taavale ma lona laisene ona leai a lea o se isi numi i tua atu ona faigofie ai lava lea o galuega faatino ma ia tausisia le tulafono i le taimi e feoai ai i luga o auala tetele.

E i ai foi nai tulaga a oo ina tapa le laisene ae le o tauaveina e le ave taavale, e mafai lava i le taimi lena ona fesootai ma le Ofisa pe faamaonia o lea ua laisene le suafa lea ua tuuina mai e le avetaavale. Afai e faamaonia o lea e i ai ae le o alu ma le ave taavale e i ai lava fetuunaiga e tatau ona fai ae faatino pea finds sa ala ai ona molia po o le tulaga o le Tulafono Tau Faaofi lea ua faataatia atu. Ae a fai ua faamaonia mai e leai se laisene, ua i ai le malosiaga lea i le ATO e mafai ai ona ave le taavale lea, aua e le mafai ona faaauau le feoaiga lea e solitulafono pe afai e ave i ai le avanoa, ona ave lea i ai i le lotoa i Vaitele ma fai ai se fetuunaiga. O le tulaga taua lena o lo o i ai le Tulafono Tau Faaofi, afai e tuu i ai ni masina e mafai ai ona fesootai ae afai e leai ona oo loa lea i le tulaga pe afai o ia e ana le taavale. E tele lava aiaiga o lo o faasino mai e le Tulafono Tau Faaofi, e mafai foi le aia tatau a le tagata o lo o aiaia a ia tausisia lava le Tulafono o lo o faatino. E pei o le auga atoa lava o lenei Tulafono Tau Faaofi, ia faatumauina le saogalemu ma ia tausisia le feoai ai i luga o auala tetele.

Ma le agaga faaaloalo lava lau Afioga i le Fofoga Fetalai.

**FOFOGA FETALAI:** Malo faafetai i lau Afioga i le Minisita e ou le Tulafono Tau Faaofi, ou te manatu foi i le lagolago i le faamalamalamaga sa tatou feagai ai i le Aso Gafua, e talitonu le faamoemoe ua manino lenei Tulafono Tau Faaofi i le tatou Maota.

Ia lafo atu pea i le tulaga masani o felafolafoaiga a le Maota, tulai mai le sui usufono mo Aleipata Itupa i Lalo ona sosoo ai lea ma le sui usufono mo Palauli le Falefa.

**Afioga TAFUA MALUELUE TAFUA:** Faafetai lava i lau Afioga i le Fofoga Fetalai, faafetai foi i le Afioga i le Minisita. E muamua ona momoli le faamalo i lenei Tulafono Tau Faaofi e aoga ma saogalemu mo o tatou tagata, e ttau ona e maua ai le saogalemu e le gata i lea a o tagata savavali. Po o le a lava le mea tatou te taumafai i ai ae taumafai lava mo le saogalemu o le atunuu.

Malie lau Afioga i le Minisita na o le lua lava nai mataupu faatauvaa lea i le Tulafono Tau Faaofi e fai atu ai se atugaluga. E lelei ona ou tuualalo atu pea ma ou tuu mumusu atu ona sa matou feiloi foi ma le Ofisa Sili o Pulega ina ua faamalamalama le agaga o le Tulafono Tau Faaofi, o le vaega foi lea sa tuu atu i ai. O le mea muamua o le vaega lea e ttau ai le faoa faamalosi o taavale, pe a faapea e i ai se faaletonu o le taavale, aua o le mea ttau lena ma o le agaga fiafia ma le agaga faafetai ona ua ave le malosiaga po o le paoa po o le Matagaluega o Leoleo po o le LTA, o le faataitaiga o se taavale e asu e le gata ina namuasua ai isi ave taavale ma isi taavale ma faapena ai foi ona namuasua ai ma tagata savavali. E le gata i lea e faapena foi ona afaina ai le soifua o tagata i le kasa oona lea e aumai i le source o le taavale. Mo le silafia e le mammalu o le Palemene e auala atu i lau Afioga i le Fofoga Fetalai, o le kasa oona lea e le atoa se 15 minute e manava ai e le tagata soifua, na o le ea lava a o lo o i ai le faaletonu o le maliu ma le oti lava e sosoo ai. O le mea lea e momoli atu ai le agaga faafetai, o le saogalemu lea ua sai ai lea vaega, e le gata i lea afai e mafai ona taofi e se tasi o nei alii ofisa o le a tuu i ai le malosiaga se taavale e le lelei taofi o le a puipua mai ai se isi tulaga e ono tele le afaina e oo i ai. O le mea lena ou te momoli atu ai le faafetai ma le faamalo ona o le ttau lea o le aoga o lenei Tulafono Tau Faaofi, a o ona lape ia, na ona ou tuualalo atu ona o le mammalu o le atunuu e lima vaivai lava le toatele . Ou te tautala lava au i lou Itumalo o le tele o nai taavale mananaia na aumai i nai fanau mai fafo ae paga lea afai ae sau e leai se laisene ae a omai ma se tagata o lo o tietie mai e fai le laisene, ona talosaga atu ai lea ma le agaga faaaloalo afai ua tuu le malosiaga ó aua o le Tulafono Tau Faaofi fou lea ua faaofi mai, a taofi loa le taavale e leai se laisene, o le faataitaiga i le Tulafono Tau Faaofi, e mafai ona toso loa le taavale i Vaitele i le Ofisa o le ma taofia ai a uma le tolu masina e leai ona faasalalau loa lea i le pepa ma faatau loa, ona aumai lea o le tupe lena e faatau ai le cost lea na toso atu ai le taavale ma totogi ai le tu o le taavale i totonu o le compound a le LTA.

O le talosaga lea e avatu ma le faaaloalo, ae a pea a faaopoopo i ai sina vaega e faapea, a taofi le taavale ona e leai se laisene o le avetaavale o lona uiga e tatau i le ave taavale lea e ona le taavale ona saili se tasi. Ae a le maua se tagata ona toso lea o le taavale i se vaega saogalemu e malilie i ai i laua ma le alii ofisa. O le aga o lea faiga afai o se tagata o matou mai tua i Aleipata ae leai se laisene o lona uiga o le a toso i Vaitele le taavale ma tuu ai, ona toe malaga mai foi lea toe pue le isi taavale ma o atu ai i uta e aumai. E faapena

le Tulafono a Niu Sila ma Ausetalia, a faapea e taofi le taavale ona o ni faaletonu e i ai le malosiaga i le alii Ofisa e direct pe faatonu le ave taavale ia ave le taavale i le mea e malie ai le e ona le taavale to a place of safety po o se vaega e saogalemu ai le taavale.

O lona lua, afai o se defeat po o se faaletonu o le taavale, e manaia ae faaopoopo i ai sina vaega laitiiti i le Tulafono Tau Faaofi, ia toso le taavale i se fale inisinia e nominate mai e le tagata e ona le taavale ina ia foia ai faafitauli i le taavale. O le lelei o le vaega lea lau Afioga ma le faaaloalo o le saogalemu, lona lua, o le taugofie mo o tatou tagata aua e fai lava sina malosiaga lea ua tuu i ai i le Tulafono. Na ona taofi lava e le alii Ofisa o le taavale e leai se laisene pe i ai se mea e faaletonu, vili loa le tow track toso i Vaitele ma tuu ai i ina. Afai a e leai se tupe a sia tagata e ona le taavale o le a tele lava le faaletonu. O le fesoasoani atu lena i le Tulafono Tau Faaofi, o le tuualalo told the vehich to a place of safety e nominate e le owner ona manaia lea aua ua malie o ia i le mea e ave i ai lana taavale e saogalemu ai. O le isi mea ou te vaai i taavale i o e faapipii ai le mea e pei a o le tele o le fullscap lea e faapipii ai le Bond of Vehicle po o se mea e iloa ai o la ua taofia le taavale i le fale taavale lea po o le place of safety la ua malilie uma laua i ai.

O le mea lona lua o le tulafono foi lea a tatou e lima aso e ave ai lou laisene i le Ofisa o Leoleo e faailoa i ai pe a taofi oe ua leai sou laisene. O le tulaga o lo o i ai Ausetalia e 48 itula tusa e lua aso, a o Niu Sila e 7 aso e faailoa ai lou laisene i le nearest police station po o le Matagaluega o Leoleo e latalata ane. A faapea e mafai ona faaofi ai sina vaega faapea i le Tulafono Tau Faaofi, e faamama avega mo le tatou atunu, o lona uiga pei lava e tau faa Hitlar laitiiti le Tulafono Tau Faaofi, o lau faitau atu i ai a le maua sou laisene toso loa ma lau taavale ae tuu le avanoa i le tagata e ona le taavale, a leai sou laisene tuu i se place of safety ae ae aami se isi tagata e i ai sona laisene i le malie o le ofisa lea ua na taofia le taavale ona toso ai lea o le taavale i se mea e malilie uma i ai, ae sau le tagata e fai le laisene ae faamaonia e le alii ofisa lea e alu i Vaitele e faamaonia mai ai lona laisene ona faatoa matala mai ai lea o le taavale. Ae afai o se mea o faaletonu o le taavale ona toso lea i se fale inisinia e nominate e le owner o le taavale ma fai ai le latou feutagaiga ma le faaaloalo lava.

O le tulaga i le laisene i lou manatu ae le fai ai, e tuualalo atu i lau Afioga se o le tatou atunu e fai lava i le va fealoaloai ma fai i le va lelei, tatou te alolofa foi i o tatou tagata. E le faapea foi e avatu le alofa ona soona fai lea e ave taavale a o le agaga ma le faaaloalo o Niu Sila e fitu aso, seven days to produce your license in the nearest police station, o Ausetalia i Brisbane e 48 itula. O lona uiga o lea lava e tuu avanoa i tagata a o le Tulafono a tatou o le a alu ese mai le lima aso, ae a na tuu foi i ai le lua po o le tasi le aso ae produce o le faatusa pe afai o se tagata mai tua ia matou o lo o i ai le Pou i Lalomanu afai e taofia le ave taavale o le leai o se laisene, tuu i ai po o le tolu o aso ona alu lea i Lalomanu e faaali ai lona laisene. O le responsibility lea a Leoleo i Lalomanu e vili mai ai i le Ofisa a le LTA po o se tagata e fesootai i ai e fai ai se galuega a ia tagata. O le tuualalo lea ma le faaaloalo ia manuia le Fono.

**FOFOGA FETALAI:** Malo faafetai, le sui usufono mo Vaisigano Nu. 1, malie se tasi o sui usufono mo Aana Alofi Nu. 1 lea o le a ó leaga sa tulai muamua mai le sui usufono mo Vaisigano N.1, ona sosoo ai lea ma le sui

usufono mo Aana Alofi Nu. 1 ona sosoo ai lea ma le sui usufono mo Aleipata Itupa i Luga.

**Afioga TUFUGA GAFOALEATA FAITUA (Vaisigano Nu. 1):** Faafetai i lau Afioga i le Fofoga Fetalai mo le avanoa, faafetai foi i le Minisita ma le Matagaluega mo lenei Tulafono Tau Faaofi matagofie aua le saogalemu o taavale e feoai i luga o auala tetele a le Malo. O le manatu faamolemole, e le o i ai i le Tulafono Tau Faaofi le teuteuga o lau mataupu ae ou te iloa e avanoa i le lauga faalauaitele. O le saosaoa o taavale i auala o le Malo i laina tai lua itu, maimau pe ana sau ai i le teuteuga o le Tulafono Tau Faaofi se fuaiupu e teuteu ai le Tulafono Autu i le saosaoa o taavale e feoai i auala tetele a le Malo e tai lua laina i le itu. Ona e matauina ma le faanoanoa pei a o tagata i le laina ogatotonu pei e eva ai, e o lemu ai, ona o atu lea o nai tagata nei e fia o i faalavelave faafuasei pei ua over take atu i le laina i fafo. O le vaaiga ma le faanoanoa e le matagofie se matamata po o se maihoa foi, e pei ona tatou agai atu i atunu i fafo ma matauina ai o aga lava ia a fia saosaoa ua o i totonu ae a fia tele gese ua o i fafo ae a fia over take ua alu i le laina pito i totonu. O le faanoanoaga lau Afioga, maimau le Teuteuga o lenei Tulafono Tau Faaofi pe ana i ai se fuaiupu i saosaoa o taavale e lata i le taulaga.

Ma le faaaloalo lava faafetai mo le Tulafono Tau Faaofi.

**FOFOGA FETALAI:** Malo faafetai, tulai mai se tasi o sui usufono mo Aana Alofi Nu. 1, Afioga Leaupepe Toleafoa Apulu Faafisi.

**Afioga Hon LEAUPEPE TOLEAFOA APULU FAAFISI:** Malo faafetai mo le avanoa. O lenei Tulafono Tau Faaofi ou te matua lagolagoina ma e momoli le agaga faamalo i le Minisita ma le Pulega ona o le faatulai mai o lenei Tulafono Tau Faaofi e siitia ai le puipuiga ma le saogalemu o o tatou tagata feoai. E le gata ia i latou o e o lo o aveina taavale a o i latou e feoai i auala tetele aua ua tele ina maumau le soifua. E le gata ia i latou e matutua ae faapea foi alo ma fanau ona o le faatamala o le o aveina le taavale afi. E i ai itu e manatu e fautuaina ai le Matagaluega ona o le tulaga e pei ona i ai, ua faamuta le avanoa ona ua silasila le Matagaluega, sala ina silasila i ai le Matagaluega ona o le silafia e maua mai i faalavelave ua uma ona tutupu lea ua mafua ai ona tutupu matagi i liu o vaa ma faatulai mai ai lenei Tulafono Tau Faaofi taua ma le aoga. E sao foi le Matagaluega ma le Pulega, ae tatau lava ona i ai se avanoa aua o le a avea le faatamala o le toatasi, toalua, toatolu ma mea e faasalaina ai le toatele, aua e matau atu sa fesiligia foi le Pulega pe o le a se mafuaaga ua suia mai ai i le lima aso pe fitu aso, ae faapea ua fiu foi le Matagaluega. O uiga lava ia o le soifuaga e le taga tasi i lo tatou atunu, masalo e sili atu atunu i fafo. Ae o le pagatia o le a feagai ma i tatou, e matamuli foi se lagona pe a fuafua i le paia ma le mamalu o le atunu i e e faapea ona mautofi ae oso i le taavale ae leai se laisene, galo ona ave le laisene, aua e ono tupu le tulaga lena lau Afioga i le Fofoga Fetalai. Masalo e leai se tagata e mafai ona ia tauavea le laisene i taimi uma, e oo lava i taimi faafuasei. E pei e mafua ona maua se manatu ona o tulaga faapena, taimi e faafuaseia ai i ni faalavelave tupu faafuasei, ae ta oso atu i le taavale aumai le taavale ae maua ta ita e le leoleo e leai se laisene, ia ua tupu le faalavelave ua loka i Falealili le taavale ae pue se pasi a le avetaavale. Afai e mafai ona faaauau le tulaga lea e pei ona saunoa i ai le Afioga i le sui mamalu e pei ona

faatoa maea ona saunoa, iaí í í .aua o tatou lava lea ua faigofie le fesootaiga i telefoni ma ualesi, ae pe mafai ona saili foi leaí í í aua e le tutusa le faasalaga o le tagata e i ai le laisene ae e le o tauaveina le laisene avetaavale i le taimi lea, ma le tagata e matua leai lava se laisene avetaavale ae o la e tauaveina le taavale. E tatau ona maua se fesootaiga mai le ofisa poo Kome lea tulou le paia o le Fonotaga, po o Kome lea e i ai moi se laisene, aua e fua lava i le talanoa. Faamolemole lau susuga i le ofisa, o au e i ai le laisene ae ua galo. Sau nei lava ae ua galo ona o le faalavelave faafuasei. Ona ma fetuunai lea pe mafai ona faafesotai mai le ofisa, faapea sei silasila ifo lava ia Kome Simi lea eí í ona fai lea o se fua i ai. Ma le tagata e matua leai lava se laisene ae o lea o le a fai i le ofisa, se ua ou sau ae galo, o au nei e fai le laisene. Se fetuunaiga e mafai ona fetuunai ai, ina ia faasaoina ai tagata amiontonu ae o lea o le a silasila le Tulafono ia i latou o lo o faapena ona soifua ma ola ai i le agaga lea o le le faamaoni. E pei o tulaga lena, pe i ai se isi teuteuga po o le a se isi tulaga e mafai ona laveaina mai ai i le itu lea. E le gata i lea o le itu e pito sili ona matautia, masalo e maua se sefululima pasene o taavale feoai i tua, afioaga i tua e le o laiseneina. Tama tonu lava lena o le taimi e maua ai pe laisene le avetaavale pe le laisenea le avetaavale, tama la na e tatau ona loka, faaaoga la i ai le malosiaga o le Tulafono lea. Aua o la e feoai i tua, tele mea o le leai o se moli tasi le pau e ai o le taofi. O latou na o lea e mafua ai ona tutupu faalavelave, tama foi ia e le popole i ai pe alu alu lava faalava i le auala, tulou le paia o le Fono ma le faafogofa mai a Samoa, e aoga la i ai le Tulafono lea. Loka loa i le taimi lena. E tatau ona teuteu pe o le a foi se isi fuafuaga i le Tulafono, e faapea toso ane, e i ai le aia tatau i le ofisa e toso ane ai i se nofoaga saogalemu lata ane, ina ia mafai onaí ..tuu ifo i se meaí í e pei lava foi ona saunoa le sui mamalu faatoa maea nei, toso ane i se mea e malu lata ane, i lo le toso mai lava iinei, toso mai le taavale mai Falealili iinei i uta i le mea e i ai le ofisa autu, toe sau Kome lea mai tuaí í .E pei o nai manatu na, e silasila i ai le Pulega nei avea le amio faaletonu lea o nisi vaega o le atunu e faasalaina ai le mamalu o i latou e faapena ona tausia le amiontonu ma le Tulafono aua le saogalemu o o tatou tagata. O le isi itu, o le age aua nei lalo ifo o le luasefululima tausaga e mafai ona ia aveina le ituaiga foi lea o le long wheel base foi lea o le dyna po o le pasi. O le luasefululima tausaga iaí í í ae pei e faapea lou taofi, e a pe a tuu i ai se teuteuga foi lenei, ae o le a se faiga e mafai ona silasila atu le Pulega ma le Pule sili, o le luasefululima lea po o le luasefulufa e agavaa aua e le tutusa uma le soifuaga o tagata ma o latou tausaga. O le isi tagata e oo lava i le onosefulu tausaga e leai lava se mafaufau, ao le isi tagata e amata lava ona maua le mafaufau mai le sefulufit uvalu sefuluiva. E tatau la ona fetuutuunai faapena. Aua pe selau luasefulu tausaga a le mafaufau lava e le mafaufau. Ae pe sefulufit uvalu sefuluiva. E tatau la ona fetuutuunai faapena leí í

**Afioga Hon Aea Peniamina Leavaiseeta:** Lau Afioga i le Fofoga Fetalaií í

**FOFOGA FETALAI:** Malie lava le sui usufono mamalu, se i tuu atu le avanoaí í

**Afioga Hon Aeau Peniamina Leavaiseeta:** Se i avatu le faasaoga. Ou te le iloa i ai pe fetaui. O le faasaoga e faapea, E i ai le mafaufau ae le faaaogaina, leaga e tofu uma lava tagata ma mafaufau.

**Afioga Hon LEAUPEPE TOLEAFOA APULU FAAFISI:** Ua ou musu e tau le mea lea ae o le mea sili o lea ua tau mai e si ou uso. E i ai la le mafaufau ae le faaaogaina. Pe fia lava sefulu tausaga ae tuu i ai ae afai lava e le fiafia e faaaoga le mafaufau, e le faaaogaina se mafaufau. Ao le sefulufitu sefuluvalu, í í a soifua mai lava le tamaititi e faaaoga lona mafaufau lelei, ia o lena, ao lea o le a faasala lava sei atoa le luasefululima tausaga. Ao ia tonu, o lona tama e ana le taavale. O le a la le tonu, e sue mai le tagata faigaluega amioleaga ae tuu le atalii amiolelei lea e i ai. O nai fautuaga na sei silasila i ai, leaga fai mai le upu a le atunu u soo lava le moa sope i le moa sope. A lelei lava le tama e lelei foi le atalii. Afai lava e faavalevalea le tama e faavalevalea foi le atalii. O le fautuaga lea faafetai.

**FOFOGA FETALAI:** Malo faafetai. Tulai mai le sui usufono mo Aleipata Itupa i Luga ona avatu ai lea mo le sui usufono mo Falealili.

**Tofa FAGAAIVALU KENRICK SAMU (Aleipata Itupa i Luga)**  
Faafetai atu i lau Afioga i le Fofoga Fetalai mo le avanoa e taumafai atu ai foi se sao puupuu i lenei Tulafono. E muamua lava ona momoli le faafetai i le Minisita aemaise foi o le Matagaluega e tusa ai foi ma le teuteuga o le Tulafono. Pau lava le mea ou te fia faafesili ai i le Minisita, ona o tausaga ia ua aumai e mafai ai ona aveina ia commercial license, aua a fua i ai o le sefulufitu o tausaga o leí í e te aveina ai lau taavale totino. Ao le luasefulutasi o tausaga e mafai ai ona e faasee atu i leí ..ave le pasi po o le taxi. A vaavaai atu i le luasefululima o tausaga, e pei ua fai si umi tele o lea taimi. A fua i ai i le fa tausaga lea e tapena ai le tagata e ave lana taavale totino ma sauni ai mo le aveina o le pasi po o le taxi, ou te talitonu ua lava ma totoe. Ae a luasefululima tausaga ua fai si umi, aemaise lava o nai aiga e tua foi ii . o le latou lea galuega o le avetaavale, e faigaluega i pasi ma taxi. Afai e tolu tama o se aigaí í ai seiloga e sefulu tausaga e faatali ai ia, ona faatoa maua lea o laisene ave pasi ma ave loli. Na o le pau lena o se vaega o lea eí í .e a pe a tau tuutuu mai te isi i lalo po o le luasefulutolu nai lo le luasefululima. Ma le faaaloalo lava faafetai.

**FOFOGA FETALAI:** Malo faafetai. Tulai mai se tasi o sui usufono mo Falealili, Tofa Tusa Misi Tupuola.

**Tofa TUSA MISI TUPUOLA:** Lau Afioga i le Fofoga Fetalai, faafetai mo le avanoa. Ou te tulai atu e fia faaali foi se manatu e tusa ma le tatou Tulafono Tau Faaofi e pei ona tuuina mai i le Maota e tusa ma lenei itula o le afiafi. I le agaga faaaloalo lau Afioga ou te manatu e faapuupuu lava se manatu e lagolago tele i le toe teuteuga lea o le Tulafono o taavale afi. Ua loa foi ona galue i le Matagaluega o Leoleo, ua loa foi ona galue i le Matagaluega o Felauaiga. Ae o lea e pei faatoa tali mai le Afioga i le Minisita, faapea foi le Pulega o Felauaiga i le Laueleele i le Afioga i le Pule sili i le tagi mai pea o le atunu u. Ona o le tele o faalavelave e tulai mai i pasi ua mafua ai le maliliu o alo ma fanau o le atunu aemaise o tagata matutua. O

lea la faatoa tali mai le Tulafono, faafetai tele i lau Afioga i le Minisita aemaise foi o le Pulega o Felauaiga i le Laueelele ona o se tofaí

**Tofa Lealailepule Rimoni Aiafi:** Lau Afioga i le Fofoga Fatalai, o le mea e fia faamalamalama.

**FOFOGA FATALAI:** Malie lava le sui usufono mamalu, se i tulai mai le sui usufono mo Faleta Sisifo i le faauilavea.

**Tofa Lealailepule Rimoni Aiafi:** Faafetai lava i le Afioga i le sui usufono mamalu. Ua ou mataina, e tasi lea sui usufono toeitiiti sefulu tausaga o i le LTA pe e le i tuitui i le Afioga i le Minisita i lea taimi e fai le Tulafono, faafetai lava.

**FOFOGA FATALAI:** Aua e te amanaia le faauilavea a le sui usufono mamalu. O le taui o lou faamaoni o lea ua e faipule. O le agaga lena na lua ma le faamaoni sa feagai ai lau Afioga. Tulai mai e faaaauau le saunoaga.

**Tofa TUSA MISI TUPUOLA:** Lau Afioga i le Fofoga Fatalai. Faafetai o le a ou usitai i lou finagalo. O le tulaga lea e pei ona tulai mai i le Tulafono lenei i le toe teuteuga o vaega ia, o mea taua ia o lea ua amata ona tulai mai, ina ia famalosia atili ai pea le galuega a le Pulega o Fealuaiga i le Laueelele aemaise i latou ia e taua o Authorize Traffic Officers i le latou va fealoaloai foi ma le Matagaluega o Leoleo, i le faatinoina o le latou tiute. Lea la e pei ona i ai le latou malosiaga faale-Tulafono, faafetai tele i lenei Tulafono toe teuteu. O le isi vaega taua ona o le maua ai o le avanoa e mafai ai ona pueina ia taavale ia o lo o maua pea i le asu, i luga o le aualatele, aemaise la o le faaleoleoa o a latou laau pese i le Aso Sa aemaise o afiafi ua fai faigalotu. Tulou lava le gagana, o le mea lava lea o lea ou tulai mai nei i le tele o nisi o avetaavale ona o suiga fou ua mafai ona oo mai i totonu o le atunuua ma ua le mafai ai ona foia le tele o nei faafitauli. E lagolagoina foi e lenei sui usufono le tulaga o le tausaga e pei ona aumai. E eseese lava finagalo o sui mamalu. Ao le tele o taimi e fai ai polokalame o nei mea o le saogalemu i luga o alatetele, ona o le taua tele. O le tagi lava lea ma le talosaga e aumai e i latou matutua aemaise o matua, sei silasila ane i tausaga o mea nei o avepasi, public service vehicles ona ua laiti tele ua luasefulutasi ua laititi tele, ae a luasefululima tausaga agai i luga, ona tulai mai lea o se isi mafaufau lelei. Leaga o le taimi lenei ua silafia uma lava e le Maota, o le tele o avepasi tulou lava le gagana ma le tala, e mimita vale. O i latou o tagata avetaavale e le taupulea. Ae galo ia latou o la e uu i o latou aao le tolusefulutasi le pasese i totonu o le pasi i taimi uma. O lea ou te manatu o le taua tele lea o lenei toe teuteuga, ona ua mafai ona faatu mai ai nei tulaga lelei aua le agai i luma o le saogalemu o a tatou aualatetele. Ona fai atu ai lea o se lagolago a lenei itumalo. O le tatalo lava, ina ia mafai ona maua pea o le avanoa e mafai ai ona tuuina atu i avetaavale latou te faatino ai ni faamatalaga sao ma ni faamatalaga moni ma le atoatoa i ai latou o lo o gafa ma le galuega o le faamalosiga o Tulafono i luga o aualatetele, ina ia faigofie ai le latou galuega. O si faamatalaga e puupuu lava e lagolago ai i le Afioga i le Minisita ma le Pulega ma le latou Tulafono toe teuteu. Manua tele le Fono.

**FOFOGA FETALAI:** Malo saunoa i le sui usufono mamalu mo Falealili. Tulai mai le sui usufono mamalu mo Faleata Sasae.

**Tofa AVEAU TUALA LEPALE NIKO PALAMO:** Faafetai i lau Afioga i le Fofoga Fetalai, faafetai foi i lau Afioga i le Minisita mo lenei Tulafono. E puupuu lava foi se manatu i le Tulafono atonu o lea ua tele ina saunoa nisi o sui usufono i nisi o vaega o le Tulafono. Ae i ai nai vaega ia o le Tulafono ou te fia fesili atu ai i lau Afioga. O le vaega muamua o le vaega lea e sau i le 4 lea e faapea mai, ðe maua le tagata e leai se laisene.ö Lau Afioga i le Fofoga Fetalai ua saunoa le Afioga i le Minisita, a maua le tagata e leai se laisene o lea ua maua le avanoa e mafai ai ona vili i le Matagaluega e tau mai po o i ai se laisene o le tagata lea. Saunoa foi le Afioga i le Minisita, a faapea e maua le tagata e leai se laisene, pe ua galo foi lou laisene e mafai ai ona faamalosia lau taavale. Ae a tagai i le Tulafono lea e aumai e le o i ai se vaega faapena i totonu o le Tulafono. E pau lava le mea lea e faapea mai ai le Tulafono, e faasala oe, ae e le o fai mai le Tulafono e impound ai lau taavale pe a faapea e leai sou laisene. E pau le vaega e faamalosia ai lau taavale lea e sau i le Tulafono, lea ua sau lelei lava ua faamalamalama mai ai, mea e mafua ai ona faamalosia lau taavale. Pe afai lea ua maea se suesuega, a se alii ofisa o lo o i ai le aia tatau i lalo o le Tulafono e faatinoina, ua ia silafia ai, e le fetaui ona alu le taavale lea, faatoa mafai lea ona faamalosia lau taavale i lalo i le vaega lea o le Tulafono. O le mea lea e ala ai ona ou fesili, ona o le impound lea e sau ai lalo o le Tulafono fua i le faamalosia o taavale, taavale e le fit e le tatau ona fealuai i luga o le ala tele, a o le taavale lea e fealuai ai le tagata e leai se laisene, o lena lava ua uma o la e laisene lelei lava le taavale ia, o la foi e fit e fealuai, pau lava le faaletonu lea e i ai, o le tagata lea e avea le taavale e leai sona laisene. O lea ou te talosaga atu ai pe fautua atu ai foi i le Afioga i le Minisita ma le mamalu o le Matagaluega, e a pe a i ai se isi avanoa i totonu la o le vaega lea e 4, ina ia mafai ai ona vili le tagata lea i le fale pe vili i se tagata foi lea e iloa e i ai sona laisene, e sau e faaauau atu le taavale lea i le fale, e foia ai le tele o mau galuega o faafitauli o le a faatino, aua afai ae lavea le taavale lea i lalo o le Tulafono lea o le faamalosia, ia o lona uiga ua lavea i lalo o le process lea o le faatauga o le taavale, e tolu loa masina e le avatua ai lau taavale, e mafai loa ona faatau e le ofisa, e mafai ona auction e le Matagaluega lau taavale, a uma atu le auction muamua ma le vaega lea e le mafai, e pule lava le ofisa po o ai e faatau ai lau taavale, a maea loa ona faatau lau taavale o le tupe e maua i fee ia, ia o tupe na e avatua ma oe. O le mea lena e ala ai ona ou fesilgia le vaega lea e 4 pei ona saunoa ai le Tulafono, e tatau ona toe tagatagai ifo i ai, e fai lava sina malosi laitiiti o le vaega lenei, ona e pau lava le afaina o le vaega lea, na o le tagata e leai se laisene, ae pe mafai ona tuu ai se isi aua le faamalosia le taavale lea, pe afai i lalo o le suesuega a le ofisa o lo o faapitoa i le vaega lea, o lea lava e meet le Tulafono 72 i lalo o le malosiaga o le taavale lea, o lena e lelei le taavale, o le taavale fou lava o la e fealuai ai le tagata, e pau lava le mea lea e tupu i i, o lea e ona le avetaavale, pe leai se laisene a le avetaavale. Pe le mafai la ona fai se fuafuaga faapena, e vili i le aiga ia pe vili ia pe oso se leoleo o avanoa e molimoli ia lea foi taavale i le fale, ina ia foia ai lea vaega o le Tulafono.

O le isi vaega lena o le Tulafono lau Afioga, silasila ifo lava i le faatinoina o le tolu masina lea. E i ai lou manatu, e a pe a tuu atu i le lima masina, e silafia foi o le mea lea o tau o taavale e tosaina taavale nei pe afai e maua lau taavale

o lea foi ua saunoa nisi o sui usufono i se auala e faafaigofie ai lea vaega, e fai lava sina taugata o mea nei o tow trucks, e fai lava sina taugata. E fai ifo le pili, e avatu le taavale lenei po o leai o seí ..po o le asu e pei ona saunoa se isi o sui usufono, ae uma ifo le tupe e aumai ai i tua le taavale lea, ua le mafai ona totogi, ua le mafai ona totogi e le tagata lea o le a i ai nei i luga o vaega ia o le a faatino. Faafetai o lea ua saunoa nisi sui usufono i ni auala e ono faafaigofie ai lea vaega. Ae na ona ou toe fautua atu ma talosaga atu i le Afioga i le Minisita ma le mamalu o le Matagaluega, se i toe tagai ane lava i le vaega 4 lea o le Tulafono faamolemole, pe le mafai ona toe ave i ai se faamamaavega i le paia ma le mamalu o le atunu. Ma le faaaloalo lava.

**FOFOGA FETALAI:** Malo faafetai. Ia le sui usufono mo Aana Alofi Nu. 3 le sui usufono mulimuli ona tali ai lea o le Minisita. Tulai mai le sui usufono mamalu.

**Afioga TOEOLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fatalai mo le avanoa. E pau lava se vaega lea e oo i ai se manatu ona o lea faatoa faagaso le tatou Tulafono e sui ai ia metric, ae talosagaina ai le toe aveeseina o le vaega lea e sau i totonu o lea e faa-Tone mai, ae faaaoga ia tatou measurement fou ia ua i ai, faafetai.

**FOFOGA FETALAI:** Oi, ia malie lava lau Afioga i le Minisita ua vavevave atu a o lea e i ai nai isi sui usufono. Tulai mai le sui usufono ona sosoo ai lea ma le sui usufono mo Anoamaa Sasae.

**Tofa LEALAILEPULE RIMONI AIAFI:** Lau Afioga, leai e faapuupuu. Faafetai lau Afioga mo le avanoa, o nai vaega ia lau Afioga i le Minisita ae faafetai lava mo le Tulafono. Ae e le toe oo foi se faamatalaga i le vaega lea o le tausaga, aua sa i ai se manatu e ave i ai se faamatalaga. Afai na fai le faaiuga a le Matagaluega i luga o ni faamaumauga, e faapea mai e 80% o faalavelave tau taavale e pasi na mafua mai o ni tagata e 21 tausaga agai i le 24 tausaga, ia ua talia e le sui usufono, aua o suiga faapenei e tatau ona i ai ni mau maumaututu e fai ai.

O le mea lea o le impound lau Afioga i le tosaina o taavale, ia faafetai e le o sau ai i i ma le mea lea o le paka sese, aua ou te talitonu o le mea la lea o le a lavelave loa le Tulafono, aua pei o le mea foi lea o lo o fai i atunu i fafo, ae faafetai o lea e faaaoga na o taavale. Pau lava lea o le faafesili lau Afioga, o lona uiga o le vaega lea o le auaunaga, lona uiga e outsource i tua e fai i tua e tagata foi ia o lo o fai a latou taavale toso, pe a, aua e le o i ai ni meafaigaluega a le Matagaluega i le taimi nei. Ae o le mea lea e tatau ona tagai i ai lau Afioga, o le auga atoa lava o le auaunaga a le LTA po o le Matagaluega o le saogalemu, safety, tasi lea vaega e tatau ona tagai le Matagaluega o parking o le mea e paka ai taavale i le taulaga, ua le iloa e tagata po o fea tonu ona e le gata i nofoaga e paka ai taavale, a o nofoaga nei pei o le fale lea e tatou te i ai le mea lea ua tatou i ai nei, o i i le development bank, ua le iloa e tagata faigaluega po o fea e paka ai, a omai foi tagata faigaluega paka i i a latou taavale ae omai tagata e faaaogaina e omai i ni feau foi ia e omai ai, ua le iloa la po o fea foi e paka ai latou. O le mea lea ua tatau ona tagai i ai lau Afioga ma le Matagaluega, po o fea se vaega tonu o le

taulaga e tatau ona fai ni tatou paka foi ia ni multi-storey parking e paka uma ai taavale a tagata ua fai taavale uma tagata Samoa.

O le isi vaega lau Afioga o mea ia o patupatu, e i ai patupatu ua le toe valia ua le toe saogalemu mo tagata faigaluega ma tagata feoai i le auala, e talitonu lau Afioga o lena ua i ai le fuafuaga a le Matagaluega e aveese, ia o se mea lelei foi lea mea e faatea ese ai lea mea i lenei taimi, se i vagana patupatu o lo o moomia mo aoga ma tulaga faapena, aemaise lava i le kolosi lea e i le taulaga i luma o le Development Bank, ia se i tagai ane lau Afioga i aso uma ma taimi uma i tagata e feoai ai, a o isi vaega o le Tulafono, e ave i ai le lagolago a lenei sui usufono, pau lava lea lau Afioga ua matauina le tele o Tulafono a le Matagaluega, o se mea lelei tele, pe le mafai ona consolidate, tuufaatasi i se Tulafono tele e tasi ina ia faigofie ai foi ona faafoe e le Matagaluega ia malamalama ai foi tagata lautele. Ma le faaaloalo lava faafetai.

**FOFOGA FETALAI:** Malo faafetai. Ia tulai mai le sui usufono mo Anoamaa Sasae, ona tuu atu ai lea o le avanoa.

**Tofa ALO FULIFULI TAVEUVEU (Anoamaa Sasae):** Faafetai i le avanoa lau Afioga i le Fofoga Fatalai. Ua ou tulai atu foi e avatu se fesoasoani i lenei Tulafono matagofie ma le taua. E momoli atu foi le faafetai i le Afioga i le Minisita ma le Matagaluega, sa toe teuteuina lenei Tulafono, ae ona o le Tulafono e teuteuina ina ia lelei, e pau lava sina au fesoasoani e tuuina atu i lenei Tulafono.

Lau Afioga i le Fofoga Fatalai, o tulaga lava o taavale nei e feoai aemaise lava pasi, atonu o le tele o le pisi o le auala, a o lea foi pisi, o lo o i ai lava ma le faaletonu pei ona lamatia ai le soifua o tagata. O pasi, ia a alu atu lava le pasi e 15 minute e tu i luga o le aualatele e amata atu lava i inei i Apia e tau i tua, e tutu ai lava se i uma i luga le pasese lea e lau ona alu lea, ia a o le tele o le faaletonu o lea tulaga a o lea e tutu mai tua taavale e fia o. E lua la mea e maua, o le alu atu loa tipi le taavale ma tupu ai le faalavelave. O lau lea fesoasoani i lea Tulafono, ina ia toe tagai pe talafeagai, e i ai le vaega po o se tulaga e tau tuu ai i tua pau e lua ia e i le autafa ina ia maua se avanoa o taavale ia e i tua, e vaai lelei ai ma kilia lelei ai le auala, ia ae le soona alu atu ai o le isi taavale i tua, ia ona tupu ai lea o faalavelave.

Pau lena o lau fesoasoani pe a talafeagai pe a tusa ai ma le finagalo o le Minisita ma le Matagaluega, ae tuu ai i totonu lea vaega ina ia saogalemu pea le feoaiga o tagata, ma lou faaaloalo.

**FOFOGA FETALAI:** Malo faafetai. Ia tulai maia lau Afioga i le Minisita e ana ia le Tulafono.

**Afioga Hon MANUALESAGALALA MATI TUIGAMALA ENOKATI POSALA:** Faafetai i lau Afioga i le Fofoga Fatalai, faafetai foi i nai mataupu laga e talafeagai ma le Tulafono, ma nisi foi o fautuaga mo nisi o vaega lautele a le Pulega e faaleleia. O le mea lava e taua o le tele o Tulafono, o Tulafono e Faatonutonu ai ma Tulafono Autu, ia o le mea foi lea o lea e agai i ai lo tatou Malo, ona pau lava lea o le mea na tusi i aao o le Atua o le Tulafono, na faasino ia Mose e alu i luga o le mauga e aumai le papa maa o la e tusi ai Tulafono, o lona uiga e le o se mea faatoa fai nei, e le o le agaga foi

lea o lea eí í leaga o lea e faavae ai le tatou Malo, ia fau Tulafono, ina ia mafai ona malupuipuia, a o le isi foi lea vaaiga o aiaiga e faatumau ai. E pau lava le mea lea na aumai i le Tulafono, aua le gaoi, ae ou te iloa ana tatou talanoaina lena mea faapea, a faapea le ituiga gaoi foi lea, ae leai e pau lava le mea na aumai i le Tulafono a le Atua, aua le gaoi.

O le mataupu laga, ou te manatu o le tolu masina lea e tuuina atu, o le tolu masina mo taavale ia e le i laiseneina, e ave ai i Vaitele i le mea o lo o i ai le lotoa. E le tatau ona oo i le tolu masina pe afai o se tagata o la e manumanu i lana meatotino, e tatau ona oo mai e talanoa i le Pulega ia ma fai fetuunaiga, e mafai ona omai ma lana inisinia faapea mai, ia o lea ua tapena o le a faaleleia vaega ia ma ave e pasi, ona aumai ai lea e pasi, ona tuu ai lea o le avanoa e mafai ona tago ai e pasi, a o le tolu masina lea e aumai, ia o le matua le oo mai lava e vaai le taavale lea ua toso mai i le lotoa, o lona uiga ua tuuina mai ua tiai mai le taavale, e umi tele lenei tolu masina e fuafua ai pe afai o se tagata o la e lagona o lana taavale lea e manumanu i ai o lana meatotino.

O le tulaga i laisene, o Niu Sila ma Ausetalia a leai se laisene ua molia, a e le alu foi ma lou laisene i le taavale e molia oe, e le pei o suesuega na sa feagai ai ma le Pulega ma a latou sailiiliga ia sa fai. O i la pei e tuu i ai le avanoa, sa faamatala atu e mafai la ona fesootai, a maua oe aumai le igoa o la e alu ai i le lesitala a le LTA o la e laisene oe, ia ona siaki laia, e siaki lava i le taimi i luga o le auala, afai e maua e sao, ona pau lava le mea o le a molia ai ia, o le le fealuai ma lona laisene i le taimi lea, ae le faapea o le a toso le taavale e ave e impound, e leai, e le aveesea ai le taavale o le a tuu lava i ai le avanoa i le avetaavale, a ua molia ia, o le le usitaia o le Tulafono o le 1 fealuai ma lona laisene, afai e siaki atu e le o confirm mai o se tagata o lo o umia se laisene, e le mafai ona faaauau le malaga ma nisi o feaveai i totonu e le faatuatuaina ma solitulafono ma aafia ai le soifua, e tatau la ona ave le taavale lea e tuu i o alu atu le tagata e ona po o se tagata e ona le laisene, ia ona faatoa mafai ona faamatuu mai, ae le mafai ona faaauauina le faigamalaga i le spot o la ua maua ai, e le o se tagata e i ai sona laisene tausia le tatou Tulafono.

O le speed limit lea na talanoa mai ai, ia o la e i ai le tatou Tulafono o le saoasaoa faatulagaina e le o faatulaga la i luga o lanes o la e i luga i totonu o le taulaga e 15 maila, a o tua atu e 35 ia maila, atonu foi o fautuaga o lea e i ai le faamoemoe o le a faaauau le tatou four lanes lea, atonu o le a tapena i ai i se tulaga lea i nai regulations e fua i ai le feoai i le faaaogaina o tatou four lanes lea.

O leí ..

**FOFOGA FETALAI:** Malie lava lau Afioga i le Minisita.

**Afioga TUFUGA GAFOALEATA FAITUA:** Lau Afioga, ona o lea sa ou lagaina ia o le saoasaoa o taavale i laina ia sa ou taua, o lona uiga o lau faamatalaga, o se eseesega o saoasaoa o taavale ia i le laina i fafo ma le taavale e o i totonu, e le mafai ona tasi se saoasaoa e o faatasi ai, aua o le a tupu ai pea le mea lea o le o o taavale e lua poloka mai ai le auala, ae faatelevave totonu ae faatelegese fafo, ma le faaaloalo lava.

**FOFOGA FETALAI:** Ia lafo atu ia, leaga o lea e le i faai mai le saunoaga a le Afioga i le Minisita, ou te iloa eí ..tulai mai le Minisita.

**Afioga Hon MANUALESAGALALA MATI TUIGAMALA ENOKATI**

**POSALA:** Ia o le vaega tonu lava lea sa talanoa atu ai, o le taimi lenei o le Tulafono la e i ai e 15 i totonus o le taulaga ae 35 ia fafo atu, ae a fua i isi tatou pei o le extension lea e fai o le four lanes, ou te iloa o se isi vaega se i tau fetuutuunai ai ia le feoaiga i luga o le four lanes lea o le a i ai, o lena e tuu mai i lalo o le tulaga o tatou fautuaga mo le agai i luma.

O le 25 tausaga le limit lea e i ai, e na o pasi lava, ae le o aafia uma ai e pei o le mea lea sa saunoa i ai sui usufono, leai na o pasi lava lea e ave i ai le faamuamua, ona o le popolega, o le soifua o e na te tauaveina, o pasi ia e i ai nei e 30 pasese, o lona uiga la a le faatumauina leí í ia o le popolega lena o lea e i ai, e tatou te tuu avanoa foi loa, ia ona le tausisia foi lea o le Tulafono ua i ai, a o le manumanuga e puipuia o tatou tagata femalagaai le mamalu o le tatou atunuu. E pei o nai faapupulaga laiti na o nai mataupu sa laga, pei o isi mea e tele ia sa aumai, o mea e tatau ona faaleleia mo femalagaiga, ou te faafetai atu ai i le Maota nei, ae faamalulu foi pe afai ua i ai se mea ua paovale. Ia manua lenei aso.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Taavale Feoai i Ala Tetele 2015 i lona faitauga faalua.*

**FOFOGA FETALAI:** E tusa ai ma Tulafono Tumau, o le a tuuina atu le Tulafono Tau Faaofi i le Komiti o Galuega, Felauaiga ma le Siosiomaga mo le iloiloina ma toe lipoti mai i le Fono Aoao i se fonotaga o lumanai.

#### **TULAFONO TAU FAAOFI O LE FAAUIGAINA O TULAFONO 2015 - faitauga faalua**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Faauigaina o Tulafono 2015 i lona faitauga faalua ma ou te fia tautala faamalamalama i ai.*

*Faaluaina e le Minisita mo Tina ma Tamaitai, Atinae o Nuu ma Afioaga ma Agafesootai.*

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, lau Afioga i le Taitai ma le Sui Taitai o le Itu Agai ma lena Itu faapea foi ma lenei Itu, ua ou tulai atu e faia sina upu puupuu i le Tulafono Tau Faaofi lenei o le Faauigaina o Tulafono 2015. Ua 41 tausaga talu ai, o lea faatoa teuteu le Tulafono sa i ai i le 1974. O le dictionary lenei o Tulafono uma lava, o le lolomi fefiloi e agai tonu i le faauigaina o upu pe a lavelave ma le malamalamalama so o se isi lava i

upu o lo o faaaoga i le Tulafono Tau Faaofi ona silasila loa lea i le Tulafono Tau Faaofi lenei o lo o aumaia ai le faauigaina sao o upu, Interpretation Act. O le aso ananafi, sa tatou talanoa ai le isi Tulafono Tau Faaofi ma fai ai finauga, fai mai le isi, o le Tulafono lea o lo o talanoa mai i tagata, e le o taua ai ni kamupani, ae tu ae le isi o le Komiti ma faasao, o lo o i lalo o le Tulafono, a talanoa loa le Tulafono i tagata, o le kamupani lava lena. O lea la ua aumai le Tulafono Tau Faaofi lenei e faamalamalama ia i latou e le o le malamalamala i le faaaaogaina o upu o lo o faaaoga i totonu o so o se Tulafono a le Malo. O lona uiga o le a lava le upu, o lona uiga e faasino i le fausaga o le gagana, ma ona faapogai uma lava, e aofia ai le tulaga i le sigila, o le pelulale ma le kenera. O upu faigata ia na o latou e lelei le Igilisi e faa-Samoa mai, lea e talanoa i ai le Tulafono Tau Faaofi i le faa-Samoa. A talanoa mo sina faataitaiga i le kaseti, faapea mai, e tatau ona kaseti. A faapea la o lea ua leai se kaseti a o lea ua sau le savali, o le Tulafono Tau Faaofi lenei e tau atu ai, o le kaseti po o le savali, o le mea lava e tasi. O lona uiga, o lea ua tau atu i le Tulafono Tau Faaofi, o le aitu lava o le moomu. E taua tele le Tulafono Tau Faaofi lenei pe a oo ina lavelave, o lea foi la ua aumai ai i i i le Fuaiupu 11, o lomiga i le gagana faa-Peretania ma le faa-Samoa, e i ai lava le pule faataga tutusa o gagana lava ia e lua. Ae a tulai mai loa se tulaga feteenai, ona faaaoga loa lea o le lomiga faa-Peretania. E masani lava ona lagalaga ai, o le a ea le mea e faaaoga ai lenei faa-Peretania? O i la e avatu ai le faauigaina o upu faale-Tulafono. O le tele foi o Tulafono e i ai ma aso e amata ai. Afai e le avatua se aso e amata ai, o lona uiga, o le aso lava e tuu ai le maliega a le Ao o le Malo, o le aso lava lena e amata faamamalu ai. E i ai foi taimi e ono finau ai i se tulaga o le Tulafono Tau Faaofi lenei e amata i le aso Faraile, 20 Mati 2015, e i ai lava finauga. O lea na tupu le mea lea analeila i le 2 i le vaveao, a o le faalavelave lea na tupu i le ta o le 8 ina ua oso mai le la, o fea la le taimi e amata ai? O le taimi e oso ai le la talu ona toso le laina foi lea e amata ai le taimi, lea e i talaatu o le nuu o Tafua, talaatu o Saleaumua, na toso ai le laina, o i ina lea ua amata faitau ai taimi, 24 itula o le aso. E amata atu lava la i Saleaumua ona oso ai le la, amata faitau atu ai loa taimi o le lalolagi atoa lava. O le taimi amata la o Samoa, o le ta tonu o le 12 i le tulua o po ma ao. O lona uiga, o i ina e amata mai ai ona tau le aso. E taua tele le Tulafono Tau Faaofi lenei, e tele lava mau vaega ia e taua tele, e i ai le isi vaega lea o lo o aumai i i i le itu lava lea o ni Tulafono foi lea ua teuteu. Afai ua toe teuteu se Tulafono, a oo loa ina talanoa le tagata i le Tulafono, e aofia uma ai lava toe teuteuga, e oo mai lava i le taimi tulalata i le lagaia o se mataupu. E i ai foi le tulaga eseese taua aemaise lava i tatou foi nei ua tele aitalafu, aemaise lava faipule, e tele aitalafu, lata mai le palota, ua alu eleele, ae logo mai e le Bank of Western Samoa ua miliona lau mea lea e i i, o le a le tulaga o oe? Ua alu alu lou manatu ona e faapea lea, pau lava le mea o le amoti loa ota alu ita ae faitalia ai le loomatua, a? Pe uma foi ona faapea lea, soloia i le oti, e le avea lou oti e soloia ai au mataupu, e ave lava e faataunu le faamasinoga. E pei o le tasi lena itu taua mo i tatou nei e o i le palota ae ua lavea i le mea foi lea ua saisaitia i mea tau aitalafu talu ai nei mea o faiga palota.

O le tulaga foi i mea tau faamasinoga, e i ai le isi amio foi lea i tagata, a oo loa lava, aemaise lava faipule, uma le faiga palota, o lea la ua aumai le moliaga o oe ona e alu loa lea lafilafi. O lea la e faamanino mai i i, po o lou lafi, ae a alu atu lava pe alu atu se isi tuu le samania foi lele i le fale lou last

address, o lena lava ua faataunuina le Tulafono, e oo lava i feau e avatu ia oe po o moliaga e avatu e faaaoga ai le mea o le fax, afai o le fax lava lea a oe, o lona uiga o le taimi lava e avatu ai i le fax, o lena lava ua faitau i lalo o le Tulafono ua kiliva atu ia te oe. E le mafai lava ona e alofia. E anoanoai le mau faataitaiga lelei lea e alu atu i totonu o le Tulafono Tau Faaofi lenei, e aoga tele mo i tatou i le Maota lenei, ina ia maioio ma malamalama ai, e leai se mea e toe alo i ai lea ua faamatala uma atu lava ma faamanino i gagana o lo o faaaoga e le Tulafono ina ia silafia ai, o a lavelave, o lea ua faamanino uma i lalo o le Tulafono.

Lau Afioga i le Fofoga Fetalai, o le tulaga lena o le Interpretation Act, faauigaina o upu ina ia atili malamalama ai tatou uma, o a nisi Tulafono o i ai, ave le Tulafono lea lea i le fale e nofonu ma e faitau i ai, tusa lava le pasi, faitau pea i ai ona e aoga i lou soifua talavou po o lou soifua matua ae le i sau le valaau a le Atua, te i lava ua e lavelavea ane i se Tulafono, ona e tago loa lea i le lomi fefiloi lea e tau atu ai le mea e tatau ona fai, ma le mea e le mafai ona e lafi ai.

Lau Afioga i le Fofoga Fetalai, o le Tulafono Tau Faaofi lena, ou te iloa e le o se mea e finau ai. E le tatau ona finau ai, ae aumaia le fesili.

**FOFOGA FETALAI:** Malo faafetai i lau Afioga i le Palemia, ou te manatu foi o lea ua malamalama lelei le faafogaga a le Maota.

**Tofa LEALAILEPULE RIMONI AIAFI:** Lau Afioga i le Fofoga Fetalai, leai ne i te i ua faapea le Afioga i le Palemia matou te le amanaia lana Tulafono Tau Faaofi, oka se Tulafono Tau Faaofi ina a matagofie. Na pau lava lea o le mea, aua e taua tele i le faauigaina o Tulafono foi nei e consistent ina ia laugatasia ma malamalama uma tagata i le faaaogaina o upu, aemaise lava upu nei e tolu, o le shall, o le must ma le may. O lea e faa-Samoa mai, e mafai, e tatau, e ao. Aua o upu lava nei e finau ai lava nei mea o loia, finau ai lava ma finau ai lava, koma liliu ma semikolona.

**Susuga Hon Tuilaepa Fatialofa Luplesoliai Aiono Neioti Sailele Malielegaoi:** Lau Afioga i le Fofoga Fetalai, o le mea e fia faasao. Na o e lava e le loia e finau i le mea lena, ae le finau ai ni loia.

**Tofa LEALAILEPULE RIMONI AIAFI:** Ia, o lea ua saunoa mai le Afioga i le Palemia i lona faailoga foi lea o le Doctors of Law, a o lea e talanoa atu Lealailepule, ua tele ona moliaga o sao ai.

Lau Afioga i le Palemia... Faafetai ia manua le afiafi.

**FOFOGA FETALAI:** You learn from mistakes. Tulai mai Lefau, se tasi o sui usufono mo Vaimauga Sisifo.

**Tofa LEFAU HARRY SCHUSTER:** Faafetai lava i lau Afioga i le Fofoga Fetalai. E leai e le o sese lau Afioga i le Palemia, ae na pau le agaga ia te au o le tagata e loia. E momoli atu lava le agaga faafetai i lau Afioga i le Palemia ma le Kapaneta ma le Matagaluega mo lenei Tulafono Tau Faaofi, e saolele lava le saunoaga a lau Afioga i le Palemia ua leva ona tatau ona fai lenei Tulafono Tau Faaofi, ona talu ona tatou tutoatasi, ua tele suiga o Tulafono a Samoa, ua tele foi isi Tulafono fou i mea o lo o tutupu i fafo ae le

i oo mai i Samoa ae ono tutupu i se taimi. O lea la o le a fesoasoani i ai lenei Tulafono Tau Faaofi. Mo au lava ia o le loia, mo loia foi nei faatoa iu mai i le aoga faaloia, a fia lelei lau loia, o le mea lava e te alu e faitau, ia matua faitau le Faavae ia e malamalama i le Faavae. Ia matua faitau ma le Tulafono lea ia e malamalama i le Tulafono lea pei o se tauloto, ia matua faitau ma tulafono a le Faamasinoga i le Supreme Court ma le Land and Title. A e matua faia mea ia, e matua lelei lava lau loia, ae a e le faia la mea na e tolu, o lona uiga o le a gau le tupe a le tagata lea e alu atu ia oe e te le o malamalama foi oe i au mea na e fai. Faafetai tele lava lau Afioga i le Palemia ma le Loia Sili ua matagofie le Tulafono Tau Faaofi. E saolele lava le Afioga i le Palemia e le finau matou loia i mea ia, sei vagana le alu atu o le client foi lea e faapea e te finauvale, ona e faapea lea, ∞ lea o le a ou finauvale ae totogi e oe au.ø Faafetai tele i lau Afioga i le Palemia ma le Fofoga Fetalai.

**FOFOGA FETALAI:** Tulai mai le sui usufono mo Faleata Sasae, avatu ia le avanoa mulimuli le sui usufono mo Faleata Sasae.

**Tofa AVEAU TUALA LEPALE NIKO PALAMO:** Lau Afioga i le Fofoga Fetalai, atonu e le o au o se loia ae o loia na aooga i faiaoga. O le faafetai i le Tulafono Tau Faaofi. O le mea sili ona ou fafia i le Tulafono Tau Faaofi, o lea ua faasao mai e le Palemia le aualii ia na fesili sese i le Tulafono Tau Faaofi i le le faitau i ai i le Tulafono Tau Faaofi.

Ae i ai lava si vaega lea ou te fia fesili ai i le Tulafono Tau Faaofi, o le Fuaiupu 42 o le Tulafono Tau Faaofi. O le vaega lea o le Tulafono Tau Faaofi, o lea e faapea mai le Tulafono Tau Faaofi, afai e fai se fono, a i ai se tagata e le tatau ona i ai i totolu o le fono, pe i ai foi se tagata e sese lona tofiaina i totolu o le fono, po o se faaletonu foi i le fono, e talia lava minute o le fono lea, e talia lava vaega o le fono lea. O lou popolega lea e i ai i le vaega lea o le Tulafono Tau Faaofi, o le vaega lea e faapea mai ai pe afai e i ai se tagata e faaletonu lona election, tofiaina e avea ma tagata o le fono. Afai o le tagata lea e sese le filifiliga o le Taitaifono, o lona uiga e tele lava le aafiaga o le vaega lea o lea fai ne i lalo o le vaega lea pe a faatino. A o lea foi e fai mai le Tulafono lea, leaga ua uma ona ou faitau i le Tulafono, lea e faapea mai le vaega 5 ea po o le 4 lea e fai mai ai le Tulafono, a faapea e fai mai e singular le vaega e include ai ma le plural. O lona uiga a faapea na o le tasi, e mafai lava ona tele. O lona uiga la o le vaega lea o le Tulafono pe a faapea mai, afai o se member, e le fetau lona tofia, lona uiga e tatau foi i lalo o le Tulafono, e mafai lava ona le member uma le vaega lea e faatinoina le fono lea, e sese le filifiliga pe a faatino i lalo o le vaega lea e fai mai ai le Tulafono. O lea la ou te fia fesili atu ai i lau Afioga i le Minisita, po o le a tonu lava le mea ua ala ai ona faataua le fonotaga lea e i lalo o le fuaiupu lea, pe afai o tagata ia e i totolu o le fono, e le tatau ona i ai. Ma le faaaloalo lava.

**FOFOGA FETALAI:** Malo. Malie lava lau Afioga i le Palemia toe tasi lava lea o le Afioga... Tulai mai se tasi o sui usufono mo Salega, Afioga Afualo Wood Utu Salele.

**Afioga AFUALO WOOD UTI SALELE (Salega):** Faafetai i lau Afioga i le Fofoga Fetalai. E le nofonofa ai foi le sui usufono mo Salega, ae momoli atu foi le faafetai i le Tulafono Tau Faaofi. O sina vaega laitiiti lava lea,

faafetai o lea ua ou vaai atu i le Fuaiupu 56 o lea ua manino tonu mai lava i i soligatulafono e faasino i Faalapotopotoga po o a lava ni vaega o i ai, o lo o manino lava, a o vaega mulimuli ia, o faasalaga la e i ai, po ua talafeagai faasalaga e tolu na e i ai, ae ua alagatatau. Faafetai pei o le mea lea sa feeseseai ai le Maota nei, a o lea ua matua manino lelei, o lea ua agai tonu lava i ai le Tulafono. Ae pei o faasalaga lea sa ou toe tilotilo i ai po ua talafeagai po ua tetele foi, ina ia toe silasila i ai le tatou Tulafono Tau Faaofi. Faafetai.

**FOFOGA FETALAI:** Ia, se i tulai maia lau Afioga i le Palemia pe i ai se isi au tali faaopoopo ae o le a avatu le tatou fesili.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o le mataupu lea sa laga i lalo o le Fuaiupu 42, se i ou faitauina atu le Fuaiupu 42: E 1 aafia malosiaga i se avanoa po o se tulaga faaletonu ó (1) E mafai ona galue se faalapotopotoga ua tuufaatasi po o e le o tuufaatasia faaletulafono na faavaeina e ala i se Tulafono, e ui lava o lo o i ai se avanoa i lona tulaga faasui auai. (2) E le faaleaogaina le fonotaga a se faalapotopotoga ua tuufaatasia po o e le o tuufaatasia faaletulafono e ala i le: (a) i ai po o le auai ai o se tagata e le agavaa ona i ai i po o le auai ai i totonus o le fonotaga; po o (se tulaga faaletonu i totonus o tofiga, faiga filifiliga po o le filifiliga o se sui auai; po o (c) se tulaga faaletonu ititi i le taloina po o le faatautaiga o se fonotaga.

Ona tuu mai lea i le faa-Peretania, 42. Power not affected by vacancy or irregularity ó (1) A body corporate or unincorporated established by an Act may act even if there is vacancy in its membership. (2) The meeting of a body corporate or unincorporated is not invalidated by: (a) the presence or participation of a person not entitled to be present at or to participate in the meeting; or (b) an irregularity in the appointment, nomination or election of a member; or (c) a minor irregularity in the convening or conduct of a meeting.

Ia, o le fono lea ua usu, o le fono a Malisi, atoa le quorum, o la e i ai uma lava tagata e tatau ona i ai, ae filo atu ai ma Saumani Afaese na avatu e se isi sui i totonus. E leai se mea o le a afaina ai fua faaiuga e fai i le alu atu o lena tagata o lea e faamalieina uma aso na talo ai le fono, o lo o i ai le quorum, o lo o faagasolo le fonotaga i ona tulaga masani, a o lea la e alu atu le isi tagata ma Saumani Afaese, e aveatu e auai ma faalogologo. E leai se mea o le a afaina ai fua le faaiuga a le fono. O le tali puupuu lena lau Afioga.

**Tofa Aveau Tuala Lepale Niko Palamo:** Lau Afioga i le Fofoga Fetalai, leai ou te le... i le tali a le Afioga i le Palemia, tusa o lea ua tali mai le Afioga i le Palemia i le vaega muamua, a o le vaega lua lea e i ai, o le filifiliga o tagata election, o tagata o lea e fai tofi. O lea ou te fesili atu ai, faapefea la pe a faapea o le Peresetene a le Malisi lea o se faataitaiga...

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** O lea la o le a ou tali atu. Ia manatua foi e i ai mea o aiaiga lava a Faalapotopotoga ia. E le mafai ona filifilia se tagata faapena ae le i totogia lana sala. O lona uiga la, na o le tagata lava e alu atu ia e nofonofo i le fono. Ia se i silasila la i ai i le faatauvaa tele o lau mataupu? Ia o le tali foi lena.

*Na faamaonia le lafo ma faitauina le Tulafono Tau Faaofi o le Faauigaina o Tulafono 2015 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o Mataupu tau Faamsinoga, Leoleo ma Falepuipui ma le Faamsinoga o Fanua ma Suafa mo le iloiloina ma toe lipoti mai i le Fono Aoao i se fonotaga o lumanaai.

Ia, ou te manatu o le a vavae foe i lenei vaega o le aso. Ou te talitonu o le a tatou alo e fai sina malologa puupuu ma fai sina vaivevela ma sina faamalositino ona tatou omai loa lea e faaauau le vaega faaiu o le tatou polokalame.

*Na faataatiae Taualumaga a le Fono Aoao mo lana malologa o le aoauli i le itula e 3:10 ma toe faaauau i le itula e 3:44 i le aoauli.*

**FOFOGA FETALAI:** E faasilasila atu o le a toe faaauauina nei taualuga o le Fono Aoao Faitulafono. Faamalo atu le onosai i lenei vaega o le aso, talitono o lea ua tatou taunu mai i le tatou vaega mulimmuli e faaauau ai le tatou galuega. Faamalo atu le onosai faamalo le usufono.

#### **TULAFONO TAU FAAOFI O TEUTUEGA O LE TULAFONO O FAIGA PALOTA 2014 – iloiloga auiliili.**

**FOFOGA FETALAI:** E tusa ai ma le Tulafono Tumau e 106 e tatau ona faamaonia muamau e le Fono Aoao le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi. Tulai mai lau Afioga o le sui Taitaifono o le Komiti o Galuega Tulafono Tumau, Maota Fono ma Mataupu Tau Faiga Palota.

**Tofa AGAFILI PATISELA ETEUATI TOLOVAA (Sui Taitaifono Komiti o Galuega, Tulafono Tumau, Maota Fono ma Mataupu tau Faiga Palota):** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o Faiga Palota 2014 faatasi ma Teuteuga ma Faasaoga.*

*Faaluaina e le sui usufono mo Faasaleleaga Nu 1, sui usufono mo Aleipata Itupa i Lalo, sui usufono mo Aiga le Tai ma le sui usufono mo Siumu.*

**FOFOGA FETALAI:** Ou te faasilasila atu ua faamaonia nei e le Fono Aoao le Lipoti a le Komiti o Galuega Tulafono Tumau Maota Fono ma Mataupu Tau Faiga Palota i le Tulafono Tau Faaofi o Teuteuga o le Tulafono o Faiga Palota 2014. O le a sagai atu loa le Fono Aoao mo le iloiloga auiliili o le Tulafono Tau Faaofi o Teuteuga o le Tulafono o Faiga Palota 2014. E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

**FUAIUPU 2:** Ua teuteuina le fuaiupu 5.

*Faamaonia.*

**FUAIUPU 3:** Ua teuteuina le fuaiupu 8 ma le fuaiupu 9.

*Faamaonia.*

**FUAIUPU 4:** Ua teuteuina le fuaiupu 16.

*Faamaonia.*

**FUAIUPU 5:** Ua teuteuina le fuaiupu 19.

*Faamaonia.*

**FUAIUPU 6:** Ua faaofiina le fuaiupu 25 f.

*Faamaonia.*

**FUAIUPU 7:** Ua teuteuina le fuaiupu 35.

*Faamaonia.*

**FUAIUPU 8:** Ua teuteuina le fuaiupu 94.

*Faamaonia.*

**FUAIUPU 9:** Ua teuteuina le fuaiupu 97 a.

*Faamaonia.*

**FUAIUPU 10:** Ua teuteuina le fuaiupu 106.

*Faamaonia.*

**FUAIUPU 11: Ua teuteuina le faamatalaga.**

**Afioga Hon FIAME NAOMI MATAAFA (Minisita mo Faamasinoga ma Pulega tau Faamasinoga):** Lau Afioga i le Fofoga Fetalaií ...

**FOFOGA FETALAI:** O le a le Fuaiupu lau Afioga i le Minisita?

**Afioga Hon FIAME NAOMI MATAAFA:** Lau Afioga faamolemole ma le faaaloalo lava, o le Fuaiupu 11.

**FOFOGA FETALAI:** Tulai mai lau Afioga i le Minisita.

**Afioga Hon FIAME NAOMI MATAAFA:** O le Fuaiupu 11, faapea o i ai le Tulafono a sui usufono mamalu, se i silasila ane i le itulau e 6 o le Tulafono o lo o faagaso. E i ai si teuteuga laititi lava lau Afioga, a silasila ane i ai i le pepa lea, Pepa Faatumu 1 A. Na o le pau lava si teuteuga o lo o fia maua, o le upu lea po o i le va o Fuaiupu A ma le fuaiupu B, ma e fia suia le upu po o i le upu ma. O le talosaga atu lea ma le faaaloalo i lau Afioga i le Taitaifono e ala atu i le sui o le Komiti o lo o saunoa mai e fai ma sui o le Komiti.

**FOFOGA FETALAI:** Se i faamanino mai lava, o lea e le o maua lelei e le sui Taitaifono faamolemole Fiame?

**Afioga Hon FIAME NAOMI MATAAFA:** E faamalie atu i lau Afioga, o se suiga laititi lava. i le faasologa o le Tulafono, aua o le faafuaiupu 11 o lo o i le itulau e 5, ona sosoo ai loa lea ma le itulau e 6, o lea o lo o i ai le ata o le pepa faatumu 1 A. O le talosaga faamolemole lau Afioga, o le upu lea “**po o**” i le va o fuaiupu A ma le fuaiupu B o le pepa faatumu lea, o lea o lo o fia talosaga atu, ina ia suia le upu poo i le upu “**ma**”. O lona uiga, e faaaogaina le (a) ma le (b). O se mea laititi lava lau Afioga.

**FOFOGA FETALAI:** O lea ua ou maua le finagalo o le Afioga i le Minisita. Se i tulai mai le Afioga i le sui Taitaifono.

**Tofa AGAFILI PATISELA ETEUATI TOLOVAA:** Lau Afioga i le Fofoga Fetalai, ou te faafetai i le Faasaoga e pei ona fautuaina e le Afioga i le Minisita ua talia foi ona o leí lea e faaupuina i le upu faa-Peretania o le typo e tatau ona faaaogaina upu e lua e suia mai le upu ñorö substitute with the word ñandö, o lona uiga e tatau ona ia faaogaina agavaa A ma le B i le faatinoina o le vaega lea o le Tulafono. Ma le faaaloalo.

**FOFOGA FETALAI:** Ua i ai le teuteuga i le tulai mai o le Afioga i le Minisita.

*Faamaonia le Teuteuga.*

*Faamaonia le Fuaiupu 11 e pei ona Teuteuina.*

**FUAIUPU 12: Teuteuga lautele.**

*Faamaonia.*

**FUAIUPU 13: Teuteuga faatupulaia ma Tulafono Faatonutonu tau soloaiga.**

**FOFOGA FETALAI:** O lo o i ai le Teuteuga a le Komiti i le Fuaiupu 13. Tulai mai lau Afioga i le Sui Taitaifono.

**Tofa AGAFILI PATISELA ETEUATI TOLOVAA:** Lau Afioga i le Fofoga Fetalai ou te faatu le Teuteuga i le Fuaiupu 13 e faapea:

**“TEUTEUGA:**

Vaimauga Sisifo Nu.1(Vaiala aofia ai Vaipuna, Vini, Levili ma Faatoia, Moataa aofia ai Vaivase-uta, Vaivase-tai ma Matafagatele, Magiagi aofia ai Toomatagi, ma Ataga)

Vaimauga Sisifo Nu.2 (Matautu, Tanugamanono aofia ai Leufisa, Papaloloa, Papauta ma Tanumaleko, Vailima aofia ai Alaoa, Tiapapata, Letava ma Afiamalu, Apia aofia ai Alamagoto, Aai o Niue, Aai o Fiti, Lelata, Leone, Maagao, Maluafou, Matafele, Motootua, Mulinuu, Sogi, Saleufi, Savalalo, Tauese, Taufusi, Togafuafua ma Vaisigano)

Aana Alofi Nu.1 Sasae (Faleasiu)

AanaAlofi Nu. 1 Sisifo (Fasitoouta)

Safata Sasae (Nuusuatia, Vaiee, Fusi, Tafitoala, Fausaga & Mulivai)

Safata Sisifo (Saanapu, Sataoa ma Lotofaga)

Falealili Sasae (Utulaelae, Sapoe, Salani, Salesatele & Siuniu)

Falealili Sisifo (Sapunaoa, Piu, Satalo, Malaemalu, Tafatafa, Matautu, Vaovai, Poutasi & Saleilua)

Faasaleleaga Nu.1 Sasae (Salelologa)

Faasaleleaga Nu.1 Sisifo (Salelavalu, Iva, Vaiafai, Vaisaulu, Lalomalava & Safua)

Salega Sisifo (Faiaai, Samata i uta & Samata i tai & Fagafau)

Salega Sasae (Sagone, Fogasavaii & Vaipua)ö

Faafetai.

**Afioga Hon FIAME NAOMI MATAAFA:** Lau Afioga i le Fofoga Fetalaií ..

**FOFOGA FETALAI:** Tulai mai lau Afioga i le Minisita.

**Afioga Hon FIAME NAOMI MATAAFA:** Lau Afioga i le Fofoga Fatalai ou te tulai atu ma le faaaloalo ona o lenei Fuaiupu 13 o lo o faavasegaina ai le faataatiaga fou o a tatou itumalo ia e tailua Nofoa, ina ia toe faafoi atu ai i le vaevaeina, ma ia taitasi ai faipule mo itumalo. O lo o i ai foi i le vaega lea o le Tulafono Tau Faaofi a tatou itumalo tu taulaga, o lea ua suia mai ai le tatou Palota Taitoatasi e pei ona tatou sau ai se i oo mai lava i lenei Paeaiga.

I le matauina i le Lipoti a le mammalu o le Komiti aemaise o le Toe Teuteuga ua faataatia nei i lumamea, atonu o se suiga ogaga o lo o i ai, aemaise i le Vaega 13 1 C, o le itumalo lea o Safata. O lea foi o lo o i ai i totonu o le Lipoti a le Komiti le faapea mai, ðO nisi suiga sa toe tuu mai e le Kapaneta i le masina o Tesema i le tausaga talu ai ma le masina o Januari i le tausga nei o lea o le a faataatiae na suiga, seia toe tapena lelei mai faatasi ai ma nisi o fautuaga o lo o tuu atu e le Komiti e pei ona i ai i le Lipoti a le Komiti o lo o faataatia nei i luga o le tatou Laulau a Fono, i lo outou toe iloiloina o le Tulafono o Faiga Palota.

Ou te iloa lau Afioga ua fai sina umi o le Tulafono Tau Faaofi lenei ua tatou talanoaina na faataatia mai ia Me o le tausaga le la. Talosia o lo o i ai pea i luma o a outou Afioga i sui usufono ma le mammalu o le tatou Fono le Tulafono lea e faafaigofie ai ona outou silasila e tusa ai ma le lafo lea ua faatu mai e le Komiti.

Lau Afioga i le Fofoga Fatalai, ou te tulai atu ma le faaaloalo ona o lea ua tatou laa atu i le auiliiliga o le tatou Tulafono Tau Faaofi, ona o lea ua taatia le lafo a le Komiti ou te fia faatuina le lafo Toe Teuteu. Ma e faapea le lafo toe Teuteu. *Ina ia faaauau le Fuaiupu 13, e pei ona faatulagaina mai i le Tulafono vagana ai le Vaega 11, IE, ina ia toe faafoi ese mai e toe tapena mai ma le Tulafono o lea ua finagalo i ai la tatou Komiti.*

Pe toe fai atu lau lafo lau Afioga po ua maua mai?

**FOFOGA FETALAI:** O lea ua ou maua ae tuu i lalo i le finagalo malie o le Afioga i le Sui Taitaifono i le teuteuina o lana lafo, leaga o le lafo lea ua faatuina i le Maota i le taimi lenei o le lafo a le Komiti, ae mafua le taliaina ona o le tulaga o le taliaina o le teuteuina. Ou te fesili atu i lau Afioga i le Sui Taitaifono.

**Tofa AGAFILI PATISELA ETEUATI TOLOVAA:** Faafetai mo le avanoa i lau Afioga i le Fofoga Fatalai. Faafetai foi i le Afioga i le Minisita mo le Lafo Toe Teuteu. I faiga faavae lava ia a le Palemene e pei ona masani mai ai, e le mafai ona toe teuteuina le lafo a le Komiti o lea ua autasi i ai. Ma ona o au o le sui o le Komiti o lo o tauaveina le Lipoti nei i le mammalu o le Palemene ua aofia, ou te faapea atu ai, e le talia e le Komiti le Toe Teuteuina o lana lafo. Ma le faaaloalo lava.

**FOFOGA FETALAI:** Tulai mai lau Afioga i le Minisita.

**Afioga Hon FIAME NAOMI MATAAFA:** Lau Afioga i le Fofoga Fatalai, e lelei lava le malamalama o ala o tatou mea. O lea ua taatia le lafo a le Komiti i luma o le Maota. A o lea ua ou tulai atu e toe teuteu le lafo. O tulaga masani la o faagasologa o lafo faatutu, e ao ona aumai le fesili i le Toe Teuteuga ona faatoa fai ai leaí .. a faapea e le faamanuiaina le Toe Teuteuga

ona tuu atu lea i le lafo autu. E pei o ala ia o mea i le faiga o a tatou lafo e faatu i luma o le Fono lau Afioga i le Fofoga Fatalai.

**FOFOGA FATALAI:** Se i tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga e i ai si lave lea ua tulai mai. E pei ona silafia e le Maota lenei, a oo loa ina tulai atu le Minisita o le Kapaneta i se lafo, e alu uma ai a le Kapaneta ma le Vaega Faaupufai lenei. O lea la ou te fautuaina le tulaga ina ia se i toe silasila ma le totoa i le Lafo Toe Teuteu a le Minisita, ona o mataupu faapenei e aafia ai Faiga Faavae tau Vaega, lea la ua faatu atu le lafo a le Minisita, o lona uiga e tu ai ma Au ma le Kapaneta ma le Vaega atoa lenei. O se tulaga tauga malie, o lea ou te tulai atu ai e ui lava ua foi mai i le Komiti, ae le mafai ona aveesea ai tulaga Faaupufai i totonu o le Palemene lenei.

O lea ou te tulai atu ai i le mataupu lea ua laga e le Minisita, ona o le itu lenei ina tagofia le mataupu lenei e le Komiti e pei ona tulai mai ai le Sui Fofoga Fatalai. O lea foi ou te saofai ai ae le mafai ona ou see ese ma le tulaga e i ai le iuga a le Kapaneta. O le mea lena ua ou tulai atu ai, a o le i aumai le Fesili ina ia maioio lelei le tulaga lea ua oo i ai le tatou Fonotaga.

**FOFOGA FATALAI:** Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fatalai, ua matua ou faanoanoa lava i lenei aso aemaise o le tutoatasi o le Palemene i ana Komiti. O lea ua saunoa le Afioga i le Palemia ma faaaoga mai le Kapaneta ma le Vaega Faaupufai, a o le Lipoti lenei a le Komiti sa avanoa uma lava e omai e molimau ai, a o lea e foliga o se mea fou lenei. O se Lipoti ua aumai e le Komiti ae tulai ifo le Tamaitai Minisita e ona le Tulafono Tau Faaofi ma Toe Teuteu ma tulaga faapena. Ae sa avanoa lelei le taimi e fono ai le Komiti i le tulaga e faaoo mai ai aemaise o tulaga maaleale lea ua saunoa i ai. O le mea lea lau Afioga i le Fofoga Fatalai, ua ou matua faanoanoa lava i le tulaga o le faa-Temokarasi lea o le tatou ó i le tutoatasi o tatou Komiti faa-Palemene aemaise o le Tutoatasi o le Kapaneta, lea ua oo mai i inei le Palemene o le tulaga lena.

**FOFOGA FATALAI:** Malie lea o le a avatu le avanoa i le Afioga i le Tamaitai Minisita.

**Afioga Hon FIAME NAOMI MATAAFA:** O le mea e fia faasao lau Afioga i le Fofoga Fatalai, atonu a o faafofoga mai le atunu e leai lava se isi e le o malamalamama po o le a le uiga o le mea lea ua i ai le toe Teuteuina o le Lafo a le Komiti, ae sili ia ona ou faapupulaina atu atonu e malamalamama lelei ai le tatou Maota aemaise pe a faapea e le o i luma o a outou Afioga le Tulafono Tau Faaofi ona ua fai sina umi o taatia lenei Tulafono Tau Faaofi i le Komiti mai ia Me o le tausaga ua mavae. O le suiga lea e aumaií .

**Afioga Hon PALUSALUE FAAPO II:** Lau Afioga o le mea e fia faasao.

**FOFOGA FATALAI:** O lea o le a uma ona avatu lea o le avanoa.

**Afioga Hon FIAME NAOMI MATAAFAA:** O lea e avatu le faasaoga. O le suiga lea e aumai e le Komiti le Fuaiupu 13. O le suiga ogaga lea e i ai totonu o le Itumalo o Safata. O lea tatou te malamalama uma o lea sa autovaa mai le Itumalo o Safata ma aumai mau eseese po o fea le mea e tatau ona vavae ai le Itumalo. O le mea moni lau Afioga i le Fofoga Fetalai ma le mamalu o le Palemene, o lea tatou te malamalama uma, faagasologa o le faiga o faiuga. Na faavae le Tulafono Toe Teuteu lenei mo Tulafono i luga o fautuaga a le Komisi Suesue mo le Faiga Palota o le 2012. O i ina na faataatia mai ai le ata o a tatou Itumalo nei e ono e toe vaevae Nofoa ina ia faataunu ai lava le auga ma le faamoemoe, tasi le tagata, tasi lana palota, tasi le Itumalo po o le vaega tau palota. O le vevesi la lea e vevesi ai ma pei ua fai ai ma mataupu ua taofia ai ona faasolo le atou galuega, o le finagalo o le Komiti e ese mai i le mea o lo o taatia atu i le Tulafono Tau Faaofi i le mea o lo o vaevaeina ai le Itumalo o Safata.

O le mea moni lava lau Afioga i le Fofoga Fetalai ma le mamalu o le tatou Fono, o le vaevaeina o Safata lea o lo o faataatia atu i le tatou Tulafono, o Sa Tunumafono, o Vaiee, Saanapu, Sataoa, Lotofag , Nuusuatia. O Alataua, Mulivai, Fusi, Fausaga, Tafitoala. O lona uiga, o le eseesege o le mau lea ua aumai e le tatou Komiti ma le Tulafono Tau Faaofi lea e faataatia atu sa faavae i luga o le faiuga a le Komisi Suesue o Faiga Palota. O nuu la ia o lea e fai ai nei le vevesiga o Vaiee ma Nuusuatia. O le mataupu la lena, o lea la ua faatu mai e le Komiti le latou Lafo e toe Teuteu ai le Tulafono Tau Faaofi lea, a o lea ua ou tulai atu o Au o le Minisita e ou le Tulafono Tau Faaofi, o le autu o lau Lafo Toe Teuteu, ina ia toe faamautuina lava le Tulafono Tau Faaofi ma le aiaiga o le vaevaeina o Safata e pei ona tuuina atu ai. Faaopoopo i ai ma lea - ona o le Vaega 13 1E o le Tulafono Tau Faaofi lea, o lo o aiaia ai o tatou Itumalo tu taulaga, lea e le o mafai ona aumai e le Komiti le toe Teuteuga na tuuina atu i ai e le Malo o lea e faapea e toe tapena lelei mai, lea la ua faaopoopo atu ai i lau Lafo Toe Teuteu e toe faafoi mai la le vaega lea, o le definition po o tuaoi o o tatou Itumalo tu taulaga ia e lua se i toe tapena lelei mai e pei ona finagalo i ai le Komiti, a o le Itumalo o Safata o lo o tumau lava le Malo i le mea o lo o taatia ai le Tulafono Tau Faaofi lenei. O le uiga lena o le Lafo Toe Teuteu lea ua tuuina atu i luma o le tatou Fono.

**FOFOGA FETALAI:** Ia se i tuu atu i le Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, e le fou mea nei. E pei lava ona tulai mai i Fonotaga i aso ua tuanai, e i ai lava le avanoa e aumai ai Teuteuga a le Komiti, ae afai e le finagalo i ai le Minisita ma le Malo, e tuu mai lava i le tatou Palota ona fai ai lea o le tatou Iuga, o mea faatemokarasi lena. Ou te manatu ina ua aumai le tausaga 1984 lena e maua i le tatou Hansard records, na aumai ai le Tulafono i le faatuina o le Central Bank, o le tatou Faletupe Tutotonu. E fitu lelei Teuteuga na aumai ai. Na ona aumai lava o le Teuteuga ou tu atu teena na palota uma lava le vaega. O le taimi lena e tapa ai loa e Au, o au o le Palemia o le Taitai o le Vaega lenei ia le Palota e fai, o lea lava e le o faapea o teena ó o lea lava ua taoto i totonu o le Palemene le Lipoti ma le fautuaga a le Komiti. O lea ua tapa e le Minisita le Lafo Toe Teuteu, e tatau la ona tatou alo i le faiga palota. O lea la ua ou fai

atu e lagolagoina e le Kapaneta e le mafai ona see ese ma le Vaega toatele lenei le mea lea e saunoa i ai le Minisita.

**Afioga Hon PALUSALUE FAAPO II:** Lau Afioga i le Fofoga Fatalai o se mea e fia faamalamalama.

**FOFOGA FATALAI:** O le a avatu pea le avanoa ona o le sui usufono o le Komiti. Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Ioe lau Afioga, o le mataupu lenei i Itumalo tu taulaga aemaise o le Itumalo o Safata, ou te faaeteete foi i faapea ua ou tu atu i se tulaga foi lea, ae leaga o au o le sui usufono o le Komiti. Lau Afioga i le Fofoga Fatalai, o lea ua manino lava le saunoaga a le Minisita na faavae mai luga o le Komisi Suesue, o Komisi Suesue ia sa saofai ai se sui o le Itumalo o Safata ma fai ai ni faaiuga faapea ae le i oo atu ni molimau i totonu o le Komisi Suesue. O lea faatoa auiili lelei talu ona toe iloilo e lenei Komiti le galuega a le Komisi Suesue. O le mea lea lau Afiogaí .

**Afioga Hon FIAME NAOMI MATAAFA:** Lau Afioga i le Fofoga Fatalai o se mea e fia faasao. E matuia le tuuaiina lea e fai e le Taitai o le Itu Agai, e le o i inei le tagata lea e tali atu ai i tuuaiina ia.

**Afioga Hon PALUSALUE FAAPO II:** Ae tatau ona e silafia.

**Afioga Hon FIAME NAOMI MATAAFA:** A saunoa mai la o Leota lea sa i le Komisi Suesue a o oe lea e te nofo i le Komiti a le Palemeneí

**Afioga Hon PALUSALUE FAAPO II:** A o lea ou te molimau atu i molimau na aumai e faavae ai le faaiuga a le Komiti.

**Afioga Hon FIAME NAOMI MATAAFA:** Lau Afioga i le Fofoga Fatalai, se i fai ma se i silasila i tagata o le atunuu o e sa tautua e ala i galuega e fai.

**FOFOGA FATALAI:** O lea ua maua le finagalo o le sui usufono. Tulai mai se tasi o sui usufono o le Komiti, le sui usufono mo Siumu.

**Tofa Hon TUUU ANASII LEOTA:** Lau Afioga i le Fofoga Fatalais, ua ou tulai atu ona o au o se tasi o sui usufono o le Komiti. O le tulaga lea ua tulai mai e foliga mai ua see ese lava ma faiga faavae le Lipoti a le Komiti lenei. Po o le ala o mea o lea na saunoa manino lau Afioga i le Palemia, e aumai le Tulafono mai le Kapaneta i le Palemene ona fai lea o felafolafoaiga ma finagalo o sui usufono ona see loa lea i le Komiti. O le Komiti la lea ua uma ana Sailiiliga ma aumai uma molimau mai le atunuu ona fai mai loa lea o le Fautuaga lea. O lea ia silasila i le Lipoti i le Itulau 2, o lo o aumai ai le faanoanoaga o le Komiti, sa moomia se feiloaiga ma le Minisita. O le Lafo Toe Teuteu lea ua aumai, o i sa tatau ona fai ai. O lea la ua fesiligia e lou mafaufau, o le a le saolotoga o Komiti nei? E tatau ona toe fai pe leai? E aoga Komiti nei a le Palemene pe leai? O le mea lea lau Afioga i le Fofoga Fatalai, na ona ou faaali atu faapena, ma lou faaaloalo lava a o le lagona lena o lea e tulai mai.

**FOFOGA FETALAI:** Tulai mai le sui usufono mo Faleata Sisifo.

**Tofa LEALALEPULE RIMONI AIAFI:** Faafetai i lau Afioga i le Fofoga Fatalai, o aso faapenei ma tulaga o mataupu faapenei e le ao foi ona vavevave i ai se isi. Ia tatou mafaufau lelei i le mea e ao ona fai, a o le taunuuga o mea uma o le fai o le mea amiotonu. O le faiga o le palota lea ua saunoa le Afioga i le Palemia e tatau ona fai pe a oo i ai aua o avanoa ia i lalo o le Tulafono Tumau a o faatu se lafo. Ae tatou te le i oo la i le palota lau Afioga i le Fofoga Fatalai, na ona faapupula lava o le Palemene i le mea na mafua ai le tatou suiga lea ua fai nei. Ina ua faia le Komiti lenei a le Palemene, e le i faia e tatou se faaiuga, sa valaaulia le mamalu o le atunuu ma e o lo o aafia tonu i le mataupu lenei ina ia afifio mai e faaali ni finagalo. O le amataga o le talanoaina o lenei mataupu, o Au a lea na ou fesili i le tatou Komiti, e lua a mea ia e tuu mai i le vaevaega lea, muamua pe vaelua faalepalota numera, pe vaelua faale-aganuu? O le tali na aumai e vaelua faaleaganuu o le finagalo lena o le Komisi Suesue, lea na faatumauina ai e le tatou Komiti le faaiuga a le Komisi Suesue ina ia vaelua faale-aganuu Itumalo uma. Ia po o ai la ni molimau na omai e vaevae faa-numera po o le a le vaevaega, e tasi lava le tala na ave i ai e le Komiti, finagalo malilie o le vaevaega faale-aganuu lea ua i ai. Ina ua afifio mai sui o lea Itumalo ma tuuina mai la latou mau ma faamaumauina, ou te le faia ni tala o Itumalo ou te le malamalama tele foi i ai a o molimau na aumai ai lea e fai ai. Aisea? Tatou te le faia ni faaiuga o le Komiti i ni faiga faa-Vaega po o ni Pati, ae sa tatou faia mo le manuia o le Palemene. O lena e silafia lelei e le Afioga i le Palemiaí

**FOFOGA FETALAI:** Malie le sui usufono, se i avatu le avanoa i le Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fatalai, o le faigofie ia o le mataupu, lea o le a tei lava ua alu ai i luga le toto maualuga ae faigofie lava le mataupu. Ona pau lava le mea tatou agai o lea ua taoto le Lafo a le Minisita. O mea lava ia na sau a i le Maota lenei o tupu lava, tusa lava po o ua faapea ua tasi i ai le Komiti, o le anoano o Lipoti a Komiti e aumai i totonu ae toe sui ai lava i totonu o le Palemene ma toe faia i ai teuteuga ó le lafo toe teuteu, e leai se mea o le a teitei vale ai.

O le ala foi lena na aumai ai le Lipoti a le Komiti talu ai e faatatau i le fautuaga na aumai i le Komiti e see mai le tulaga o laisene o bingo ma mea faapena, mai o i le Ofisa o Leoleo i le Komiti o le TAB. Na outou silafia lelei lava na ou tulai atu teena, o la e ua fai le galuega a le Komiti ona aumai lea i totonu, ae o lea foi e saofai atu ai le Minisita o ia e ona le mataupu. O lea la ua avatu le fautuaga, o le manaia ia o le fautuaga a le Minisita. Ma e toe teuteu ai ma o le mea e tu ai le mea lea, e le mafai ona tu ese le Kapaneta mai le mea o lo o finagalo i ai le Minisita, aemaise o le iuga a le Kapaneta lea na avatu ai, tatou te le toe foi agai tua po o ai sa i ai. Na pau lava o le mea, e tele foi le faavae o le faaiuga na pasia ai le mataupu lenei lea e i totonu o le Tulafono Tau Faaofi na faatu mai e le Kapaneta, o lea ua toe teuteu. O lea la ua saunoa atu le Minisita o ia o le sui o le Kapaneta, toe teuteu le mataupu. O

le faigofie ia. E le o se mea o le a vevela ai toto, e le tatau ona vevela o tatou toto. O le faigofie ia o le matapu ae o le a outou nonofo ma faafaigata.

Lau Afioga i le Fofoga Fetalai, o le tulaga lena o lea ua taoto le lafo, ua faaluaina foi e le Kapaneta, o le faigofie ia, ona aumai lava lea faagasolo le tatou Fono.

**FOFOGA FETALAI:** Se i avatu le avanoa i le Minisita mo Tina ma Tamaitai, Atinae o Nuu ma Afioaga ma Agafesootai ona tuu atu ai lea o le avanoa Lealailepule.

**Tofa Hon TOLOFUAIVALELE FALEMÖE LEIATAUA:** Faafetai i lau Afioga i le Fofoga Fetalai ma le mammal o le Palestene ma le paia foi ua sasao i lenei itula o le aso i le tatou faaumiumi ona o mataupu e pei ona fale i luma o le Maota sili a le tatou atunuu. Ae ua ou tulai lava ma le faaaloalo ona ou te manatu afai o taofi mau le paia o le atunuu i le saunoaga a le Taitaifono e faapea o se mau e aumai e le Komiti i se teuteuga, e le mafai ona toe suia. Ou te le iloa se taimi na sui ai le Tulafono Tumau. Ae ou te talitonu afai e faatu e le Minisita le teuteuga i luga o le teuteuga a le Komiti, o le Komiti ae le o le Maota atoa lena. O le Maota atoa lea. Ma le faaaloalo lava, a faalua, o lea ua saunoa le Afioga i le Palestene i le lafo a le Minisita, e tatau ona tuu mai muamua le fesili i le lafo toe teuteu. Ma e i ai lou talitonuga e le o se lafo toe teuteu le lafo a le Malo o le lafo e faatumauina le fuaiupu lea o le Tulafono Tau Faaofi. Aua na pau lava lea o le mea o lea e aumai ai le fautuaga a le Komiti, o le fuaiupu lea vaega 13 lea e aofia ai le vaeluaina o Safata. Le text lea o le Tulafono lea na sailiili e le Komiti lea ua talanoaina, e i ai lou talitonuga, o lo o tatou sosolo lava i tulaga masani mo le faafogagaaga a Samoa i faapea mai, o i ai foi ni mea o taafi i tua o lenei mataupu. Ae a tatou o faamaoni o tatou o Taitai o le Malo e fai a tatou faaiuga i luga o le Tusi Paia lea a le Maota, ou te talitonu o i ina e tatau ona tatou i ai lau Afioga. E le aoaia e Laupua Tamafaiga, ae tuuina mai le fesili e tusa ai ma teuteuga a le Malo. Ma le faaaloalo.

**FOFOGA FETALAI:** Malie lava lau Afioga i le Minisita o lea o le a faatea atu ia...

**Afioga Hon PALUSALUE FAAPO II:** Lau Afioga i le Fofoga Fetalai, a o le i aumaiia le fesili, aua... mo le silafia e le atunuu, e saofai ai le Afioga i le Palestene i le Komiti lea a le Palestene, a leai, o sona sui, lea e i ai le Afioga i le Minisita mo Fesootaiga ma Faamatatalaga Tekonolosi. Silasila la i nei mea, faamasino le Atua po o faamaoni le faiga o nei mea. O le tele o le Lipoti lenei, o le tele ia o le sao o le Afioga i le Palestene, tele foi le sao o le Minisita. Ta te ofo i nei mea e fai, ta te ofo o la e silasila mai le Alii i le fai o nei mea ae saofai ai le Afioga i le Palestene.

**FOFOGA FETALAI:** O lea ua maua lou finagalo Palusalue.

**Susuga Hon TUILAEPA FATIALOFA LUPE SOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o le mea e fia faasao. Ua uma ona ou... O le mea lena e igoa o le tofa fetalai. A foi o le tofa fetalai, o le uta lena a le poto a?

**Afioga Hon PALUSALUE FAAPO II:** E le o se tofa fetalai o le tofa faitogafiti.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fatalai, o le ala lena na ou fai atu ai masalo o le tulaga lea na see i ai le Lipoti lenei, atonu o i ina e toe teuteu ai tatou Tulafono. Sa le tatau ona avatu le mea lenei i se Komiti ta te saofafai uma ai, aua e le mafai ona see ese le Palemia mai le iuga na ia faia faatasi ma le Kapeneta. O e manatua le mea lena? Collective responsibility. E le mafai ona ou see ese ma le collective responsibility, o le iuga e fai faatasi. O le ala foi lena na ou avatua ai le Minisita e tau lava ina saofai ai i ina, a o lea o le a fai atu lau iuga i i e fautuaina lau Afioga, e faigofie. E le o ni mea fou, ae ala ona pei e fou, ona o outou ia fai mai e fou, e fou i totonus o le Maota lenei ae le o ni mea fou mea ia, o mea e masani ai. Ou te le iloa le anoanoai o le mau Komiti, talu lava ona ou tulai mai totonus o le Maota lenei, e aumai a latou faaiuga ae toe tu ae isi sui usufono toe teuteu lava i totonus o le Maota lenei, e le aveesea ai le avanoa lena. O le ala foi lena na ala ai ona ou faamaalo a iuofe atu i le isi Lipoti a le tatou Komiti, na ou tu atu lava teena aloaia lava i totonus o le Maota. O e manatua le teena lena e au? E le faapea o le a aumai lava le fautuaga a le Komiti....

**Afioga Hon PALUSALUE FAAPO II:** Lau Afioga i le Fofoga Fatalai o le mea e fia faasao. E teena aua e te le o saofai i le Komiti, a o le mea lea o lea ou te saofai ai.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** O le fautuaga e aumai e le Komiti i le Palemene atoa ona fai loa lea i ai o le faaiuga a le Palemene atoa. O lea la ua faatu atu le lafo toe teuteu, o lea umi lava ae ona o le tuuavanoa foi o le Afioga i le Fofoga Fatalai ae se i aumai pea outou finagalo, a o lea e aumai outou finagalo, e tagatasi lava. E le o i ai se tulaga foi lele o le uta fetalai o le uta a le poto.

**FOFOGA FETALAI:** Ia, tulai mai le sui usufono mo Faleata Sisifo.

**Tofa LEALALEPULE RIMONI AIAFI:** Lau Afioga i le Fofoga Fatalai, o lea e le i maea atu, o lea sa faauilavea, ae toeititi lava uma atu lau folasaga. O le mea lea e saunoa i ai le Afioga i le Palemia i le process ma palota ma mea e fai.....

**FOFOGA FETALAI:** O lea o le a tuu atu le avanoa i lau Afioga i le Minisita pe a uma mai le lauga lea e fai.....

**Tofa LEALALEPULE RIMONI AIAFI:** O lea ou te malamalama i ai, e sao le Afioga i le Palemia. O mea uma e fai ma fesuiai, fai le palota, ou te auai. Na o sina au faapulapula laititi lava lau Afioga i le mea lea, aua o tatou iugafono ia na fai, se e le o se mea na faia e se toatas. E tumau i lou mafaufau le saunoaga a le Afioga i le Palemia talu ona tatou omai i le Maota lenei, sa faapea lana saunoaga, i le eseesega o le statesman ma le politician, politician only looks i le palota lea o le a sau nei, stateman, vaai mamao.

Lau Afioga, na pau lava lena o lau tala, ne i te i ua e saunoa atu i tua i lau Vaega, ae manatua lau Afioga, o le Fofoga Fetalai ma le Sui Fofoga Fetalai, o tagata foi o lau Vaega, le iloa po o tagata aupito sili na ona alolofa ia oe. A o le vaega lena o le a e au i ai, e le alolofa ia te oe. Ma le faaaloalo lava.

**FOFOGA FETALAI:** Tulai mai lau Afioga i le Minisita ona avatu ai lea o le avanoa i lau Afioga i le Sui Taitaifono o le Komiti.

**Afioga Hon FIAME NAOMI MATAAFA:** Faafetai lava i lau Afioga i le Fofoga Fetalai mo le avanoa e faamalamalama atili ai lava lau lafo toe teuteu. Ma e i ai lava nai suiga taua o lo o i totonus o le Tulafono Toe Teuteu lenei, ae i ai suiga ogaoga e lua. O le suiga muamua lau Afioga i le Fofoga Fetalai, ina ia tasi lava le lola e palota ai tagata Samoa uma. Ua tatou manatua i le taimi nei, o lea e lua lola, o le lola o le faamatai ma le lola o le palota taitoatas. O le isi la suiga ogaoga muamua lena.

O le suiga lona lua, o lea e i ai le vaevaega o tatou itumalo ia e ono ina ia tasi le palota a le tagata palota, aua o le mea lea na tatou sau ai i itumalo ia e tailua o latou sui usufono, e tele lava taga eseese sa faatino ai i totonus o le faiga palota lea, ma le atoatoa ma moni ai le agaga o le faiga o le palota, aua o lea tatou te malamalamama uma i le faiga o poloka i palota ia e taitoalua ai faipule. Mai le tasi o le lola, lea ua faamuta le tatou lola o tagata palota taitoatas, a o lea ua faatulaga mai a tatou itumalo tu taulaga. E pei la o suiga ogaoga nei o lea o lo o i ai i totonus o le tatou Tulafono lenei ma isi vaega ia o fuaiupu lea ua uma ona tatou pasia. A o le Fuaiupu 13 lava, ou te toe faapea atu lava, o le mea lea e toa ai, e tasi lava le itumalo, o Safata. Ae faamolemole lau Afioga i le Fofoga Fetalai, e le na o le Komisi o le 2012, o le 2006 sa faapea foi ona fautuaina mai ai le Komisi ina ia faapea ona fai le vaevaega.

**Afioga Hon PALUSALUE FAAPO II:** Lau Afioga i le Fofoga Fetalai, o se mea e fia faamalamalama.

**FOFOGA FETALAI:** Se i uma ona avatu lea o le avanoa Palu.

**Afioga Hon FIAME NAOMI MATAAFA:** Se i uma lau tautalaga ona e saunoa mai lea.

**Afioga Hon PALUSALUE FAAPO II:** O lena e te iloa le conflict of interest lena e i ai.

**Afioga Hon FIAME NAOMI MATAAFA:** I, e faigofie lava le saunoa mai i le conflict of interest ae mafaufau foi lau Afioga i le Taitai o le Itu Agai. A na faapea nei o saunoa mai se isi faipule, ae a faapea o lena e saunoa mai lava lau Afioga, e le mafai lava ona aveese ai lena masalomia. Ua e lafo mai la i se isi tamalii o lou itumalo sa saofai ai, a o lea foi e te saofai oe.

**Afioga Hon PALUSALUE FAAPO II:** Leaga o la e sua le faavae o le itumalo. O e malamalamama i le mea lena? O la e sua le faavae o le itumalo.

**Afioga Hon FIAME NAOMI MATAAFA:** Na o le pau lava le mea a le Tulafono Tau Faaofi lea e fai, o le tosi o le laina i le mea e fai ai faiga palota. O lea ua autovaa mai le itumalo o Safata, omai le isi e aumai lau mau, omai isi e aumai le mau lea e avatu i le Tulafono a le Malo. O ai la e faia le faaiuga? E fai e le Malo. Ae na ou faalogo atu ia oe o fai lau tala, e le faia e le Malo, e le faia e le Malo le faaiuga o le mea lea.

**Afioga Hon PALUSALUE FAAPO II:** Lau Afioga, e faalua ona fono le itumalo, fono i Togamau fono i Siulepa, e le i oo atu, a o lea e faaui mai tua ia oe.

**Afioga Hon FIAME NAOMI MATAAFA:** O le mea lena na tofi mai ai oe, tofi mai ai au, o le faia o tonu o Tulafono, e le faia e se itumalo. O le mea lena e iloa ai le vaivai o lou faipule ma lau faitulafono.

**Afioga Hon PALUSALUE FAAPO II:** A o oe, leaga e te fia Palemia. Ioe, e te faufau.

**Afioga Hon FIAME NAOMI MATAAFA:** Aua o lea e iloa ai au. A o oe, e te nofonofo i inei e alu atu e nofo mai i ina o lou le mautonu.

**FOFOGA FETALAI:** Malie Palusalue, se i uma ona ou avatua lea o le avanoa.

**Afioga Hon FIAME NAOMI MATAAFA:** Ioe, ma o le toeaina lea e nofo i i, o le toeaina lea na tigaina e fai mea a Safata ae e sau e saofai ai. Na e fasiotia le faipule lea sa alu e aumai le nofoa lona lua o lou itumalo. E a, e lelei lena? Na faapena ona e finau mo Safata? E leai, ua laki Safata ua maua a latou palota e lua.

**FOFOGA FETALAI:** Malie le Taitai o le Itu Agai.

**Afioga Hon PALUSALUE FAAPO II:** Lau Afioga, ua lava lena, o lea e fai atu lau tala ia oe, tuu le mea lena o lou faufau.

**Afioga Hon FIAME NAOMI MATAAFA:** Ona faaiu atu ai lea o lau faamatalaga i lau lafo toe teuteu, lau Afioga i le Fofoga Fetalai, e faigofie, e faigofie lava, e leai lava se itumalo o gagana, e tasi lava le itumalo lea ua toa ai le tatou mataupu.

O lona lua, lau Afioga i le Fofoga Fetalai, i lau lafo toe teuteu, o lea ua ou talosaga atu e toe faafoi mai i tua le vaega o le Fuaiupu 13 1(e), o le vaega lea o lo o aiaia ai le itumalo tu taulaga, ona lau Afioga, o lea ua i ai le fautuaga a la outou Komiti, e toe tapena lelei mai suiga na aumai ia Tesema ma Ianuari. O suiga la na, itumalo tu taulaga, lea e i ai le faaopoopoga lena i lau lafo toe teuteu lau Afioga. Po o e malamalamama mai i le uiga o le lafo? Ae aumaia le fesili.

**FOFOGA FETALAI:** O lea ua ou maua lelei atu lau Afioga i le Minisita. Malie lava Tuuu se i avatu muamua le avanoa leaga o lea faatoa maua mai le avanoa o le Minisita mo Galuega, Felauaiga ma Atinae Eseese, o se tasi o sui usufono mo Safata.

**Afioga Hon MANUALESAGALALA MATI TUIGAMALA ENOKATI POSALA:** Lau Afioga i le Fofoga Fatalai, faafetai mo le avanoa. E faamalulu atu foi i le paia o le Maota i le faafofoga mai i lenei mataupu, aemaise le Afioga i le Sao Faapito. E leai o le va nonofo ai ma Safata, e manino ma malamalamala i le tatou sootaga. Ae manumanu le tavae i ona fulu, ne i manao i le ia ae maumau ai le upega. O le vaevaeina o itumalo mo faiga palota, e faalagolago i ana tu ma aganuu ma le faa-Kerisiano ina ia laugatasia uma. O tu foi ia ma aga a tagata Samoa, e le o ni tu e agai i ni eleele po o ni fanua. O le foafoaga a le Atua mai lava i le amataga, e muamua lava le eleele matutu, o le sami, o le vanimonimo. A o le taualuga, o le tagata o le palealii o ana galuega, e mafai ona ia tausia ma vaaia fanua nei ma eleele. Atonu o le faavae foi lea o lea e fua agai i ai le silasila a le Malo i vaevaega ia e faatino nei mo ana faiga palota. E le o ni malaefono, a o tuaoi o aiga ma tagata soifua. E pele ia te au lou itumalo o Satunumafono, leaga o le Aiga Malosi. E pele foi ia te au le Alataua, leaga o muai tofiga ia na fai, sau oe Fata, o e na latou assaina le gasu ma ea ai le atunu, sau ai Fata e alu ma lou Alataua, sau oe Lealali e alu ma lou Tumua, lea na maua le uluai Malietoa. O mea ia e pele i le loto. O le aumaiga o le pepa agai i totonu ina ua i ai le suiga lea, na uma fai leí .avatu le Lipoti a le Komisi Suesue ia o lea ua saunoa le Afioga i le Minisita, tuu atu i le Kapaneta ua talia ma tuuina mai, Komiti, o lona uiga, e le i mama foi ona sailiili le Kapaneta tuuina mai i le Komiti, lea na toe sui atu ai, ae sui atu ua Togamau ma ona tua, Siulepa ma ona tua. A o fea Aiga? O fea paia ma mamalu? O fea o i ai mea ia o measina ia e tiu ai lo tatou va nonofo ai? Leai. O le mea o lea e te tilotilo ai Sa Tunumafono, faataatia mai, Sa Tunumafono ma le Alatauaí .

**Afioga Hon PALUSALUE FAAPO II:** Lau Afioga i le Fofoga Fatalai, o se mea e fia faamalamalamala.

**FOFOGA FETALAI:** Ia ou te talosagaina lau Afioga i le Taitai o le Itu Agai, a maea ona ou tuu atua lea o lou avanoa.

**Afioga Hon PALUSALUE FAAPO II:** E tatalo atu i lou uso a sui usufono, ia faamama le sausau, faamama le sausau o la e faafogafoga mai lo ta itumalo.

**Afioga Hon MANUALESAGALALA MATI TUIGAMALA ENOKATI POSALA:** Se i aumai o lea e fai lau folasaga, lafo i ai o lea foi e tau faamalamalamala le mea lea e taumafai atu ai.

**Afioga Hon PALUASLUE FAAPO II:** Ae malie lou finagalo, o lea o le a fai le faaiuga a le Malo, ou te tatalo atu faapena, o la e tapuai mai le Falefa o le Ulugatanifa, ni fa au, ia ua lava.

**Afioga Hon MANUALESAGALALA MATI TUIGAMALA EKOKATI POSALA:** Faapea au e leí .a lea e manino i le faatulagaga lea saí .Tunumafono, Alataua, lea ua faatino i i, o le mea sili lea ma taua, faapea au e le tulai mai le sui usufono mo Siumu e tetee i le mea lea e taua le Alataua, leaga o le fofoga o le Alataua la e i ai i o ia Lio, sa tatau la ona

manatu i le nonofo ai lea, a o la e faafogaga mai Siumu, e le amanaia e lo latou sui usufono le tulaga lea, e le gata e le amanaia le roll a Lio ma le taua o Siumu i le nonofo ai, leaga o le Alataua uma lena e tau i ina. Ua ou manatu ai, ou te le iloa po o ua malamalama i ai le sui usufono lea, a o le taua lena o lea e taumafai atu ai mo le vaevaega lea o lea eí ..

**Tofa Hon TUUU ANASII LEOTA:** Lau Afioga i le Fofoga Fetalai, o le a le malie upu a le sui usufono lea, faasao upu, tautala oe i mea e te tautala i ai.

**Afioga Hon MANUALESAGALALA MATI TUIGAMALA ENOKATI POSALA:** Soia le 1 mafaufau. A o le agaga maualuga o la e faafogaga lou itumalo, e le faapea na ou tulai ae i le aso na sau ai le savali, ae na sau foi le savali a le Alataua latou ma isi mau savali agai i le Afioga i le Palemia i tulaga ia, e le faapea oí .e leai e taua, a o le taua lena, e taua Sa Tunumafono o le Aiga Malosi, e taua foi le Alataua leaga o leí ..maualuga lea, pau lava ia o mea, Alataua, ae a fai mai nei, o tua o ai? A o fea la isi nuu ia i le amata mai i Saanapu, e afio ai le Anapu ma le Toalima o le Maopu o le Tuiiana lea sa tausi vaatele e Tuigaleava ma le Faletolu ma Aiga e lua. Oo mai i Sataoa, Siulepa, o la e afio ai Taoa ma Afemata, Seiuli ma le Maopuí ..

**Afioga Hon PALUSALUE FAAPO II:** Lau Afioga i le Fofoga Fetalai, se na o lou soso atu i ou tafatafa. Se Manua, Manua, se alofa ia, alofa ia, a lea sa ou vaai atu ia Anapu o sau i le savali. Se paga eí ...

**FOFOGA FETALAI:** Lau Afioga i le Taitai o le Itu Agaií í

**Afioga Hon MANUALESAGALALA MATI TUIGAMALA ENOKATI POSALA:** Ia faapea foi le Anavatua ma le Faletolu. Lotofaga, o la e afio ai Ama ma Afoa, susu ai le Manualesgagalala afio alo o Tunumafono, tasi ia mea o lea ua nonofo ai, e faasolo atu lava e tau i Vaiee, ia o le tulaga lena, o o i le Alataua, o lena e afifio ai le faauluuluga o le Faasuaga. Ia se i vaai i ai i tagata, o lou le fiafia lea i le savali, pei e manatu maualalo i o i itu ia. Ae o le Tulafono lea ua faataatia e le gata ina o tu ma aganuu a o le faa-Kerisiano ina ia tutusa tagata uma, e le o le faapito ae tuu maualalo le isi, ia laugatasia, o le finagalo lena o le Atua, ia manuia, faafetai.

**Tofa LEVAOPOLU TALATONU:** Lau Afioga i le Fofoga Fetalaií ..

**FOFOGA FETALAI:** Malo. O lea ua ouí í malie lava sui usufono se i fai atu le tala lea a le Fofoga Fetalai. Ou te taofi o le Maota lenei o le Maota e saili ai le tofa ma le faautautaga o lea e tapuai Samoa, ou te tatalo atu i le paia ma le mamalu o le tatou Fono, e le o na o tatou lea e fono, o lea e tapuai Samoa i ona tulaga faalupelupe ma le atunu atoa. O lea foi e tapuai mai le itumalo o lea ua tatou vavao ai i le aso, o le tatalo la a le Fofoga Fetalai, fai malu faiva, ou te tuu atua lava le avanoa e tou te saunoa ai, seja manino lelei a outou tuleiga ma a outou saunoaga o lea ua saunoa malamalama le Taitai o le Malo, faaali le finagalo o le Malo, o lea foi e taumafai mai le tatou Komiti, o lea foi ou te tuu atua le avanoa, se i faaali o outou finagalo, ona tuu loa lea i le vaitele, o ai le Vaitele? O le Palemene lenei e faia tonu. O lea ua taatia i lagotonu le finagalo o le Afioga i le Minisita e a ia le Tulafono. Ua tatou

vaavaai foi i le mea na agai mai ai savali a le itumalo, e le manatu faatauvaa le silasila ma le vaavaai ona e le mafai ona tali lumafale le afio mai. O lea foi ua molimau le tatou Palemene, molimau le Malo, o le aso e fai ai le faaiuga o le mea lenei, ae fai le faaiuga i le auala e aupito i sili ona faatemokarasi, ia ona molimau lea o le aso lenei ma le tatou faamoemoe. O le a ou avatua pea le avanoa mulimuli lea i lau Afioga i le Taitai o le Itu Agai ma le sui usufono mo Siumu, ma le sui usufono mo Faleata Sisifo, ona faaiu mai laia e le Afioga i le Sui Taitaifono, ia ona avatu loa lea o le Faaiuga a le Fofoga Fatalai.

Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fatalai, ou te avatu malu i puega i lau Afioga aemaise le Afioga i le Palemia ma lena itu, o le mea na ou popole ai, se ua logo logo Samoa i lenei itumalo, o le ala foi lea o lou tau soso atu i lou uso a sui usufono, se i faamama le sausau, ou te manumanu i le itumalo, ua laina, ua sautia, ua faatasina i le ala. O le mea lena ou te fai atu ai isi ou uso, ia malieí ...

**Afioga Hon MANUALESAGALALA MATI TUIGAMALA ENOKATI POSALA:** Lau Afioga i le Fofoga Fatalai, ua tupu le sau o le savali lea, o le mea lea sa fai e le sui usufono mamalu lea le Taitai lea o le Itu Agai, o le le mafaufau i le itumalo ma tatai maií ...

**Afioga Hon PALUSALUE FAAPO II:** Silasila la i tuuaiga ia.

**FOFOGA FETALAI:** Malie le Minisita o lea o le a ou avatua le avanoa pe a maea atu le folasaga, o lea sa ou tuu atua le avanoa analaile. Saunoa lau Afioga i le Taitai o le Itu Agai.

**Afioga Hon PALUSALUE FAAPO II:** O la e faafogafoga mai le itumalo aemaise o tumutumu o le itumalo, e leai ma se upu a Palu na fai atu e afio mai, silasila i tuuaiga ia ua aumai. O le mea lea lau Afioga i le Minisita o lou uso a sui usufono, se alofa ia, alofa ia, ua logona Samoa atoa, ua logona le lalolagi, talofa e, talofa e, i le itumalo ua faatasina, i, aisea? O le manao ia faataoto le itumalo i le mea e tatau ona i ai, ioe, e uma oe, uma au, a o le lumanai, pau lava lea, o lea o le a fai le finagalo o le Malo, tuu finagalo o le ta itumalo, o taua, o lima ma vae o le itumalo, na o le faalogo lava i ai. O le a le mea e fai? Fai i i, usitai, usitai. Aisea? O lea e ta te pale, pale i le faaaloaloga maualuga a le itumalo. O le mea lea lau Afioga, e le toe tele sau upu, pau lava le mea ou te faamalulu atu i lau Afioga, aemaise o lenei Palemene, aemaise o le tapuaiga a lou itumalo, talofa e, i le tapuaiga a le Falefa o le Ulugatanifa. E faalua lava ona valaau fono, e faalua, fono i Siulepa e le o atu le Alataua, fono i Togamau e le o atu, e leai ma se isi na sau i inei i le tatou Komiti, ae talofa e, o lea o le a fai e le Minisita le faaiuga a lou itumalo, ioe, pei o le mea lena, ae ui i lea, ia tatou tuu i le Atua le amiontonu o le mea lea, ia pau lea o sou leo, faafetai.

**FOFOGA FETALAI:** O lea ua ou maua lou finagalo.

**Afioga Hon FIAME NAOMI MATAAFA:** Lau Afioga i le Fofoga Fetalai, o le mea e fia faasao. E le faia e au le faaiuga, e faia e le Palestene aua o lea ua i luma o le Palestene le lafo. O le mea lena e faasao.

**FOFOGA FETALAI:** Malie lau Afioga i le Minisita, le sui usufono mo Siumu o le avanoa mulimuli, tulai mai le sui usufono mamalu.

**Tofa Hon TUUU ANASII LEOTA:** Faafetai i lau Afioga mo le avanoaí ...

**FOFOGA FETALAI:** Ia ou te avatua foi le avanoa i se tasi o sui usufono mo Falealili, Tofa Hon Tuiloma Lameko, e faigata o le toe ulutaia o le Maota.

**Tofa Hon TUUU ANASII LEOTA:** Ia o lou avanoa o le a faasui o le Komiti. Lau Afioga i le Minisita o le a ou le toe tautala tele i le vaega lea na e laga mai, o le Alataua o le fofoga o le Alataua, o le a ou le tautala i vaega ia leaga ou te manumanu i lo tatou va o tafatatafuga o Safata ma Siumu. Na ala ona ou tutu atu i ai ma ou tutulai atu i i, ona o lea ou te taumafai ou te tu i lou tofi, o au o le sui o le Komiti, ou te alu e faatino le mea ou te talitonu e sao. O le conflict of interest lea e taua mai i i, e le faia e Palu toatasi se tonu, e le o i ai foi Tuivalea i inei i le Komiti, o lea e i ai le Palestina, talofa i le Afioga i le Minisita o lea sa fai ma sui, o lea ua saunoa manino le Palestinaí .saofai, talofa, lau Afioga í í

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, soia le tatuia kesi, a tatu kesi o le isi palaaí lea e aupito sili onaí ..Lau Afioga i le Fofoga Fetalai, e ese le faigofie o lenei mataupu, o le matua faigofie lava, e leai lava se mea e tau faalalolalo mai ai fua lau Afioga i le Taitai o le Itu Agai, e le faapea foi ua faatasina le itumalo, e leai, o uiga ia e saili malo, a, e tatau ona savali le itumalo, ma e ua tolu savali, omai i inei o atu ia te au, o lea na ou faasalalauina mai, e tau fai sao uma lava, sao Sa Tunumafono, sao Alataua, tau fai sao uma lava, a o le mea e finagalo i ai le Maota, e le o lotea upu o lo outou itumalo, o le sese lena o savali ia na omai. O le faigofie ia o le mataupu lea tatou te talanoa i ai, o le sailiga o le tofi, ae le faapea o le a aafia ai fua ia tulaga o le itumalo, a o le tulaga lava ia faa-Komiti, o tulaga lava ia faa-Palestine, e aumai Lipoti a Komiti i totonu, ae le noatia ai le Maota o le a faapea o le a aumai loa lava talia, e le faapea o le a aumai lava talia. O le mea lena ia malamalamalama lelei, e le faapea o le a limataitaiina ai le Maota lenei, a aumai e teuteu, teuteu, e le faapea foi o teena la outou mataupu, e te le o faafogofoga manino lava i le saunoaga a le Minisita e ana le Tulafono, e le faapea o teena atoa uma la outou mataupu, e i ai mea ia e fia teuteu ó ma e i ai mafuaaga, aemaisa o le tulaga e le i faapea na faapaoe ona fai le iuga a le Kapaneta, ona avatu ai lea i le Komiti, o lea la e le i talitonu le Kapaneta e suia le aiaiga na aumai muamua. Ma o le mea lea ou te tuualalo atu ai lau Afioga i le Fofoga Fetalai, o lea ua uma ona ou tau atua, o le mea e laga atu e le Minisita e tu ai au ma le Kapaneta ma le vaega atoa lenei, e tatau ona ou faamanino atu, o le tagata lava la e le tu ai, ia ua nofo lava ia ma fai lona ia iuga.

Lau Afioga i le Fofoga Fetalai e faapena ona fai ia faiga vaega, e te le i sau i inei, e tasi lava lou auala i le Maota lenei, na e sau i le vaega. O lea la na ou tulai atu ai lau Afioga i le Fofoga Fetalai e avatu le lagolago o lea ua taoto le lafo toe teuteu, ia a sau lava la ua tafea le lafo, ona faagasolo lava lea o tatou mataupu.

**Afioga Hon PALUSALUE FAAPO II:** Lau Afioga, na o se mea lava e faasao.

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Leaga e maoae le tuuaiga a le Afioga i le Palemia fai mai e sese le mea na savali mai ai lou itumalo, i, e i ai le isi taimi fai mai e sao uma o, a sao fai mai e sese, o le sao lea na omai ma le itumalo.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** E tatau ona ou faasao atu la le mea lea, atonu ou te le i fai atu e sese, o lena o le a e faauiga sese, a lea na ou fai atu e tau fai sao uma lava mea na omai ai le itumalo, a iloa loa la e tau fai sao uma, o le a la le mea o le a fai? E tatau la ona fai le iuga a le Kapaneta i le mea sao, sao silisili.

**Afioga Hon AEAU PENIAMINA LEAVAISEETA:** Lau Afioga i le Fofoga Fetalai, se i tau vavae laitiiti foe. Se i fai atu lava lau fesili lea, silasila foi le Afioga i leí .le procedure lea ou te fai atu ai. O le Afioga i le Tamaitai Minisita lea e ona le Tulafono, o lau fesili faamolemole, i le taimi ua uma leí .leaga e mataga le mea, tulou lava, o le omai tatouí ..tulou lava le mamalu oí ..aua o mea ia sa tatau ona fai i tua, e i ai le Komiti o le vatapuia o le Komiti ma le Afioga i le Minisita ae le i aumaia le Lipoti, a o le Lipoti e tatau ona ui mai i le Minisita aumai i i, a o le mea lea ua tulai mai ua aumai i i, fesili aloaia le Tamaitai Minisita ae le i faia, aua e fai le palotaí .a o le i faia lau palota ua kava e le Palemia outou uma lava, palota i i le meaí .ou te le malamalama, o le a le mea na le faia ai i tua ma aumai aloaia, o lea ua tuu le fesili taua lau Afioga i le Sui Fofoga Fetalai lea sa tau follow atu ai, pei ua muddle up atoa le tatou procedure i i? O le fesili lea.

**Afioga Hon FIAME NAOMI MATAAFA:** Lau Afioga i le Fofoga Fetalai, pei o se mea e fia faasao i le saunoaga a le sui usufono lea faatoa faamaui atu faapea sa tatau ona fai e le Komiti, ia o lea ua tatou malamalama uma, sa outou faitau i le nusipepa i a ma tusi ma le Fofoga Fetalai, aumai le finagalo o le Komiti, ia avatu foi so ta ita malamalama vaivai. O le mea lea faapea, ana ou alu atu e soalaupule, ia lelei, o le Tulafono Tumau, fai mai e mafai e le Komiti ona invite valaaulia le Minisita e alu atu e tautala i lana Tulafono. O le tusi a le Komiti lea na avatu, ia matou o atu e talanoaina a outou suiga. Faamolemole lau Afioga i le Fofoga Fetalai, o le Tulafono, o le Tulafono a le Maloí ..

**Afioga Hon PALUSALUE FAAPO II:** Lau Afioga e leitioa vevesi, o le mea e fia faamalamalama, e leitioa vevesi í

**Afioga Hon FIAME NAOMI MATAAFA:** E le o se Tulafono a la outou Komiti, a faapea e i ai se finagalo o la outou Komiti, o lea ua auala mai i la outou Lipoti, o le finagalo lena a la outou Komiti, auala ia o mea, ioeí í

**Afioga Hon PALUSALUE FAAPO II:** E vaai i le tusi ae le vaai i le agaga o le tusi, o le faaaloalo i lau Afioga e te afio atu, a o lea ua e vaavaai i upu ia, e leitioa vevesi o oe.

**Afioga Hon FIAME NAOMI MATAAFA:** Leai, o le mea lena e tupu, ma le isi mea, ou te le alu atu, aua o lea ou te iloa, o le Tulafono, o le Tulafono a le Kapaneta. A ou alu atu la tatou fono ona fai laia lea o tatou tonu, a o le a le mea e fai e au i le Faaiuga a le Kapaneta ua uma ona fai? Tautoga a au o le Minisita, a o le Kapaneta lea e ona le Tulafono lea.

**Afioga Hon PALUSALUE FAAPO II:** O le a le mea na e le afio atu ai e faamatala atu le mea lena i le Komiti? Se vaai i le faigofie o le mea, afio atu e faamatala atu, o lea ua vevesi le Palemene o oe.

**Afioga Hon FIAME NAOMI MATAAFA:** A o lea e manao e soalaupule i tua, ona aumai ai lea o fautuaga, e le talafeagai. Ia ma lea lau Afioga i le Fofoga Fetalaií í

**FOFOGA FETALAI:** Ia malie ia lau Afioga i le Tamaitai Minisitaí ..

**Afioga Hon FIAME NAOMI MATAAFA:** Leai, e lelei lava lou tali atu pea i le aualii ia e tutulai mai. I le mataupu lava lea pei e faafoliga mai, o matou nei o ni tagata leaga ua le o atu ina ua finagalo le Komiti, lau Afioga i le Fofoga Fetalai, e molimau le Ofisa o le Loia Sili, e molimau le Ofisa o Faiga Palota, e tasi lava le o atu o la outou Komiti i le amataga, outou saunoa mai, ia o loa, a manaomia outou ona outou omai lea. Le mamalu o le Palemene, so o se Tulafono nofo le Ofisa o le Loia Sili, nofo le Matagaluega lea e auala mai ai le Tulafono, e faufautua i le Taitaifono ma le Komiti. Ae a? Fai lava latou, e leai ma se valaaulia o le Loia Sili, leai ma se valaaulia o le Ofisa o Faiga Palota, o le na tapena maia le tatou Tulafono. O le sao la lea o le faiga o mea? Fai o outou finagalo, alu i luga o le avanoa o tatou o tagata fai Tulafono, lawlessness, o le mea lea o lea e aliali mai ia outou.

**FOFOGA FETALAI:** Ia ou te faamalulu atu ií í

**Afioga Hon PALUSALUE FAAPO II:** Ma le Palemia e i aií .

**Afioga Hon FIAME NAOMI MATAAFA:** Ae le i saunoa mai le Fofoga Fetalai, o oe lea e te saunoa mai, lea ou te tali atu ia oe, leai e le o se tagata o le malamalamala ma le malamalamala ia oe o le isi tagata fasioti tagata i le faiga palotaí .

**Afioga Hon PALUSALUE FAAPO II:** Ae aua e te lafoa upu faapena, aua e te lafoa ni upu le mafaufau, o lea e afio le Taitaifonoí ..

**Afioga Hon FIAME NAOMI MATAAFA:** Ioe, a tilotilo sui usufono ia oe, ona iloa lea, o oe o se sui usufono, ua e matuai fasiotia lou uso a sui usufono.

**Afioga Hon PALUSALUE FAAPO II:** Oi, oi, oií ..

**FOFOGA FETALAI:** Malie leí ..ou te faamalulu atu i tulaga o lenei aso, e talitonu foi le faamoemoe o lea ou te taumafai atu e faataatia le tatou mataupu i lagotonu, o lea lava ou te taumafai pea e tuu le avanoa ona o le tulaga o le mataupu ua faamalamalama ona e le faigofie. Ae malie lau Afioga i le Tamaitai Minisita, o lenei lava ou te maumau iumaea atu ma ou manatu tele i lo tatou va nonofo, leaga o lea ua ese le tulaga lea ua ou saofai atu ai i luga i i o lea ua ou saofai faa-Fofoga Fetalai, ae mo lou silafia, o au nei o le Taitaifono. Ou te le toe manatu e ta te toe asa se ogasami ua uma ona asa, ua uma ona fai a ta upu, tala ma le Taitai o le Malo, a o lea ua tauau ina tetele tafega ae selefutia Vaisigano o lea ou te nofonofo atu, e tatau foi ona seu silasila i le mamalu o le Komiti, o le Komiti lenei e le o se Komiti faataatia, o le Komiti e afio ai le Afioga i le Palemia, o au o le Taitai o le Palestene o le Fofoga Fetalai, ia ma le Afioga i le Taitai o le Itu Agai. Afai foi la o le a se agiagi atu i lau Afioga i le Tamaitai Minisita ona e finagalo malie lea, oolo o pito vaa ma e onosai e le faigofie le mea lenei o le toe tatope mai o Teuteuga i totonu o lea ua tatou i luga o le gaga, o lea la ou te taumafai atu e faataatia i lagotonu lou finagalo. Ou te manatu o le a faaiu ai i i felafolafoaiga, o le a fai Faaiuga a le Maotaí ..

**Tofa Hon TUUU ANASII LEOTA:** Lau Afioga i leí ..

**FOFOGA FETALAI:** Malilie sui usufono, Tuuu, o lea ua logona ia finagalo, e manatu foi o lea ua manino ma malamalamáí ..

**Tofa TUUU ANASII LEOTA:** E le i uma lau lauga.

**FOFOGA FETALAI:** O lea o le a ou tuu atua leí ..o lea ua ou maua leí ..o le a le isi mea lea e te finagalo i ai?

**Tofa Hon TUUU ANASII LEOTA:** E leaga o lea na saunoa le Afioga i le Palestene e aua le faapa ina, e ala ona faapa ina ia lagona uma, o le mea lea ou te taumafai atu ai o le mea sao, a? O le mea la lea ou te faapea atu ai i le taimi lenei, maimau e, aua o lea ua poloka mai e le Palestene le palota, maimau e pe ana tatala se i fai le finagalo o le sui usufono na filifili ma tofia mai ai e fai le mea o i ai lona loto. Ma lou faaaloalo.

**Tofa LEALAILEPULE RIMONI AIAFI:** Lau Afioga e puupuu lava lou manatu ona faaiu lea e le tama matua pe a tusa ai ma lou finagalo.

**FOFOGA FETALAI:** O lea o le a ou tuuina atu le avanoá malie lava le toe Tama matua o le Palestene. Tulai mai le Minisita mo Tupe Maua.

**Tofa Hon TUILOMA LAMEKO (Minisita mo Tupe Maua):** Lau Afioga i le Fofoga Fetalai faapea sui usufono o le Maota, faafetai mo le

avanoa ua tuuina mai i lou toeaina. O le mataupu lenei ina ua faatoa oo mai i le Maota, na valaau a le fono a le Komiti i tai, a sue i faamaumauga la e i ai Tuiloma po o Pule, o Pule o le alo o Tunumafono i Safata lea sa faipule ai, lea na defer ai e le isi ou uso mai Safata lea ua Taitai nei i le Itu Agai, lea ua ou fai i le Itu Agai, afai e faa-Taitai pea Palu e oo mai le faavavau tou te le au.

**Afioga Hon PALUSALUE FAAPO II:** Lau Afioga leaga e matuia tuuaiina ia e aumai.

**FOFOGA FETALAI:** Malie o lea o le a uma ona avatu lea o le avanoa.

**Afioga Hon PALUSALUE FAAPO II:** Lau Afioga i le Minisita mo Tupe Maua, o au ou te alofa tele ia te oe, ae aumai loa faaupuga ia, leaga o la e faafofoga mai le Itumalo o Safata e te fai ai upu. Vaai oe le alo o Tunumafono o a nei upu e faamamasagia ai le tofi o le Itumalo o lo o faafogafoga mai.

**Tofa Hon TUILOMA LAMEKO:** Faapea na ou fai atu - o lōu faalupega lena o Alo o Tunumafonoí

**Afioga Hon PALUSALUE FAAPO II:** I, ga ua e fai mai ua ou faalataina oe.

**Tofa Hon TUILOMA LAMEKO:** Ou te le o fai atu i se isi mea alu e vaai i le Tusi Faalupega po o ai ó o Pule lea o le alo o Tunumafono. O le mea muamua e tatau ona silafia a tatou o i Upufai o le Itumalo vaeatu lo outou mamalu a suesue uma i ai o la e alu i tua i le aganuu e le o tiaina i fafo le tatou aganuu. O lea ua ou fai , o Safata e vaelua tonu lava i Vaiee, o le mafuaaga o i ina e i ai le fanau a Tunumafono. O le itu i o o le Alataua lea e amata i Fusi o lena e i ai Tapaau i ina e vaaia le Alataua, ona ou alu atu loa lea ina ua aami mai au ou fai atu o le faalupega sao e o e ave iaí í E 20 tausaga o avea au ma sui usufono mo Safata, o lona uiga e le o se tamai taimi na ou nofo ai i inei. Na sue uma lavaí i le taimi na ou talosaga ai i le Palemia mo so matou tofi faaopoopo lea e nofo ai nei le Taitai o le Itu Agai ma ó o le mea a lea na muamua sue. E tatau ona sue po o fea le mea e te sau ai, o le a ou tulaga i totonu o le mea lea. O lea na ou sau ai loa ma ou fai atu i le Komiti lea, o lou manatu o le tulaga sao lena, o upu na o Safata e amata i Vaiee aisea? Aua e i ai le gafa o Tunumafono i totonu o Safata lea e ala ai ona tau o Sa Tunumafono ma Tapaau na Tausi e le Alataua, ese le Alataua ia ..Lau Afioga i le Fofoga Fetalai ma le mamalu o leí o le mafuaaga lena na ou fai atu ai, o le iuga lena o lau faamatalaga. O le tulaga moni e vavae ai e amata mai i Vaiee e oo i Saanapu o Sa Tunumafono lena, aisea? O lena e i ai i totonu i ina usuga a Tunumafono, o le tulaga o le Alataua e leai sau tala e faia i ai e ese foi na mamalu latou a o Safata o le tulaga lena.

Lau Afioga i le Fofoga Fetalai, e le mafai ona tatou o ese mai ma tulaga e masani ai le tatou atunu. Ia manuia le Fono.

**FOFOGA FETALAI:** O lea ua maua lou finagalo. Ia se tasi o sui usufono mo Aana Alofi Nu, 1, Afioga Leaupepe Toleafoa Apulu Faafisi, sa e fia saunoa o lea o le a faauma atu le tatou mataupu ua savali foi le tatou taimi.

**Afioga Hon LEAUEPEPE TOLEAFOA APULU FAAFISI:** Sa ou fia tulai atu i le taimi ua sola ae ui o lea, o lea ua masuiga malie ona e manumanu foi i le Aiga Malosi ma le tapuaiga, e le na o Safata o lo o faafofoga tapuai mai, o la e faafofoga tapuai mai Lana Afioga Mamalu O Le Ao o le Malo, le Tafatolu e faapea foi ó e manumanu i upu o le Itumalo.

Ae talu ai meamanu e i ai le mea e tupu nei lau Afioga i le Fofoga Fetalai, na ona logo atu i le tatou Fono, e finau Safata i le tofi a o le mea lea na saunoa mai ai le Palemia i le tatui o le Laulau e le sui usufono mo Siumu, ae meamanu Au e pe le fatu. O le ala lea o lou tulai atu faamolemole lau Afioga ia fai se tapu o le tatou Palemene e aua le soona tatuiina le Laulau leaga e i ai isi sui usufono ua matutua toe mai fatu, se meamanu e vevesi Safata ae oti ai le Fasitoo i inei. Ou te tulai atu faamolemole a mafai ona aveese au ma tafatafa o le sui usufono mo Siumu pe maua se isi avanoa e tuu i ai ta ita, ua ta le lava nofo i autafa o le sui usufono lea.

Ma lou faaaloalo lava faafetai. Faafetai Safata ua suiga malie le mataupu.

**Tofa LEALALEPULE RIMONI AIAFI:** Lau Afioga i le Fofoga Fetalai, faafetai ua suiga malie le tatou mataupu. O le mea lea se tasi o sui usufono mo Aana Alofi Nu. 1, Afioga Hon Leaupepe Toleafoa Faafisi, o le sui usufono mo Siumu na te le i tuiina lava se isi ae se i faaaoga le laulau e fai ma kui e le toeaina.

Lau Afioga ua maea le tatou mataupu, a o lou toe tulai e avatu lau faamalo ma le faafetai i lau Afioga, lau Afioga i le Sui Fofoga Fetalai aemaise o sui usufono o le tatou Komiti ma lau Afioga i le Minisita, e leai se mea o faaletonu, faamalo le loto tetele, fai ni tatou palota, vivii ma faafetai, se o aso faapenei e matua filemu ai lava lou loto ioe. Manatua foi lau tala na fai atu ananafi o le tatou mataupu e palota. O lau tala na fai atu i le amataga, ana mafai ona toe tuli au se ou alu e toe sue se isi i le mea lenei ou te malie ai foi. Ae ui o lea malie le Fono ma Safata. Faafetai i lau Afioga i le Fofoga Fetalai.

**FOFOGA FETALAI:** Faafetai, o lea ua manino ma malamalama le sui usufono o le Palota Taitoatasi e te Itumalo i Safata?

**Afioga MAUALAIVAO PAT AH HIM (Palota Taitoatasi):** E leai ae i ai lava sina mea lea e fia faasao. Faamalo ma faafetai i lau Afioga mo le avanoa, ou te talitonu foi o lenei itula ua toafimalie le Maota aua foi felafolafoaiga. Ona pau lava le mea na ou tulai atu ai ou te fia faailoa i lou Itumalo o lo o faafofoga mai le Au Palota Taitoatasi, o lo o sauia le va ma faapena ona tau lo matou Itumalo. Ou te talitonu ai o faapea po o le a le mea ua tupu po o ua malemo le Itumalo, ae leai o lenei lava e auai lo outou sui usufono i fonotaga a le Palemene. Ou te talitonu ia lavapapale mai pea ma toa le tai ma tapuai mai. O a lava ni tulaga o le a i ai le faaiuga o le tatou Itumalo i le Palemene, e faapena lava ona outou faafofoga mai i le logologo pualii atu mo lo tatou Itumalo, ma le faaaloalo tele ia manuia le Fono.

**FOFOGA FETALAI:** Ou te manatu ua taatia i le agatonu felafolafoaiga o lenei mataupu, pei lava ona ou taumafai e maumau iu maea ma ou faaololo maau i le paia o tuleiga ma saunoaga ona e fai foi o lena a o lenei. Ou te manatu e le o se mataupu faigofie lenei i le silasila a le Palemene, i le silasila

a le Afioga i le Palemia ma le Kapaneta aemaise foi o le vaavaai a lenei Komiti. Ua savalia i le 7-8 masina talu ona fonoa le Komiti i lenei mataupu, o se mataupu na fefulifulisai faa-laau mamafa e ala i finagalo, o manatu, lagona ma fautuaga na afifio mai ai le paia ma le mamalu o Itumalo, o nuu ma tagata taitoatas, faifeau, le mamalu o Samoa na valaaulia e le Komiti, e omai se fal ma aumai le tofa ma le faautautaga i lenei mataupu. O lea la ua taunuu mai ai le Komiti i ana Saililiga ma ana suesuega lea sa faaleoina e le Afioga i le Sui Fofoga Fatalai.

Ia malu ave i fale i le faafofoga a lau Afioga i le Palemia ma lau Kapaneta, e taliu tele ae popoe leaga o le tatou va nonofo ai, o le va tapuia o le tafatolu o le tatou Faigamalo, o le taualuga lena leaga o lo o tapuai Samoa i lo ta va nonofo ma lo ta va fealoaloai, tatou te fetauai ai ma fefaaaloaloai i le faiga o faaiuga. O lea ua e saunoa manino ma ave malamalamo o lau Afioga e te auai i le Komiti a o lea foi e te saofai i le Taitaiina o le Malo ma le Kapanetas. E manatu foi e le o taumua alo lou sa e ala i lau faasilasila i le aso lenei, e ala i faiga faaiuga e tatau ona i ai e tusa ai o le Lafo Toe Teuteu a le Afioga i le Tamaitai Minisita. Ou te faamalulu foi i le faafofogaaga a le Itumalo i lenei aso, ou te talitonu e le faigofie le faamaloulou mai ma le sautia i le ala le paia o le Itumalo i ona vaega eseese, i Savali uma e lua pe tolu, na afifio mai ma tala mai aao i le Palemene ia te au o le Fofoga Fatalai ma oo ai foi i le Ofisa o le Afioga i le Palemia. O lea ua saunoa manino le Afioga i le Palemia e ala i le faatofalaiga, o le tulaga ua taatia ai o le manatu o le Malo e tu i le va, e manatu i Itu uma ina ia faamalieina ma ua saunoa manino le Afioga i le Palemia e sao uma Savali na omai. Ona tatou silasila lea i le mea aupito sili ma talafeagai po o fea le mea e taatia ai le faaiuga o le mataupu lenei. O le faaiuga o le mataupu lenei e fai e le Palemene, i le tulaga i mau o lea ua tatou faafofoga ma silasila i le aso lenei, ina ia taatia i le agatonu faiga faaiuga aemaise o le paia o le Itumalo.

O le paia o le Itumalo i ona paia faalupe ma Savali uma na omai i tupu ma ee, tamalii ma failauga, faletua ma tausi, saoao ma tamaitai, e leai se isi o i ai sona atoatoa. Afai foi ua siisii lenei aso ma tulaga o saunoaga e pei lava o a outou upu i tuleiga ma saunoaga, e mamae le tavae i ona fulu. E manumanu le suli i ona faavae, a o le mea o taatia ai le amiontonu o le Atua lena. O le a foi se taumafai atu o lenei Komiti lau Afioga i le Palemia ma lau Afioga i le Minisita e fitoitonu i ai le mataupu, o le ala lea o lou piiama atu, malu ave i fale lou finagalo ma faamama ia lau sausau. O lea ua uma ona tatou feiloai ma soalaupule tulaga uma, a o le tatou toe agai i le ogasami ua uma ona asa e leai se tatou fealofaniga e maua ai. Ua ou tapa le Lafo Toe Teuteu ona o lea ua taoto lua le seuga o le aso lenei ona o le tausisia o le faamaoni o le a tatou agai e saili le amiontonu ona manino lea ma malamalamo. O lea o le a agai loa le Maota e faia le faaiuga e ala i Lafo e lua ua tuuina mai, o le Lafo Toe Teuteu ma le Lafo a le Komiti o Galuega, tulafono Tumau, Maota Fono ma Mataupu Tau Faiga Palota, o fea e agai i ai le tofa ma le faautautaga a le Maota o le mea lena e fai.

Ona ou manatu lea ma lou agaga faaaloalo tele o le a fai le tatou faaiuga i Lafo nei e lua, Lafo Toe Teuteu ma le Lafo a le Komiti, o fea e taatia ai le agatonu o le mea lena e fai.

**Afioga Hon PALUSALUE FAAPO II:** Lau Afioga i le Fofoga Fatalai na o sina mea lava leaí .

**FOFOGA FETALAI:** Tulai mai le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fatalai, ou te faatu le lafo, *Ina ia faia se tatou Palota Tauvalaau.*

*Faaluaina e le sui usufono mo Falealupo.*

**FOFOGA FETALAI:** O lea ua ou maua lou finagalo. Mo le faamalieina uma o mea uma ua tatou i ai i lenei aso ina ia aua ne i i ai se mea e tasi e gaepu ma taatia i le agatonu tulaga uma, fai itu e faamalieina uma ai finagalo o sui usufono.

O le Lafo Toe Teuteu a le Afioga i le Minisita mo Faamasinoga ma Pulega tau Faamasinoga, *Ina ia faaaauau le Fuaiupu 13 o le Tulafono Tau Faaofi o Teuteuga o le Tulafono o Faiga Palota 2014, vagana ai le vaevaega 13AE, e toe faafoi mai i tua. O le saoga lea o le Lafo lau Afioga i le Minisita?*

**Afioga Hon FIAME NAOMI MATAAFA:** Lau Afioga se i ou toe faitau lelei atu a? O le Lafo Toe Teuteu, *Ina ia faaaauau le Fuaiupu 13 o le Tulafono Tau Faaofi o Teuteuga o le Tulafono o Faiga Palota 2014, vagana ai le Vaega 131(e) e toe faafoi mai i tua”.*

**FOFOGA FETALAI:** Vagana ai le Vaega 131(e) e toe faafoi mai tua.

**Afioga Hon FIAME NAOMI MATAAFA:** O lona uiiga lau Afioga i le Fofoga Fatalai, i le vaega lea, o le a faatumauina uma lava i le Tulafono o lo o i ai i le 13 vagana ai le 131(e).

*Na ta le logo.*

**FOFOGA FETALAI:** O lea ua ou maua lou finagalo. O le a fai le tatou Palota Tauvalaau e pei ona faatuina mai ma faaluaina le lafo.

Fesili: O e finagalo e lagolagoina le Lafo Toe Teuteu a le Afioga i le Minisita tutulai mai.

#### PALOTA TAUVALAAU T.T.93(1)

1. Susuga Hon Tuilaepa Fatialofa Lupesoliai Aiono Neioti Sailele Malielegaoi
2. Tofa Hon Fonotoe Nuafesili Pierre Lauofo
3. Afioga Hon Fiame Naomi Mataafa
4. Tofa Hon Tuiloma Lameko
5. Afioga Hon Lautafi Fio Selafi Purcell
6. Afioga Hon Tuisugaletaaua Sofara Aveau
7. Tofa Hon Tolofuaivalelei Falemoe Leiataua
8. Afioga Hon Le Mamea Ropati
9. Afioga Hon Tuitama Talalelei Tuitama
10. Afioga Hon Magele Mauiliu

11. Afioga Hon Manualesagalala Mati Tuigamala Enokati Posala
12. Afioga Hon Sala Fata Lisati Pinati
13. Afioga Hon Leaupepe Toleafoa Apulu Faafisi
14. Afioga Hon Faumuina Tiatia Faaolatane Liuga
15. Tofa Fagaivalu Kenrick Samu
16. Afioga Tufuga Gafoaleata Faitua
17. Tofa Alo Fulifuli Taveuveu
18. Tofa Hon Tuuu Anasii Leota
19. Tofa Faimalotoa Kika Iemaima Stowers
20. Tofa Lenatai Victor Faafoi Tamapua
21. Tofa Sooalo Mene
22. Afioga Afoafouvale John Moors
23. Afioga Taefu Lemi
24. Susuga Ifopo Matia Filisi
25. Afioga Tialavea Fea Tionisio Seinafolava
26. Tofa Tusa Misi Tupuola
27. Afioga Maualaivao Pat Ah Him.
28. Afioga Tafua Maluelue Tafua
29. Afioga Hon Gatoloaifaana Amataga Alesana Gidlow
30. Tofa Agafili Patisela Eteuati Tolovaa

#### **IOE – 30**

**FOFOGA FETALAI:** O e tetee i le lafo, tutulai mai.

1. Afioga Hon Palusalue Faapo II
2. Afioga Hon Aeau Peniamina Leavaiseeta
3. Afioga Afualo Wood Uti Salele
4. Susuga Papalii Lio Faavaivaiomanu Taeu Masipau
5. Tofa Aveau Tuala Lepale Niko Palamo
6. Tofa Lefau Harry Schuster
7. Tofa Lealailepule Rimoni Aiafi
8. Tofa Toeolesulusulu Cedric Pose Salesa Schuster
9. Tofa Tapuai Toese Ah Sam

#### **LEAI – 9**

*E le i palota le sui usufono mo Gagaemauga Nu. 2 i lenei Palota Tauvalaau.*

**FOFOGA FETALAI:** O le iuga lenei o le tatou Palota Tauvalaau na ala i le lafo a le Afioga i le Minisita mo Faiga Palota. O e na lagolagoina le lafo e 30, o e na tetee e 9. Ma ou te faasilasila atu ua talia aloaia le Lafo Toe Teuteu a le Afioga i le Minisita.

*Faamaonia le Lafo Toe Teuteu a le Komiti e pei ona Teuteuina.*

*Faamaonia le Fuaiupu 13 e pei ona Teuteuina.*

**FOFOGA FETALAI:** Ia, ou te manatu o lea ua taatia i lagotonu lenei mataupu sa tatou tauavagameaina i lenei aso. E talitonu foi o lea ua tautino le solo e ala i le faaiga ua taunuua ia i le tatou Palestine. Epe i lava ona silafia, o a foi upu ma tala ma suaga o le vaatele i lenei mataupu, o lea ua tatou taunuua i le taunuuga na tatou mananao uma i ai o le sailia o le amiotonu. O lea foi ua tatou vaavaai ma tatou tilotilo i manatu ma lagona i le suaga o le vaatele i fetalaiga ma saunoaga na tatou i ai, ia e faamalo atu le onosai. E faamalo atu foi i le tatou Komiti. E talitonu le faamoemoe e le o maligi fua lo outou tautiga e ala i le faamanatu a o lea ua taatia i lagotonu ona o lea e le i faigofie foi le tau faamalamalamaaina o lenei mataupu e ala i finagalo o itumalo, a o lea ua fai le finagalo o le Palestine. O a saunoaga ma le tulaga o lenei aso ma a tatou felafolafoaiga sa feagai ai, o lea ua aumai le tulaga o le mataupu, ua talia aloaia le toe teuteuga a le Afoga i le Minisita.

**FAAMATALAGA:**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Faiga Palota 2014.**

**FOFOGA FETALAI:** O lo o i ai le Faasaoga a le Komiti i le Fuaiupu 1 ma le Igoa e pei ona faaalia i le Pepa o Galuega.

Tulai mai le Sui Taitaifono o le Komiti.

**Tofa AGAFILI PATISELA ETEUATI TOLOVAA:** Lau Afoga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

**“FAASAOGA:**

*Ia aveesea le fuainumera ñ2014ö ma ia suaia i le fuainumera ñ2015ö ma faitauina ai le igoa o le Tulafono e faapea:*

**“TEUTEUGA O LE TULAFONO O FAIGA PALOTA 2015.”**

Ma le faaaloalo.

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi o Teuteuga o le Tulafono o Faiga Palota 2015 faatasi ma Faasaoga.*

**P.P.2014/2015 NU.223, LIPOTI A LE KOMITI O GALUEGA,  
TULAFONO TUMAU, MAOTA FONO MA MATAUPU TAU FAIGA  
PALOTA I LE TOE ILOILOINA O MATAUPU TAU FAIGA PALOTA  
2015 – Iloiloga**

**FOFOGA FETALAI:** Tulai mai lau Afioga i le Sui Taitaifono.

**Tofa AGAFILI PATISELA ETEUATI TOLOVAA:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana Fautuaga ma Iugafono.*

*Faaluaina e se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow, sui usufono mo Aleipata Itupa i Lalo, sui usufono mo Falelatai ma Samatau, se tasi o sui usufono mo le Palota Taitoatasi, Afioga Maualaivao Pat Ah Him ma se tasi o sui usufono mo Falealili, Tofa Tusa Misi Tupuola.*

**3. OTOOTOGA O FAUTUAGA:**

I le faia i luga o ana Sailiiliga, e fautuaina e le Komiti le Malo ina ia toe iloilo nisi o vaega o le Tulafono Autu o Faiga Palota 1963, e aiaia ai mo fautuaga ua tuuina atu i inei:

**1. Ina ia toe tuufaatasia le Ofisa o le Komesina o Faiga Palota ma le Ofisa o le Fono Aoao Faitulafono.**

E faavae lenei Fautuaga a le Komiti i mafuaaga nei:

**a. Tuufaatasiga o Ofisa e lua (2).**

E mafai ona fetuunai galuega a Aufaigaluega i lalo o se Ofisa se tasi (1) e tautuaina le Fono Aoao Faitulafono i le va o Faiga Palota Aoao, ae faasee o se Ofisa o Faiga Palota i le taimi o le Faiga Palota Aoao pe a faataape le Palemene.

**b. Mo le faaaogaina tatau o tagata faigaluega.**

Maitauina le umi o le va o faiga palota aoao e pei ona iai nei i le tailima (5) tausaga, e tele ai le avanoa o le 1 faaaogaina tatau o le aufaigaluega a le Ofisa o Faiga Palota i le va o Faiga Palota Aoao.

**2. Tusi Taiala.**

Ia toe faafou le Tusi Taiala mo Sui Tauva ma tagata palota e faamalamalama ai mataupu tau Faiga Palota Aoao ma ni Faiga Palota Laiti e tulai mai ai. O lenei tusi taiala o le a faaalia manino ma faamalamalama ai tulaga nei:

- i. Aotelega o le Faiga Palota, lona mafuaaga ma le faamoemoe,
- ii. Agavaa ma aiaiga manaomia e mafai ai ona avea o se Sui Tauva i se Faiga Palota
- iii. Taualumaga ma taimi faatulagaina o le faagasologa o se faiga palota faapea le faauluina o Sui Tauva i se Faiga Palota

- iv. Aia tatau ma tiute uma e tatau ona faatino e soo se tagata ua agavaa e palota i se Faiga Palota
  - v. Tulafono uma faatatau i le resitaraina o Vaega faaupufai faapalemene ma aiaiga manaomia e avea ai o se Sui Usufono o le Palemene
  - vi. Vaega uma o Tulafono e noatia ai se Sui Tauva mai le faatinoina, e ono ma e mafai ona molia ai i le Faamasinoga
  - vii. Pepa faatumu uma mai le resitaraina o tagata palota ma Sui Tauva seja oo lava i Pepa Palota.
  - viii. Piriota o le Faiga Palota, aso o le palota, faitauga muamua ma le faitauga aloaia, taimi mo le faauluina o tagi faasaga i faiga palota ma lipoti a le Faamasinoga i faiga faaalatua ma faasolitulafono e faaleaogaina ai se Nofoa.
  - ix. So o se faamatatalaga e tatau ona silafia e soo se Sui Tauva o se Faiga Palota faapea tagata palota uma taitoatasi.
    - a. *vaevaega o itumalo palota;*
    - b. *tusi faapoloaiga mo palota laiti ma mafuaaga.*
- b) Ina ia faatulaga ni polokalame faalauiloa e faamalamalama ai le Tusi Taiala mo soo se tagata i vaega uma o le atunuu i le ono masina aø lumanai ai se Faiga Palota;
- a. Ina ia faatulaga se tau talafeagai e faatauina atu ai lenei Tusi Taiala ae ia avanoa foi i le upega tafailagi a le Ofisa o Faiga Palota ma *po o (le Ofisa o le Fono Aoao Faitulafono pea talia le fautuaga ua tuuina atu i luga)*
3. E na o tagatanuu e agavaa e tauva i soo se tofi o le nofoa o le Palemene o Samoa.
- Ia amanaia tama-fanau a Samoa sa fananau i fafo (m tua sa galalue e fai ma Sui o le Malo; po o aoaoga sa faatupeina e le Malo o Samoa ma anaPaaga).
  - *I le usitaia o le Tulafono o Tagatanuu o Samoa, e tatau ai ona faatāua ina ia faiga faavae ma aiaiga mo le sini autu ua faamoemoe iai mo le manuia ma le sologa lelei o le filifilia o Sui o le Palemene a Samoa.*
4. **E agavaa so o se tagata e matai i soo se afioagaae o lo o alaala i se fanua umia saoloto i le taulaga ona filifili pe o fea e palotaai, po o le afioaga o lo o mataiai, po o le taulaga.**
- *Ia iai pea le avanoa o tagata o lo o alaala i Itumalo o le Taulaga e filifili pe faatumauina o latou sootaga ma aiga i tua, po o le filifili e palota mo Itumalo o Nofoa mo le Taulaga o lo o nonofo ai, ma maua ai avanoa o tagata palota o Itumalo Faaalalafaga i tua atu o le Taulaga e filifili ai o latou Sui. O lenei faiga o le a tuuititia ai le faafitauli o le filifilia o Sui o Itumalo Faalalafaga e tagata o lo o nonofo i le Taulaga (Special Votes).*

5. **Taualumaga o Tagi faasaga i mataupu tau faiga palota – ina ia tuuitiitia ai tupe ma taimi faaalu i mataupu le faavaea.**

**Ina ia iai se iloiloga e faatino e faamautu ai molimau mo suesuega a le Faamasinoga.**

**Manatu faaalia:**

- O so o se tagi e faaalu i se faigapalota e tatau ona iloilo muamua e le Komisi Faapitoa, ma afai e faamalieina le Komisi i itu agavaa o le tagi, ona faøatoa mafai lea ona faaauau i le Faamasinoga.  
O le Komisi ua fautuaina e aofia ai le:
  - Taitaifono ó (soo se tasi uaagavaa e aveamaFaamasino)
  - Sui Sinia o le Sosaiete a Loia
  - Komesina o Sulufaiga
  - Komesina o FaigaPalota
  - Failautusi o le Fono Aoao Faitulafono
- Afai e le faamaoni 1 o talosaga i le tuuinamai o faamatalaga ma mafuaaga o se talosaga, e mafai ona molía ma faasala pe a faamaonia ia moliaga,
- E tatau ona iloilo auiliili e le Komisi Faapitoa le tagi ma molimau, ina ia mafai ona molía uma i latou o lo o aafia i faiga faaalatua ma taupulepulega agai i le Sui Tauva ua manumalo.
- E mafai e le ua molía ona faaalu se tagi e talifaitau i le tagi ua faaalu i le Komisi Faapitoa ma afai e faamaonia sea tagi o le a faaléaogaina loa.
- O le faaiuga a le Komisi Faapitoa e mautú ma e le fesiligia.

▪ *O lenei Fetuunaiga o le a :*

1. *Avanoa ai le suesueina o molimau ma Iloilo po o talafeagai le tagi, pe agavaa foi mo le faaauauina o suesuega.*
2. *Tuuitiitia tupe faaalu ma avega e feagai ma Sui ua manumalo.*
3. *Tuuitiitia ai faiga faa-alatua a tagata palota e faaaogaina Sui Tauva e maua mai ai ni oloa ma le faamoemoe e toe faaalu ai se tagi e faasaga i lea Sui Tauva.*

6. **Ia fa'aauau le faatofalaiga i le Faamasinoga e faatatau i faasalaga.**  
O le taimi nei e na o le lua (2) filifiliga mo le Faamasinoga – a faamaonia moliaga o le a faaléaogaina le nofoa po o lea afai o le faautautaga tatau e avanoa ai le Faamasinoga e iloilo isi faasalaga talafeagai e pei o faasalaga tau unite. (ft. tupe totogi).

**E ao foi i le Faamasinoga ona silasila i vaega nei:**

- Aofai o le seleni, poo le faaliliu faatupeina o ni oloa ma isi sa faaaogaina, o loo mafua ai le tagi faasaga i le Sui, ina ia faatusatusa i se aofaiga e \$2,000 o le tau aofai o ia oloa ina

ia faavasegaina i lalo o faasalaga o le Tulafono o Faiga Palota.

- Eseesega o le aofai o palota a le ua manumalo ma lē o lo o tagi,
- **Aofaiga o tuuaiga ua faamaonia.**
  - *I le taimi nei, e na o le lua faaiuga a le Faamasinoga ma o le a i le Faamasinoga foi le faautautaga e faia ai lana faaiuga i faasalaga talafeagai.*

**7. Komisi Suesue;**

E ese mai ai i le KomisiFaapitoa o FaigaPalota, o le a avea le Komiti o Galuega ma Komisi Suesue e iloiloina mataupu e laga mai i soo se Faiga Palota Aoao, faatasi ma le fesoasoani a le Loia Sili, Komesina o Faiga Palota ma le Failautusi o le Fono Aoao Faitulafono.

- *O le Komiti o Faiga Palota e aofia ai Sui Usufono ma ua loa tausaga o tauaveina tofi o Itumalo ma ua lava lo latou silafia i mataupu ma faafitauli sa aliae mai i FaigaPalota ua tuanai.*
- *I le malosiaga e iloiloai le Tulafono Autu o Faiga Palota e pei ona aiaia i le Tulafono Tumau, ua tatau ma onomea ai le avea ma matafaioi a le Komiti le tuuina atu o fautuaga i le Fono Aoao ma fautuaina ai le Malo mo ni teuteuga talafeagai o le Tulafono o Faiga Palota.*

**8. Ia faamalosia le resitara ma palota.**

**Ia faasala tagata ua agavaa e palota ae le i resitara, ma tagata ua maea na resitara ae le'i palota i se faiga palota.**

- **\$200 le sala tupe mo soo se tagata ua agavaa e palota ae le i resitara.**
  - *E tele ni faafitauli sa aliae mai i Sui Tauva sa o latou aveina tagata palota e resitara faatasi ai ma le aoina mai o nei tagata i le aso o le Faiga Palota, ua avea lenei faiga ma avega mamafa i Sui Tauva ma ua avea ai ma auala e faatino ai faiga faatosina.*
  - *O lenei faiga ua faamalosia ai Komiti a Sui Tauva e tauanau tagata palota ma avea ma mafuaga o feteenaiga i Komiti a Sui Tauva e pei ona molimauna i le aso o le Palota aemaise lava i le aoina mai o tagata palota.*
  - *O le faamalosia o le resitara mo tagata uma o le a uunaia ai tagata e resitara e aunoa ma le faamoemoe i Sui Tauva,*
- **\$300 le sala tupe mosoo se tagata sa resitara ae le i palota i se faigapalota.**

*ma o le faamalosia foi o tagata uma e resitara o le a mautinoa ai le faia o lana filifiliga tatau. I le faiga palota Aoao 2011, e 20,000 tagata sa resitara e lei palota.*

**9. O soo se nofoa ua faamaonia le faaleaogaina e le Faamsinoga o le a na o le Paeaiga o lo o molía ai ma e avanoa ai lea sui e tauva i le isi faigapalota aoao.**

- *O le faasalaga o loo iai nei e 10 tausaga ua mamafa tele ma i le iloiloina o tausaga o Sui Tauva ma Sui Usufono o le Palemene o lo o iai nei, o le toatele o le a le mafai ona toe tauva i le isi faiga palota aoao pe a fua i le faasalaga o le 10 tausaga o lo o iai nei.*
- *Ua avea foi lenei faasalaga e 10 tausaga ma avega mamafa i Sui Tauva sa aafia ma faaleaogaina o latou tofi i faaiuga a le Faamsinoga i Faiga Palota ua tuanai.*

**4. Fautuaga;**

1. Ina ia silasila totoa le Malo i Fautuaga a le Komiti ua tuuina atu i lana Lipoti o le Iloiloga o le Tulafono o Faiga Palota 1963.

**5. Iugafono;**

I le maea ai o ana Iloiloga e fautuaina ai e le Komiti Fono Aoao Faitulafono; Ina ia faamaonia :-

1. **Fautuaga mo le Toe Iloiloina o le Tulafono Autu o Faiga Palota;**
2. **P.P.2014/2015 Nu.15 - Lipoti a le Komisi Suesue mo le Faiga PalotaAoao 2011.”**

**FOFOGA FETALAI:** Tulai mai lau Afioga i le Palemia.

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o le faalavelave foi lea o le tulaga o le lua o pulou o lea e fai uma ou pulou e lua. E momoli ai lau faamalo i le tatou Komiti, matua manaia tele lenei Lipoti. Ua ttau lava, e i ai itu ttau o le Lipoti lea ua tauaaoina e au nei faapea le Kapaneta ma le Malo. E pei o vaega ttau ia o lo o aumai ma o le a agai foi le Kapaneta e matua sua le aulapatai ma le aulapauta i se vave e oo mai ai le mataupu lenei ae le i taitai oo atu i le isi faiga palota. O lona uiga e ono pue lava nisi o teuteuga o lo o i ai i i le taimi lenei i le va o le Fono lenei ma le isi Fono o le a sosoo ai po o le Fono e sosoo atu. E i ai nai vaega e ono aafia ai le Faavae. O mataupu na o le a silasila i ai le Kapaneta, ae momoli atu le faamalo, e tele taimi ou te le auai ai i le tatou Komiti, ona o le tele o tuatuagia pei ona silafia i le faagasologa o le galuega na toai ma ii le Kapaneta ma toe fai ai iuga i totonus o le Maota lenei. Ae pei lava o mea uma, e iu lava i le faaiuga a le tatou Palemene atoa, po o le a lava le Komiti laitiiti e aumai po o

le Kabeneta foi, a o le faaiuga lava o mea uma o le fonotaga lenei lau Afioga ma le 48 o le Maota o sui usufono ina ne it e i ua faapea se isi e aumai foi ona toe faaletonu lea, o aga na faa-Palemene. O le mea lea ou te toe tulai atu ai ma le agaga faafetai e avea ai au ma sui o le Kabeneta e momoli atu le faamalo i le Komiti, ua tele nai vaega taua ia ua aumai o le a silasila i ai le Komiti ona faapena foi lea ona aumai ai se Lipoti i totolu mo teuteuga tatou te toe vaai iai i se fonotaga o lata ma ii le tatou agai atu i isi fono ia a o le i faia, po o le fono foi e le o toe mamao le Fono autu o le Tala o le Tupe i lenei tausaga, ae le i taitai ona oo atu. E le iloa pe oo atu i ai ua tupu se manatu i le Kabeneta se i tuu atu le tatou faiga palota ia Iulai o le la tausaga. Se i vaai oe i ai e le i taitai.

Lau Afioga i le Fofoga Fatalai, ia o le tali atu lea ona ua vaai atu pei ua tau fia momoe nisi ua loaloa o tatou fono i lenei aso mai lava analaile ia o lenei lava ua taunuua ma ii le faaiuga o le aso. A o le tulag alena, ua talia e le Kabeneta le Lipoti e pei ona vaavaai i ai i isi fautuaga lelei lea ua taoto ma ii lumamea.

**FOFOGA FATALAI:** Tulai mai le sui usufono mamalu mo Faleata Sasae.

**Tofa AVEAU TUALA LEPALE NIKO PALAMO:** Lau Afioga i le Fofoga Fatalai, e momoli atu foi le faafetai i le Malo aemaise foi o le mamalu o le Palemene i le Taitai o le Itu Agai, o lea ua maea atu se vevesi laitiiti. O lea ua ou vaai atu i le Lipoti lona lua a le Komiti lea na tau vevesi atu nei, e i ai nai vaega ia lau Afioga ou te fia talanoa i ai i le vaega o le Lipoti lea. E momoli foi le faafetai i nisi o le vaega o le Lipoti ua taatia mai. O le vaega lea ou te fia fesili atu ai i lau Afioga i le Taitaifono, o le Vaega 4 o le Lipoti. O lau fesili muamua lea i le vaega 4 o le Lipoti, i le vaega lea o le matai o lea e nofo i le taulaga. Aua e pei ona silafia, e i ai le Tulafono foi lea o faiga palota, po o lea ua sui mai ai i le Tulafono tau faaofi lea pe faasao mai pe a faapea o lea ua sui i i, o le Tulafono foi lea e muamua lau choice i le mea e te matai ai, ona faatoa mafai lea ona e palota i le mea e te nofo ai. Aua e i ai foi aafia o nuu ia e i le taulaga o itumalo ia e i inei i le vaega lea, e le na o itumalo i tua e afaina ai i le faiga palota, aua o lea e pei e foliga ma ii le tou Lipoti o special votes ia e mafua ai lea vaega. Ae silasila foi, e tele foi le aafia ai o itumalo ia e i ai nei tagata po o le mamalu foi o le atunuua.

O le vaega lona lua lau Afioga i le Fofoga fatalai, o le vaega lona fitu lea e faapea mai ai, e avea le Komiti o Galuega ma Komisi Suesue, e ililoina mataupu e laga mai i faiga palota. Talu ai le mataupu lea ua tulai mai nei, pei ua fesiligia le Komiti lenei pe tatau ona fai ma Komisi Suesue.

O le mea muamua, o le tele o vaega ia i totolu o le Komiti lea efaatu mai nei, o faipule, pei ona silafia i le Komiti lea. O tagata nei o le a finauina, o tagata ia o lea na malo, ave i ai le complain a le isi po o le tagata ua faiaina. O le tagata la lea, e i ai lo latou va faapolokiki ma le tagata lea ua faiaina. Mo se faataitaiga, a faapea neei o se tagata o le itu agai lea na malo a eave i le faamasinoga a le Komisi Suesue a o lea foi e i ai sui o le Itu Aga ii totolu i i, o le a le mea o le a finau ai e faiaina lea tagata? E tele lava le conflict of interest i lea vaega. E tele lava lou gutu ma le afi, e ui lava o sui uufono o le palemene, ae i ai lou manatu, o lea e i ai isi tagata o le atunuua e pei o le Komesina o Sulufaiga, o le Faamasino Sili, o tagata faapena e tatau ona tuu i le Komiti lea. O le mea lava lenei e tau faapea o le conflict of interest. Aua a

tatou talanoa loa i le vaega lea i le mea lea ua taatia mai nei, e pei e tau le faamatalaina atu le vaega lea.

O le isi vaega lau Afioga i le Fofoga Fatalai, o le vaega lea e resitala ai le tagata palota, ma le tagata foi lea e le resitalaina. O le mea muamua, o le tetele o nei sala ua outou tuuian i totonus o le vaega lenei. O tagata palota nei, o tagata 21 tausaga agai i luga. O tagata nei, e le ai ni galuega, e le faigaluega. O tagata o nai nuu i tua a o lea o le a faasala. Afai o lea e aumai le tou Lipoti i luga e 20,000 tagata e le i palota i le tausaga 2011 ae toe faatu mai ma le mea lenei, se i outou tagai la i ai i le tele o le aafiaga o le a aafia ai tagata o le atunu?

O le vaega lona lua, e i ai talitonuga foi nei faalelotu, e le palota, e i ai ekalesia e faasa ona palota. E i ai la lou talitonuga, e faataatia le Tulafono lenei ae tatau ona tilotilo i le aiatatau a tagata nei i Ekalesia, ae ou te iloa foi, tailo i ai, a le fia palota lava le tagata ia, o lona uiga e le fiafia i le Malo, e le fiafia i le Itu Agai, e leai se isi e fiafia i ai, e le manao e palota. O le a le mea o le a palota ai pe a vaai atu e le fiafia i se isi e le o i ai? A o le a le mea o le a faamalosia ai fua le tagata e le palota pe afai e vaai atu e le o maua uma mea ia e le o i ai?

O lea la ou te faapea atu ai, se faamolemole le Komiti, e fai lava sina malosi tele o le Tulafono lea i le Fuaiupu 8, o le matua malosi lava. E tatau ona fai fuafua i le tamaoaiga o le atunu, e tatau ona fuafua i tu ma aga a le tatou atunu i tagata masani, aua ua masani lava tatou. O Niu Sila i le palota lea na uma atu nei, ua amata foi ona feoai tagata tauva e lau mai tagata palota. E faapena le olaga o tagata, a o lenei o le a tatou faia mai lenei Tulafono faapenei e atili ai ona tigaina nai o tatou tagata. O le isi vaega lea faamolemole e faavasega lava e lou mafaufau, o le Fuaiupu lea e 6 ma le Fuaiupu 9. O lea e sau i le 6, e talosagaina faasalaga e ave i tagata tai pei o le faasalaga lea e i ai nei, o lea la e ave ai le talosaga i le Komiti, toe liuliu le tofa, ae sau i le Fuaiupu 9, lea e fai mai ai le vaega lea ina ia mafai ai ona toe alu le tagata lea i le isi palota lea e loma nei, aua e tatau ona fua po o le a le faasalaga e fai i ai. Ma le vaega lea o le Fuaiupu 9 o le Tulafono. A o le tele o le isi vaega lea o le tuualalo, faafetai o lea ua i ai se Tulafono e faamalosia ai e tatau ona o e palota. Ae pei o vaivaiga na o lenei sui usufono e taatia atu i ou luma aemaise o le mamalu o le Palemene. Ma le faaaloalo lava.

**FOFOGA FETALAI:** Ia, o le a avatu le avanoa i se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi, ona tuu atu ai lea o le avanoa ia Papalii. Tulai mai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

**Afioga Hon LEAUPEPE TOLEAFOA APULU FAAFISI:** Malo faafetai. Ma ua manatui foi o lea ua tatou tulalata i le siui foi o le tatou galuega i lenei aso, e ui lava ina ua vela le fala ma api le uli, ua faaaaaogagase foi lau Afioga i le Fofoga Fatalai, ia, o matou e toatele, e faafeagai ma oe e toatasi e nai motugamanatu foi po o ni manatu. Faafetai foi i le Malo ma le Afioga i le Palemia aemaise foi o le Taitai o le Itu Agai. Ae ua ou tulai atu e momoli le faafetai i le Palemia ona o le folasaga manino, ua faafofoga foi i manatu foi o le ai lea mo i tatou i lenei aso i le tatou galuega. Ua saunoa manino foi le Afioga i le Palemia e lafo atu Teuteuga ma finagalo foi o le Komiti e ala i a latou tapenaga ma a latou sailiiliga, malo faafetai. O le matou

taofi lea, tatou talia lupe o mau i se finagalo o le Malo ina ia toe vave faafoi mai nei fautuaga ma nei teuteuga a le Komiti ona faapena foi lea ona pasia e le mamalu o le Palemene. O le agaga faafetai lea ina ia faafualeva ma maua pea le malosi, lagimama i le Palemia ma le Kapaneta, aemaise o i latou o lo o tapenaina tulaga o teuteuga e pei ona tuuina mai e le Komiti.

O le tulai atu lea ma le agaga faaaloalo e faafetaia le finagalo o le Malo, a o se taimi e foi mai ai, o le a faapena foi ona avatu o matou manatu. A o le taimi nei, malo faafetai.

**FOFOGA FETALAI:** Malo faafetai. Masalo o le taatiaga tonu lea o le tatou mataupu. O le ala lea o lou taumafai atu i le taimi ua sola sa ou tuu atua lava le avanoa e faaleo ai le agaga o lea itu o le Maota. Ae ua ou manatu, o lea ua saunoa le Palemia, e le o le mutaaga lea o le tatou mataupu lenei, o lea ua faafofoga le tatou Maota i le faatofalaiga i le galuega sa feagai ai le Komiti. O lenei aaooga manogi, pei lava foi ona fai atu, sa valaauma lava le atunuua lea sa faamaumauina ma tuuina atu, o lea sa faaleoina e le Afioga i le Sui Taitaifono. O a tiuga o le vaatele i lenei aso, o lea ua saunoa manino le Palemia, o le a tuuina atu ma teuteu ona tuuina mai lea i le tatou Maota ona tatou veloaso foi lea ma faatulaga. Ona ou manatu lea, tatou ave lea i uta, ua manino ma malamalama ne it e i foi ona tatou agai i se isi tulaga, ona faaloaloavale ai lea o le tatou Fono, vaeane outou finagalo, o manatu ma le tofa saili, ae tatou o ia i le auala lea i uta, e faigofie lena o lea ua saunoa le Taitai o le Malo, faaleo lea itu i uta, talitonu ua taatia i lagotonu.

Se i tulai mai lau Afioga i le Minisita mo Faamasinoga ma Mataupu tau Faamasinoga.

**Afioga Hon FIAME NAOMI MATAAFAA:** Lau Afioga i le Fofoga Fetalai, faamolemole lava o sina mea laitiiti lava, aua o le lafo e faapea e faamaonia le Lipoti, ae pei o lea e maua mai o lea e i ai nai isi popolega lea na faaalia ma ii nisi o saunoaga lea ou te maua atu, pe le tatau ona sui le upu faamaonia i le faamau, aua o lea e taatia atu i le Malo. Aua a faamaonia le Lipoti, o lona uiga ua fai mai le tatou Maota, ua talia atoatoa le Lipoti. Na o se manatu lau Afioga.

**FOFOGA FETALAI:** Malie maia lau Afioga i le Minisita, e manatu ua manino ma malamalama o le faamau lava o le faamaonia lena. E avatu lava i le Kapaneta, o le tulaga lava lena, e avatu lava i le Komiti, o lea ua outou vaai i ai i le aso lenei, e le faia se loto, lafo ma ii le Malo le tulaga lena. Ae malilie maia sui usufono.

**Tofa LEALAILEPULE RIMONI AIAFI:** Lau Afioga, na o le avatu o le faamalo i lena Itu, ua manaia le tatouí ua fiafia foi le tatou Fono, malolo faatamalii ae tuli so tatou ai i luma. Na pau lava le mea o le sui o le tatou Komiti lau Afioga i le Taitaifono, lau Afioga i le Palemia, e tatau ona molia i le Samoa Victim Support ua victimise uma tatou i lenei aso.

*Na faamaonia le Lipoti.*

**FOFOGA FETALAI:** Ia, tulai maia lau Afioga i le Palemia mo le lafo o le faiatauga faatolu.

Se i tulai mai le Minisita mo Faatoaga ma Faigafaiva.

**Afioga Hon LE MAMEA ROPATI:** Lau Afioga i le Fofoga Fetalai, faamolemole lava ae le i saunoa le Palemia o se mataupu laitiiti lava lea. Lau Afioga i le Fofoga Fetalai, o le talosaga lea e fia tuuina atu, pe mafai ona tuu se tuualalo a lau Afioga i le Komiti lea o Oloa Gaosia Tulaga Muamua, Mataupu tau Pisini, Alamanua ma Leipa, ua silia i le tausaga o taatia le Tulafono a le Matagaluega lenei i le Komiti lenei, o le Tulafono Tau Faaofi o le Fasimateina o Manu ma Faasoa atu o Aano o Manufasi 2014.

Ua ala ona ou taua le tulaga lea, ona o le isi tuutuuga o le tatou feagaiga ma le World Bank, ia pasia le Tulafono lea i mea o abattoirs po o fale fasimanu, ua tuai tele ona pasi leí ona oo se tatou fuafuaga i le Tulafono Tau Faaofi lenei, o lea ua uma le tausaga o lenei lava e faatali le Lipoti a le Komiti ua tuai ai ona pasia le mea lenei, ua fia aumai le tatou fale fasimanu a uaí E pei o le talosaga atu lena ma le agaga faaaloalo.

**FOFOGA FETALAI:** Malo faafetai. Ou te manatu o lea ua malamalama le Maota faapea foi le Taitaifono o lenei Komiti. Se i vaavaai ifo lau Afioga i le Failautusi po o fea tonu lea e toalia ai le mataupu lenei. Ou te talitonu lava o le auala faigofie ina ia fetuunai ifo o tatou uso a Failautusi, aemaise Failautusi aloaia ina ia alofagia ia le talosaga lea ua aumai i le Minisita ma le Malo, e taua tele leaga o i lea e tulituliuapu ai a tatou galuega. A o lea ua lagona lau Afioga i le Minisita, taatia mai o lea ua faafogfa atu le Failautusi tautuana lau Afioga i le Failautusi ia logo le Taitaifono ma le Komiti ina ia fonoa i se taimi talafeagai le Komiti lenei aua le faatinoga o lea faamoemoe.

Tulai mai lau Afioga i le Palemia.

#### **LAFO MO LE FAATAATIAESE O TULAFONO TUMAU 107**

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga fetalai ou te tulai atu ma le faaaloalo e faatu le lafo, *Ina ia faataatiae Tulafono Tumau 107(4) e avanoa ai le faiatauga faatolu o le Tulafono Tau Faaofi o Teuteuga o le Tulafono o Faiga Palota 2015.*

*Faaluaina e le Sui Palemia ma le Minisita mo Faamasinoga ma Pulega Tau Faamasinoga.*

*Na faamaonia le lafo ma tulai ai Tulafono Tumau 107 ua faataatiae.*

#### **TULAFONO TAU FAAOFI O TEUTEUGA O LE TULAFONO O FAIGA PALOTA 2015 – faiatauga faatolu**

**FOFOGA FETALAI:** Tulai mai lau Afioga i le Minisita mo Faamasinoga ma Pulega Tau Faamasinoga.

**Afioga Hon FIAME NAOMI MATAAFA:** Lau Afioga i le Fofoga Fetalai, ou te faatu le lafo, *Ina ia faiatauna le Tulafono Tau Faaofi o Teuteuga o le Tulafono o Faiga Palota 2015 i lona faiatauga faatolu.*

*Faaluaina e le Sui Palemia ma le Minisita mo Tina ma Tamaitai, Atinae o Nuu ma Afioaga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

*Na faaalia le agaga fiafia o le Maota i le patipati o latou aao.*

**FOFOGA FETALAI:** Ou te talitonu o lea ua tatou taunu i le siui o le tatou galuega i lenei aso, ma e momoli atu le agaga faafetai ma le agaga faamalo i le paia ma le mamalu maualuga o le tatou Fonotaga i lenei vaega o le taeao na liugalua. E le faaitiitia ai le agaga faafetai i le Atua ona o lea ua tatou taunu mai i le faaiuga o le tatou galuega i lenei aso faaiu, mai lava i le uluai aso na tatou fonoa ai le tatou Palestine i lenei vaiaso, paga lea le matagofie o le taunu mai o le tatou Fonotaga o lo o tumau lo outou soifua laulelei aemaise o lo outou soifua manuia. Faafetai le usufono, faamalo le onosai, faamalo le faapalepale, faamalo le saili tofa ma le saili manatu aua le feagai ai o le tatou Palestine ma le anoanoai o le soalaupuleiina o le tele o matapu i lenei aso, aemaise o le Aso Lua, Aso Tofi ma le Aso Faraile, o lea ua tele le tatou galuega ua uma ona tatou oo i ai.

E momoli atu le faafetai tele i lau Afioga i le Palestine ma lau Kapaneta i le tauavagameaina i le tele o matapu sa aumai avatu, o felafolafoaiga i tulaga o matapu eseese aemaise le soalaupuleina o le sagatonu ma le faaiuga talafeagai e tatau ona i ai. Malo le tauatai, malo le faauta, malo le tofa. Ou te talitonu o fea na agai i ai tuleiga ma saunoaga o lenei aso, e talitonu o lea ua tatou tetele i pesega ae matua i nuu lelei.

E faapena foi ona faafetai atu i le paia ma le mamalu maualuga o le tatou Maota i lenei aso. E talitonu lava e leai se iota o a outou gagana aemaise o tuleiga ma saunoaga e maligi fua, o lo o faafogofa le Atua soifua e ala i la outou faatofalaiga, aemaise a outou fautuaga, timaiga ma le tofa saili ma le tofa faaali, e talitonu ua mau ai i manu ma maua ai ia o lo tatou sa i le faaiuga o lenei aso.

Ou te faamalulu atu foi i tulaga o suaga o le vaatele mai lava i le uluai aso seja oo mai i le aso. Ia malu ave i fale finagalo e tusa ai ma tulaga o felafolafoaiga i lenei aso. E talitonu lava o le Maota lenei o le faata o lea e tapuai Samoa ae le mafai lava ona tatou milia faauu upu pe tatou te alo i le ata o le laau pe a tatou talanoa i mea talafeagai ma mea manino e manuia ai le tatou atunu. Ona ou manatu lea, o a suaga o le vaatele i tuleiga ma saunoaga i felafolafoaiga, afai sa sala uta, ia tonu pea tai. Afai foi sa sipa le lamaga ma sosopo le fogatia i le fogatai, aemaise foi o le sopo o le taiao i le taipo ma sopo le tai i le eleele, ia malu ave i fale finagalo. O se tapuaiga faafogofa foi a lo tatou atunu, Samoa, o le a le agaga o lenei Palestine, e le saili gofie le mea moni ma le faamaoni, ma le mea lelei e tautua ai le tatou atunu. O le a sa outou faafogafoga i saunoaga a le Maota i lenei aso aemaise foi o felafolafoaiga, e fevatauai lava tama a o le uso ae tasi lava le faafitiga o aleaga ina ia maua mea sili ma measina ina ia taumamafa Samoa i taumafataga o meaai faaleagaga aemaise o le sua o le laueelele i le tamaoaiga o le tofa ma le faautautaga saili a le Maota, o le agaga atoa lena o lenei aso.

E momoli atu le faafetai tele foi i le tapuaiga a Ofisa Sili o Pulega a Matagaluega aemaise o Faalapotoptoga a le Malo o tatou faatasi ona o

fuafuaga, malo le onosai ma le faapalepale. E i ai le talitonuga, o le a fai se tatou faiga malologa, talosia feau ma tiute ma galuega o le a outou feagai ai, le maatui ma le maagao, le laufaleaina, ina ia alofagia e le Atua e faapaolo ona aao aua le faaauauina o le tatou valaaauina, e le gata i lau Afioga i le Palemia ma lau Kapaneta, aemaise o sui usufono mamalu uma o lenei aso. A manino le mata o le vai, ua toa le tai. O lenei aso, o a suaga o le vaatele na tatou aumai avatu, ia, tatou taui laia ma lafo i le Atua, o ia a le Faamasino Sili o mea uma, na te silafia le mea e tupu nei, taeao ma le lumana. A o le tatalo, a i ai se mea ua lelei, ia avea i tatou o auaua le aoga.

Ona ou manatu lea, a o le i faamaloloina le tatou Fono, e faafetai atu i lau Afioga i le Failautusi o le Fono, Sui Failautusi ma le mamalu o le tatou Ofisa, malo le onosai, tapenapena malie a tatou mea pe a uma le Fono i lenei aso, tatou toe tapena mai foi pe a tatou toe aulia Tauualumaga o le tatou Fono mo le masina fou.

A o le i faaiuina le tatou Fonotaga, ou te tapa lau Afioga i le Sui Fofoga Fetalai e te tulai mai e fai se tatou tatalo faamanuia ona tatou malolo ai lea.

*Na tolopo Tauualumaga a le Fono Aoao i le itula e 5:52 i le afiafi seia aulia le Aso Lua, 21 Aperila 2015 i le itula e 9:00 i le taeao.*